

Htawm lawng peue caee Eun Yesu' na' yeuh ce kan'

Kaw tuil' Cit' seunga' na' lih

¹ Htaw' hpi' lu, lawng ku' Yesu' la Eun ri yeuh mae' sangsawn' Eun na' tang' neum kleum' ka na' ² rot ri huk' Eun kuing' pang mao' na' Eun cu Cit' seunga' chak' na' Eun tuil' leukah' ri peue caee leuk ri na' ce, ui' tem' ri tuil' a ri mi nang htawm nanggal' na' hawc'. ³ Hawc' hkam' Eun ku' tukhka na', Eun tuil' peue awn' ce nyu tu' ri na'. Punta kaw ce cang yum' kaw'n im' neum Eun na', Eun tuil' ce nyu sa' hki' heun' ceu. Eun tuil' ce nyu ri hk'a' naee yam pun' kul' seunyi na', Eun lah' ris ce mhawng' lawng kuing' Eun Peucawo' na'. ⁴ Ti pok yam buih som' Eun mae' ce na', Eun tuil' leukah' ri ce, "Paw nang pucti heul' hk'ai' veng Yeru' salaem na', daecti rot ri pun pe' lapsawng' leukah' kati Kuing' Ui' ku' pun pe' ri mhawng' ri Ui' na' nuk ka na', puing ko' a reu'. ⁵ Kopti Yo' han tuil' eun hk'a' cum' na' ri pe' ri leuum', daecti un' ling', pe' kaw pun ri rap ri ti hk'a' cum' na' ri Cit' seunga' chak' na'."

Yesu' huk' Eun kuing' pang mao'

⁶ Kop awn' na yam buih hk'om ce puri na', ce mhaing' Eun, "Cawo', maet' maen' kaw Mi tang tang' hk'u' kuing' ce peue I' sarela' na' aw?"

⁷ Yesu' Eun lah' a ri ce, "Kaw pe' un' lo' ri yawng meuh yam ku' A' kuing' tang' Eun hk'a' naee ti' ca ri na'. ⁸ Daecti yam Cit' seunga' chak' na' lih a hk'a' pang pe' na', pe' kaw pun ti' ca na'. Pe' kaw meuh nang hkam' sa' hki' Ui'

tang' neum veng Yeru'salaem na' rot kuing' Yu'da, kuing' Samari' rot vang bhen' keute' na' sut' ka na'."

⁹ Hawc' lah' Eun a yeuh keutit' na', Eun pun ri yuk ri huk' nanggal' to' nha' ce na'. Putum' na' a ghuim' Eun rot ri un' laee nyu ce Eun.

¹⁰ Na' ce buih mung' ri seuluil' mao' na' yam huk' Eun na', peue cuip' hk'eung paing lal' peue na' ka keulawn' pucti cawng keunam ce na'. ¹¹ Ka lah' a ri ce, "Peue Galilae' na' pe', pe' ci' yeuh keunhaw' pe' vae' buih cawng ri mung' mao' na' maen'? Yesu' gah' hk'ai' pe' huk' lec kuing' pang mao' aen' Eun ko', kaw Eun tang lih bae seun' nyu pe' huk' lec Eun kuing' pang mao' na'."

Nang ten Yu'das' I'sakariot' eun

¹² Hawc' awn' na, ce lih neum gong Sanlon na' ce tang ing' nang veng Yeru'salaem na'. Gong awn' a un' seungai veng Yeru'salaem na', a meuh hk'a' cang long hk'a'naee seunyi Sin'.* ¹³ Yam ing' rot ce nang veng na', ce huk' nang hong' htan hk'a'tuh vang ut' ce na'. A meuh Petru', Yo'han, Yakop', Andre, Hpi'lip', Hto'mas', Bahto'lome', Mahtae, Yakop' kon' eun Alfeas', Si'mon Yelot', mae' Yu'das' kon' eun Yakop' na' ce. ¹⁴ Ce tang' hpum' ri meuh ti meul' hk'o' mun' tiduih' gawm'euc' mae' beun' na' ce mae' Mari' ma Eun Yesu' na' ka mae' awng' me Eun Yesu' na' ce laleung.

¹⁵ Hk'a'naee seunyi meuyam awn' na, Petru' eun kuh' cawng nang ngon' ce peue yum' na' (ce kue' hk'ao ri pak' leual'kul' peue.) ¹⁶ Eun lah', "Ec'awng' na' pe', lawng eun Yu'das' ku' va peue mawt Yesu' Eun na' seun' Cit' seunga' chak' na' cu a moeng eun Davit' na' a lah' ri tem' ri nang htawm Seunga' leumah' na' kaw a kah ri htonnuk neum. ¹⁷ Yu'das' eun ko', ut' eun nang muk e'. Eun meuh nang yeuh kan' mae' e' ti peue yeut."

* **1:12** 1:12 Meuh a hk'a' seungai hpawn'pak' tawp'.

18 (Yu'das' ti eun paec lapsawng' pun ri hk'a'naee vang un' leupaws seumeu' na', eun leuvaee bhen' keute' ti bhen'. Eun htang'meul dhim' cing' ri na' ri ka, keuteul eun na' a gvah', vec eun na' a pucti lih gawm'euc'. 19 Peue veng Yeru'salaem na' pun ce ri mhawng' lawng aen' na ku peue ri. Kop awn' na, leukah' ce na' ce lah' bhen' keute' awn' a meuh Akeldama'. Vangdoh' ka na' a lah' bhen' keute' nham'.)

20 Petru' eun lah', "Kopti tem' a ri nang htawm Suk'seun' na',

'Kah vang ut' eun na' yen' yong.

A'nhaw' pawlaee ut' ri ka saec' ti peue', †
maee'

'Kah peue seubu eun ten an' nya eun na' reu': ‡

21 Kop awn' na, kah ri leuk peue ti peue. Peue awn' eun kaw kah ri meuh ku' ut' maeé' e' keuyuit yam Yesu' kawn' ut' Eun maeé' e' na' 22 tang' neum rap Eun ri ti hk'a' cum' na' maeé' Yo'han eun rot ri yuk Eun ri huk' hk'ai' e' na'. Kopti peue awn' kaw eun kah ri meuh nang hkam' sa' hki' maeé' e' lawng Yesu' kuh' im' Eun na'."

23 Kop awn' na, ce lah' muis peue lal' peue. Ku' ti peue na' eun meuh Yo'saep, peue ku klawng eun meuh Basabas' (muis seubu eun na' a meuh Yu'tas'). Lal' peue ti peue na' eun meuh Mahti'as'. 24 Hawc' ko', ce hk'o' mun' lah', "Peucawo', yawng Mi hpum' peue na' ku peue. 25 Kopti Yu'das' tec eun kan' peue caee Eun Yesu' na' eun heul' vang heul' ri na' hawc', punta peue lal' peue aen' ka Mi ci' kaw leuk ri ti nangnhaw' ri ka eun na' ten kan' peue caee Eun Yesu' na', hk'o' Mi seudec' ri tuil' a ri ye reu'." 26 Hawc' ko', ce pawk' ri caw Mahti'as' eun. Kop awn' na, eun lec cum ce peue caee Eun Yesu' kul' ti peue na'.

† 1:20 1:20 Suk'seun' 69:25 ‡ 1:20 1:20 Suk'seun' 109:8

2

Cit' seunga' chak' na' lih ka

¹ Yam rot a seunyi pawe Peteko'te na', ce cu ri tiduih' gawm'euc' ri vang ti duih' na'. ² Yam awn' na, a keulawn' kue' seng' laws' lih neum kuing' pang mao' na' seun' guil' lomleng keuting ko'. A lih nuk hk'a'naee nya vang buih mok' ce na'. ³ Ce nyu piu' ngawl seun' a dak' na'. A gvah ri keului' ri hk'a'pang ce ku peue. ⁴ Cit' seunga' chak' na' a nuk hk'a'naee ce gawm'euc'. Ce tang' ri lah' leukah' seubu heun' ceu na' seun' ku' Cit' seunga' chak' na' kah a ce lah' ris na'.

⁵ Yam awn' na, peue Yu'da ku' yumyam' Peucawo' Eun ing' neum kuing' ku kuing' hk'a'pang bhen' keute' na' ce ing' nang veng Yeru'salaem na'. ⁶ Yam mhawng' ce seng' leukah' awn' a na', peue cum heun' na' ce kvang' ce ing' cu ri kopti sawng' mhawng' ce leukah' ri is' a'nhaw' is' nang awn' na'. ⁷ Ce am', ce mhaing' puri, "Ku' leukah' na' un' meuh ce peue Galilae' aw? ⁸ A ci' yeuh sa'nhaw', e' vae' sawng' pun ri mhawng' leukah' kuing' vang ut' ri na'?" ⁹ E' meuh peue Pati', peue Medi', peue Elam meuh peue ut' kuing' Meso'po'tami', peue Yu'da mae' peue Kapadosia, peue Pontas' mae' peue ut' kuing' Asa', ¹⁰ peue Fi'cia' mae' peue Pamhpi'li', peue E'ji'tu' mae' peue ut' nang kuing' Li'bia' keunam veng Sai'rin' na' ce meuh peue chec' ing' neum veng Ro'ma na' ¹¹ (gawm' peue Yu'da mae' peue ing' lec ritroe ce peue Yu'da na'), peue kaw' Kret' mae' peue Arap', sawng' mhawng' e' ris ce lawng kan' keuting Eun Peucawo' na' ri leukah' e' na' meun." ¹² Ce kvang' mawo gawm'euc' ri. Ce mhaing' puri, "A ci' meuh ku' yeuh sa'nhaw'?"

¹³ Daecti ngon' ce chaw hkamram ce. Ce lah', "Ca ce ri nyui plai' heun'."

Petru' sangsawn' eun leukah' mun' seunyi Peteko'te

¹⁴ Yam awn' na, Petru' eun cawng maeé' peue caee Eun Yesu' kul'ti peue ná' ce. Eun klawng ri lah' laws' a ri peue cum heun' ná' ce, "Peue kuing' Yu'da maeé' peue ut' nang veng Yeru'salaem ná' pé' gawm'euc', kaw ui' lah' pé' mhawng' lawng aen' na, pé' ná' leuceng a meulamlam ri reu'.

¹⁵ Peue aen' hpaw ce cá' yuic' ri plai' seun' ku' kuit pé' ná'. Maet'maen' kawn' meuh ka peunngup seudim' nali.

¹⁶ Daecti lawng aen' a meuh a seun' ku' peue suip leukah' Eun Peucawo' Yaw'la' lah' eun ná',
¹⁷ 'Peucawo' lah' Eun, "Hk'a'naee meuyam tisut' ka ná',
 Ui' kaw kah Cit' seungá' ri ná' lih hk'a'pang peue ceu gawm'euc'.

Kon' beun' kon' me pé' ná' ce kaw sangsawn' leukah' mun' ren'kawn ná'.
 Nang nhum' pé' ná' ce kaw nyu ku' limit.
 Peue kawt pé' ná' ce kaw leumu.

¹⁸ Yam seunyi meuyam awn' rot ka ná',
 Ui' kaw kah Cit' seungá' ri ná' lih hk'a'pang mhai' beun' mhai' me Ui' ná' ce.
 Ce kaw sangsawn' leukah' mun' ren'kawn ná'.

¹⁹ Ui' kaw tuil' pé' nyu ku' hk'o'am' hk'a'tuh ná' nang kuing' pang mao'
 maeé' het' keuting hk'a'ruim pang bhen' keute' ná',
 a kaw meuh nham', ngawl maeé' tu' ngawl.

²⁰ Yam seunyi keuting kue' munhpung' Eun Peucawo' ná' un' nang rot ka ná',
 seunyi ná' a kaw duim'lawng,
 a'chi' ná' a kaw meuh nham'.

²¹ Peue klawng muis Eun Peucawo' ná' ce ku peue,
 ce kaw pun hk'a' htut lawtpon ná'."*

* **2:21** 2:21 Yaw'la' 2:28-32

²² Peue ísarela' na' pe', leuceng leukah' aen' a reu'. Yesu' peue veng Nasaraet' meuh Eun peue Peucawo' htawhkam Eun pe' ri ku' hk'o'am' mae' het' keuting na'. Peucawo' cu Eun, Eun yeuh a nanggal' pe' seun' ku' yawng pe' na' hawc'.

²³ Seun' Peucawo' yawng Eun a Eun tang' ri uin' a nanggal' hawc' na', Yesu' aen' Eun pun ri hkam' hk'a' ap Eun ri pe'. Pe' teum'kawm reum peue rai na' ce, pe' tawk' Eun yeum pang kleum' rawng'tawp' na'. ²⁴ Daecti Peucawo' Eun tang yeuh Eun kuh' im', yeuh Eun lawtpon hk'ai' hk'a' tukhka na' mae' hk'a' yeum na'. Kopti hk'a' yeum na' mawt un' pun ka Eun. ²⁵ Hkun'haw' hkam' Davit' eun ku lah' lawng Eun na' yeuhki',

'A saec' meuh yamnhaw' nyu ui' Peucawo' ut' Eun nanggal' ri na'.

Kopti ut' Eun hk'a' a'tawm' ui' na',
ui' kaw un' fui'fa'.

²⁶ Kop awn' na, hpum' ui' na' a ren'kawn, moeng ui' na' a ren'kawn,

tu' ui' na' a ku kaw ut' ri keutui' hpum'

²⁷ kopti kaw Mi un' tecla ui' nang leumuic na',

Mi ku kaw un' tecla peue seunga' chak' Mi na' eun seueum' yeut.

²⁸ Mi tuil' ui' nawk hk'a' civit im' na' hawc',

Mi kaw yeuh hk'a' ren'kawn ui' na' htonnuk nanggal' Mi.†

²⁹ Ec'awng' na' pe', lah' ui' a ceng'sae' ri pe'. Davit' a'ta' keuting e' na' yeum eun, peue puing' eun hawc'. Saec' meuh keutui' leumuic eun na', a ku kue' mawn' rot seunyaen' yeut. ³⁰ Daecti meuh eun peue suip leukah' Eun Peucawo'. Eun yawng Peucawo' yeuh Eun ri tuil' kati ri ti. Hk'a'nae ceucat eun na' ti peue, Eun kaw tuil' Eun mok' tenceo' ri na'. ³¹ Kopti Davit' bai yawng eun a nanggal' na',

† 2:28 2:28 Suk'seun' 16:8-11

eun lah' lawng Hkrit kaw Eun tang kuh' im' na' yeuhki',
 'Peucawo' Eun kaw un' tecla Eun nang leumuic. Tu' Eun
 na' Eun kaw un' kah a seueum' yeut.' ³² Peucawo' kah
 Eun Yesu' awn' Eun kuh' im'. Meuh e' nang hkam' sa' hki'
 ka lawng ku' meuh neum aen' na gawm'euc' ri. ³³ Yam
 pun Eun hk'a' tang' ri lhung' keuting hk'a' a'tawm' Eun
 Peucawo' na', seun' A'kuiing' tuil' Eun kati ri, Eun pun
 Cit' seunga' chak' na' ri Heun. Hawc' ko', Eun kah Cit'
 seunga' na' lih seun' pun pe' ri mhawng', pun pe' ri nyu
 a maet'maen' na'. ³⁴ Davit' eun saec' un' nang huk' kuing'
 pang maot, daecti eun ku lah' a,

'Peucawo' lah' Eun a ri Cawo' ui' na' Eun,

"Mok' hk'a' a'tawm' Ui' na'

³⁵ rot ti uin' Ui' ransu Mi na'
 ce hk'a'ruim dak cung Mi na' reu.'"†

³⁶ Kop awn' na peue Isarela' na' pe' gawm'euc', yawng
 pawn aen' na meulamlam ri reu'. Peucawo' kah Eun Yesu'
 ku' tawk' pe' pang kleum' rawng'tawp' aen' Eun meuh
 Cawo' meuh Hkrit."

³⁷ Yam peue awn' mhawng' ce leukah' awn' a na', a pen
 hpum' ce na' nyawk'. Ce mhaing' Petru' eun mae' peue
 caee Eun Yesu' ku' seubu na' ce, "Ec'awng' na' pe', e' ci'
 kaw htuk' ri yeuh sa'nhaw'?"

³⁸ Petru' eun top' a ri ce, "Punta map' pe' na' kaw a
 gah', pe' ri ku peue taws' hpum' fuin map' ri rap ri ti hk'a'
 cum' hk'a'ruim muis Eun Yesu' Hkrit na' reu'. Hawc' ko',
 pe' kaw pun lapsawng' Cit' seunga' chak' na'. ³⁹ Leukah'
 kati aen' meuh a pun pe' mae' kon' lhan' pe' na' ce rot ri
 peue ut' vang seungai na' ce gawm'euc'. A meuh pun peue
 Peucawo' klawng' Eun ri ti na' ce gawm'euc' yeut."

⁴⁰ Petru' eun deun' sati ce rengreng ri leukah' seubu
 heun' ceu. Eun lah', "Roksa' tu' pe' na' yeuh ri pon peue

† 2:35 2:35 Suk'seun' 110:1

rai cat aen' ce reu.'" ⁴¹ Peue leuceng leukah' eun na' ce rap ri ti hk'a' cum'. Hk'a'naee seunyi awn' na, peue meuh tapae' na' ce kue' bae hk'ao loe'heng' peue.

Peue yum' na' yeuh ce a'mawo puri

⁴² Ce leuceng leukah' sangsawn' ce peue caee Eun Yesu' na', ce yeuh a'mawo puri. Ce ves hkawomun' na' tiduih'. Ce hk'o' mun' tiduih'. ⁴³ Kopti peue caee Eun Yesu' na' yeuh ce ku' hk'o'am' mae' het' keuting heun' ceu pucti lih na', ce lhat' ku peue ri. ⁴⁴ Peue yum' na' ce yeuh ri meuh ti mhú' ti cum, ce meuh cawo' ka vahtu' hk'il' leumuil ri na' tiduih'. ⁴⁵ Ce paing' vahtu' hk'il' leumuil ri na', ce gvah a ri puri hot' ku' lo' ce na'. ⁴⁶ Ce huk' cu ri nang nya hk'o' mun' keuting na' ku seunyi. Ce ku ves hkawomun' na' nang nya ri na'. Ce ren'kawn leuong' leuah' hk'a ku' hk'a tiduih'. ⁴⁷ Ce suk'seun' Peucawo' Eun, a htuk' hpum' peue gawm'euc'. Peucawo' Eun yeuh peue pun hk'a' htut lawtpon na' ce heun' hk'a'naee muk ce na' ku seunyi.

3

Petru' bai' eun peue cung lu cuin

¹ A kue' ti seunyi yam hk'o' mun' hk'a'pul loe' nali na', Petru' eun mae' Yo'han ka buih huk' nang nya hk'o' mun' keuting na'. ² Peue cung lu tang' neum yam keut' ri na' eun peue jong' ri ing' uin' eun keunam bawl' leuva' ka nya hk'o' mun' keuting muis "Leuva' Ngam" na' ku seunyi, punta kaw eun hk'o' ri hk'a ri peue lec nang nya hk'o' mun' keuting na' ce. ³ Yam pun eun ri nyu Petru' eun mae' Yo'han kaw ka lec nang nya hk'o' mun' keuting na', eun hk'o' paec ri ka. ⁴ Petru' eun mae' Yo'han ka seuluil' eun. Petru' eun lah', "Keue' ri ya reu.'" ⁵ Kop awn' na, eun ku seuluil' ka. Eun hteum' ri kaw pun ku' ti ri ceu ri ka.

⁶ Hawc' ko', Petru' eun lah', "Un' kue' ui' hk'il' leumuil, daecti ku' kue' ui' na' ui' kaw tuil' a ri mi. Hk'a'naee muis Eun Yesu' Hkrit peue veng Nasaraet' na', long hk'a' heul' reu'." ⁷ Petru' eun teuk' ri yuk ti' hk'a' a'tawm' eun na'. Cung mae' ngok cung eun na' a keulawn' kue' kaw' reng. ⁸ Eun keulawn' yawt' ri kuh' cawng tang' ri heul'. Hawc' ko', eun ing' lec hk'a'naee hkum ka nya hk'o' mun' keuting na' mae' ka. Eun seuyawng' ri heul' suk'seun' mun' Eun Peucawo'. ⁹ Yam peue heun' na' nyu ce long eun hk'a' eun suk'seun' Peucawo' Eun na', ¹⁰ ce pawn meuh a ku' mok' ri hk'o' ri hk'a keunam bawl' leuva' Ngam ka nya hk'o' mun' keuting na' eun. Ce am' nguitkvang' nyawk' ri ku' meuh ri peue awn' eun na'.

Petru' sangsawn' eun leukah' mun' ri peue heun'

¹¹ Yam peue awn' buih jhawp' eun ti' eun Petru' na' mae' ti' eun Yo'han na', peue heun' na' ce am'. Ce hk'uih ing' ri ce vang klawng ce muis a'ras' rum Saw'lamon na'. ¹² Yam Petru' nyu eun yeuh a ko' na', eun lah' a ri ce, "Peue I'sarela' na' pe', a ci' meuh kop keunhaw', pe' vae' am' ri lawng aen' na? A ci' meuh kop keunhaw', pe' vae' keue' ri ya a seun' yeuh ya peue aen' eun tang cang heul' ri ti' ca ri mae' ku' chak' ri na'? ¹³ Peucawo' ce Abraham, I'cak', Yakop' mae' Peucawo' ce a'ta' a'ya e' na' yeuh Eun mhai' ri Yesu' Eun pun munhpung' ri. Ap pe' ri kaw toh Eun. Cawo' Pilat eun saec' kuit kaw ri plo'e' Eun, daecti pe' tecla Eun nanggal' eun cawo' Pilat. ¹⁴ Pe' tecla Cawo' seunga' chak' leupaws seumeu' na' Eun, pe' hk'o' ri ti peue toh peue na' eun tang' Eun. ¹⁵ Pe' saec' toh Cawo' civit im' na' Eun, daecti Peucawo' Eun tang yeuh Eun kuh' im' hk'ai' vang yeum ri na'. Ye meuh nang hkam' sa'hki' ka lawng aen' na. ¹⁶ Peue pun pe' ri nyu yawng aen' kopti yum' eun muis Eun Yesu' na', eun kue' kaw' reng. Kopti muis Eun Yesu'

Peue caee 3:17 10 Peue caee 3:26

mae' hk'a' yum' ku' lih neum Eun na', a yeuh peue aen' eun cuin seun' nyu pe' a na'.

¹⁷ Ec'awng' na' pe', yawng ui' kopti un' yawng pe' a na' pe' yeuh a. Saec' ro' pe' na' ce ku seun' awn' a yeut. ¹⁸ Daecti Peucawo' kah Eun lawng aen' a meuh punta ku' peue suip leukah' Eun na' lah' ce a tang' neum leumah' na' kaw a kah ri htonnuk, Hkritt Eun kaw pun ri hkam' ku' tukhka na'. ¹⁹ Kop awn' na punta Peucawo' kaw Eun saic' ri tec map' pe' na', taws' hpum' fuin map' ri hpawt' ri ing' ri Peucawo' Eun reu'. Pe' lawn yeuh keutit' ko', hk'a' kuit sam'ran na' a kaw lih neum Peucawo' Eun, ²⁰ Eun kaw cus' Yesu' Cawo' tang' Eun ri uin' meuh Hkritt pun pe' na' Eun ri pe'. ²¹ Yesu' Eun kaw kah ri ut' nang kuing' pang maot' na' rot ri yam Peucawo' na' Eun plin' ku' ceu gawm'euc' na' meuh ku' hk'u' seun' uin' Eun kati ri peue suip leukah' seunga' chak' ri leumah' na' ce. ²² Kopti Mo'se lah' eun, 'Cawo' Peucawo' pe' na' kaw Eun tang' ri uin' peue suip leukah' ri nang seun' ui' ri pun pe' ti peue neum ec'awng' pe' na' ce meun. Pe' kaw pun ri leuceng ku' lah' eun ri pe' na' ce ku' ceu ka. ²³ A'nhaw' lawn un' leuceng leukah' eun ko', eun kaw pun ri hkam' reng' ri tec ri hk'ai' ceucat ri na' ce.*

²⁴ Neumneum ka na' ko', peue suip leukah' Eun Peucawo' ku' peue tang' neum Samoela' eun ing', ce tamnai lawng ka meuyam aen' ce gawm'euc' na'. ²⁵ Meuh pe' kon' hk'i ce peue suip leukah' Eun Peucawo' na', pe' ku' lec hk'a'nae kati sat' ca' Peucawo' tuil' Eun ri a'ta' a'ya pe' na' ce yeut. Eun lah' a ri Abraham eun, 'Peue ceu pang bhen' keute' gawm'euc' na' kaw ce pun mun' kop ceucat mi na' ce.† ²⁶ Yam Peucawo' yuk Eun mhai' ri na' Eun huk' hawc'

* ^{3:23} 3:23 Saw' leukah' mun' 18:15, 18, 19 † ^{3:25} 3:25 Yamla 22:18; 26:4

na', punta kaw Eun nap mun' ri pe', Eun cus' Eun ri pe' nanggal'. Yeuh pe' hpawt' ri hk'ai' ku' rai na' ku peue ri."

4

Cawo' ce peue Yu'da na' tang' ce a'mu ri Petru' eun maeé Yo'han ka

¹ Yam Petru' eun maeé Yo'han buih sangsawn' ka peue heun' na' ce na', peue jhawp' rit, ro' peue ko' nya hk'o' mun' keuting na' ce maeé peue Sadu'kae' na' ce ing' ri ka. ² Ce seungeueng' ri ka, kopti peue caee Eun Yesu' na' sangsawn' lah' ka leukah' mun' ren'kawn lawng Yesu' yeum Eun hawc' Eun tang kuh' im' na' ri peue heun' na' ce na'. ³ Ce mheut' Petru' eun maeé Yo'han ka. Kopti fec' ka na', ce seue' ka nang htawng' rot peunsa'. ⁴ Daecti peue pun ri mhawng' leukah' sangsawn' na' ce yum' heun' peue. Peue yum' na' a'ta' me na' ce koe ce keut' ri kue' hk'ao hpawn'heng' peue.

⁵ Na' rot peunsa', cawo' ce peue Yu'da, ro'kan nang kawt maeé peue guil leukah' ritroe na' ce hk'om puri nang veng Yeru'salaem na'. ⁶ Peue jhawp' rit keuting muis Anas' eun maeé Kayafas', Yo'han, Alek'sando' maeé ceucat peue jhawp' rit keuting na' ce gawm'euc' ce ku ing' hk'om mawn' yeut. ⁷ Ce kah peue va Petru' eun maeé Yo'han ka ing' nanggal' ri na'. Ce mhaing' ka, "Pa' ci' cu ti'ca keunhaw', muis a'nhaw' pa' yeuh ceu nang aen' ce?"

⁸ Yam awn' na, Petru' eun kue' Cit' seunga' chak' na' htonnuk. Eun lah' a ri ce, "Cawo' peue I'sarela' maeé ro'kan nang kawt na' pe', ⁹ seunyaen' pe' lawn klawng ri mhaing' ya kopti lawng yeuh ya ku' tukyak ri peue cung lu na' eun maeé hki' mhaing' pe' ya eun ci' cuin yeuh sa'nhaw' na' ko', ¹⁰ pe' ri maeé peue I'sarela' na' pe' gawm'euc' yawng ceu nang aen' na reu', peue cawng nanggal' pe' aen' pun eun ri cuin kopti meuh a muis Eun

Yesu' Hkrit peue veng Nasaraet' ku' tawk' pe' yeum pang kleum' rawng'tawp' na' Eun, daecti Peucawo' Eun kah Eun kuh' im' hawc'. ¹¹ Yesu' Eun meuh

seumu tec ce peue go' nya na',

daecti Eun meuh seumu kleum' vang reng ka nya na' hawc'."*

¹² Nang seubu a'nhaw' hkuin' kaw cang teum'kawm htut e' lawtpon pun, muis seubu kaw cang teum'kawm htut pe' lawtpon pun na' Eun hkuin' laee tuil' a ri peue ut' hk'a'ruim maot' na' peue saec' ti peue.

¹³ Yam nyu ce Petru' eun mae' Yo'han hpum' hat'han' ka na', ce yawng meuh ka peue sum'hpap un' duing rin htawm, ce am' ri ka. Hawc' ko', ce tawl' pawn tawn ut' ka mae' Yesu' Eun. ¹⁴ Kopti nyu ce peue cuin na' cawng eun keunam ka na', ce un' laee cang lah' keunhaw' bae. ¹⁵ Hawc' ko', ce kah ka pucti heul' hk'ai' vang hk'om na'. Ce sa'lit puri lah', ¹⁶ "E' ci' kaw yeuh sa'nhaw' ri peue aen' ka? Peue ut' nang veng Yeru'salaem na' pun ce ri yawng yeuh ka ku' hk'o'am' na' pucti hkaem hawc'. E' un' laee cang htu'hting' a. ¹⁷ Daecti punta kaw e' yut' lawng aen' kaw a un' laee seutuun seutan nang peue heun' na' ce na', e' kaw kah ri ham' ka un' laee kah ka lah' muis aen' a ri a'nhaw' bae."

¹⁸ Hawc' ko', ce tang klawng ka ing' ri ti bae. Ce tuil' leukah' ri ka, "Pawlaee lah', pawlaee sangsawn' peue ri muis Eun Yesu' na' bae saec' peunae'." ¹⁹ Daecti Petru' eun mae' Yo'han ka top' a ri ce, "Nanggal' Eun Peucawo' na', leuceng leukah' pe' na' lheu' leukah' Eun Peucawo' na' a ci' na' cawp' un' cawp', kuit a deut meun reu'. ²⁰ Kopti kaw ya kah ri lah' ku' pun ya ri nyu, pun ya ri mhawng' na'."

* 4:11 4:11 Suk'seun' 118:22

²¹ Hawc' ce geut' ka ri leukah' rengreng na', ce ploé ka. Kopti peue gawm'euc' na' suk'seun' ce mun' Eun Peucawo' ri lawng ku' meuh na', ce cí kaw ciyang ka yeuh sa'nhaw' na', ce un' cang kuit a deut. ²² Kopti peue pun ri cuin hk'o'am' aen', a'yu eun pun'kul' neum pai' hawc'.

Leukah' hk'o' mun' ce peue yum'

²³ Hawc' ploé ce ka na', ka tang ing' ri puri na' ce. Ka ris ce mhawng' lawng ku' lah' ce ro' peue jhawp' rit na' maeé peue nang kawt na' ce gawm'euc' ka. ²⁴ Yam pun ce ri mhawng' a na', ce uin' hpum' ri meuh ti meul' hk'o' mun' ri Peucawo' Eun, "Cawo' tí'ca keuting, meuh Mi Cawo' hpanpleng' mao', bhen' keute', mha'seumut', maeé ku' kue' hk'a'naee ka na' ce gawm'euc'. ²⁵ Cu Mi Cit' seunga' chak' lah' ri moeng eun mhai' Mi Davit' ku' meuh a'ta' keuting ye na' eun yeuhki',
'A cí meuh kop keunhaw', peue ceu na' ce vaeé se-
ungeueng'?

A cí meuh kop keunhaw', peue na' ce vaeé raen hk'a'
kan' hk'o' hk'awng'?

²⁶ Punta kaw ce ham'tap Peucawo' Eun maeé ku' lhuik'
Eun ri uin' ri lamawn na' Eun,
hkun'haw' hkam' pang bhen' keute' maeé cawo' u'pe-
ung na'
ce pong puri tiduih'.†

²⁷ Neumneum ka na' ko', punta kaw ce ham'tap mhai'
seunga' chak' ku' lhuik' Mi ri uin' ri lamawn Yesu' Eun
na', cawo' Herot' maeé cawo' Pontias' Pí'lat eun ka hk'om
puri maeé peue un' meuh peue ceu Yu'da maeé peue
ceu Í'sarela' na' ce hk'a'naee veng aen' na. ²⁸ Ku' yeuh ce
na' meuh a seun' ku' tí'ca Mi na' maeé alo Mi kuit ka a
deut a kaw meuh tang' neum leumah' na'. ²⁹ Peucawo',
maet'maen' kuit ri mhawng' leukah' geut' ce na'. Hk'o' Mi

† 4:26 4:26 Suk'seun' 2:1, 2

teum'kawm mhai' Mi na' ce ri hpum' hat'han' cang lah' ris leukah' Mi na' reu'. ³⁰ Hk'o' Mi nyat' ti' ri bai' peuyhat na' cuin. Hk'o' Mi yeuh het' keuting mae' ku' hk'o'am' ri muis Eun Yesu' mhai' seunga' chak' Mi na' Eun reu'."

³¹ Hawc' hk'o' ce mun' na', vang hk'om ce puri na' a keuyuih' keuyah'. Cit' seunga' chak' na' a nuk hk'a'naee ce gawm'euc'. Ce lah' ris leukah' Eun Peucawo' na' mae' hpum' hat'han' ri.

Peue yum' na' gvah ce vahtu' hk'il' leumuil ri na' ri puri

³² Peue yum' na' ce gawm'euc', kamkuit hpum' ce na' a meuh ti meul'. Ce un' hkvet'hkvawn vahtu' hk'il' leumuil ri puri. Daecti ku' kue' ce na' ku ceu ka, ce gvah puri.

³³ Hk'a'naee ti'ca keuting na', peue caee Eun Yesu' na' ce hkam' sa'hki' lawng Yesu' kuh' im' Eun na' laleung. Mun' sin' heun' na' a kue' ri ce ku peue. ³⁴ Nang muk ce na', a un' laee kue' nang cuthkuin' saec' ti peue. Kopti ku' kue' bhen' keute' na' ce un' lah', ku' kue' nya na' ce un' lah', ce paing' a. ³⁵ Ce ti ri ing' uin' leumuil pun ri na' mae' cung ce peue caee Eun Yesu' na'. Hawc' ko', ce gvah a hot' seun' ku' lo' ri na' ku peue ri.

³⁶ Yam awn' na, a kue' peue Levi' muis Yo'saep ut' nang kaw' kuing' Sai'plas' ti peue. Peue caee Eun Yesu' na' ce klawng eun meuh Banabas' (vangdoh' ka na' a lah' kon' tuil' kaw'l'reng). ³⁷ Eun paing' bhen' keute' ri ti bhen'. Hawc' ko', eun ti leumuil na' ing' uin' a mae' cung ce peue caee Eun Yesu' na'.

5

Anani' mae' Sahpi'ra

¹ A kue' peue muis Anani' ti peue. Beun' eun na' ka muis Sahpi'ra. Ka ku paing' bhen' keute' ri na' ti bhen' yeut.

² Eun uin' leumuil na' pun ka ti pun. Beun' eun na' ka ku

yawng a. Leumuil lheu' na' Anani' eun heul' uin' a mae' cung ce peue caee Eun Yesu' na'.

³ Petru' eun lah', "Anani', a ci' meuh kop keunhaw', Satan na' a vae' yeuh mi kuit doh' ri kaw mi chi'lai Cit' seunga' chak' na' mae' kaw mi ti ri uin' ngos bhen' keute' na' pun pa' ti pun?" ⁴ Yam un' nang paing' mi bhen' keute' awn' a na', un' meuh ka is' mi aw? Hawc' paing' mi a na', leumuil na' a ut' nang dak ti' mi, un' meuh ka aw? A ci' meuh kop keunhaw', a vae' yeuh mi kuit doh' kaw mi yeuhki'? Un' chi'lai mi peue, daecti chi'lai mi Peucawo' Eun."

⁵ Yam Anani' pun eun ri mhawng' leukah' awn' a na', eun keulawn' cung'kus yeum. Peue pun ri mhawng' lawng awn' a gawm'euc' na' ce lhat' nyawk'. ⁶ Hawc' ko', nang nhum' na' ce ing' puc ri, ce bawl' ri klawm' ri heul' puing' eun.

⁷ Hawc' awn' na hk'ao loe' nali na', beun' eun na' ka ing' rot. Ka un' nang yawng ku' meuh awn' na. ⁸ Petru' eun mhaing' ka, "Lah' ui' mhawng' a, ngos bhen' keute' paing' pa' na' meuh a peunaw' yawo aw?"

Ka top' a, "Euh, pun a peunaw'."

⁹ Petru' eun lah' a ri ka, "A ci' meuh kop keunhaw', pa' vae' hot' hpum' puri long ri nawk Cit' seunga' Eun Peucawo' na'? Keue' reu', peue heul' puing' me pa' na' ing' rot ce bawl' leuva' na' hawc'. Ce ku kaw tang klawm' pa' ri heul' yeut."

¹⁰ Beun' awn' ka keulawn' cung'kus yeum keunam cung eun Petru' na'. Yam nang nhum' na' nyu ce beun' awn' yeum ka na', ce ing' klawm' ri heul' puing' ka keunam eun me ka na'. ¹¹ Muk kon' Hkrit na' ce mae' peue pun ri mhawng' lawng aen' na gawm'euc' na' ce lhat' nyawk'.

Peue caee Eun Yesu' na' yeuh ce het' keuting mae' ku' hk'o'am' heun'

¹² Peue caee Eun Yesu' na' ce yeuh het' keuting maeé' ku' hk'o'am' nanggal' ce peue heun' na' heun' ceu. Peue yum' na' ce ing' cu hk'on' ri pang a'ras' rum eun Saw'lamon na' laleung. ¹³ Peue seubu na' ce saec' yumyam' ce nyawk', daecti ce un' hat' ri ing' pawng' ri maeé' ce saec' ti peue. ¹⁴ A saec' yeuh sa'nhaw', a kue' beun' me ing' yum' Peucawo' Eun heun' peue. Ce gawm ing' pawng' ri maeé' ce heun'. ¹⁵ Kopti peue caee eun Yesu' na' yeuh ce ku' hk'o'am' na', peue klawm' peue peuyhat na' ce nang hk'eung it' ti un' lah', pang cong ri un' lah', uin' ce nang gon' hk'a' na', punta yam Petru' long eun hk'a' na', vang leng ka a'lawng eun na' a cang pen peue peuyhat na' ce un' yawng. ¹⁶ Peue cum heun' ut' nang veng kue' keunam veng Yeru'salaem na' ce ing' cu ri. Ce va peue peuyhat maeé' peue seuca' rai lec na' ce ing'. Ce cuin gawm'euc' ri.

Peue caee Eun Yesu' na' pun ce ri hkam' ku' keunhap' nokneh

¹⁷ Yam awn' na, peue jhawp' rit keuting na' eun maeé' a'mawo eun ut' nang muk ce peue Sadu'kae' na' ce hkoe'-mang' peue caee Eun Yesu' na' ce nyawk'. ¹⁸ Ce mheut' ri seue' ce nang htawng' lhong' na'. ¹⁹ Daecti peunsum' na', in'hpom Eun Peucawo' na' eun lih tah' leuva' ka htawng' na'. Eun va ce pucti heul'. ²⁰ In'hpom na' eun lah', "Heul' cawng ri lah' ris lawng a'yu hk'u' aen' na htonnuk ri peue heun' na' ce nang kang' hkung' ka nya hk'o' mun' keuting na' reu'.

²¹ Yam ceng' ka na', ce ing' lec nang nya hk'o' mun' keuting na' seun' ku' pun ce ri mhawng' na'. Ce tang' ri sangsawn' peue.

Yam peue jhawp' rit keuting na' eun maeé' pu eun na' ing' rot ce na', ce klawng muk peue hk'om kan' na' ce hk'om puri. Muk peue hk'om kan' na' a meuh nang kawt ce peue ísarela' na' ce. Hawc' ko', ce kah peue

heul' klawng peue caee Eun Yesu' na' ce nang htawng'." ²² Daecti yam peue ko' nya hk'o' mun' keuting na' heul' rot ce nang htawng' na', ce un' laee nyu peue caee Eun Yesu' na' ce. Ce ing' lah' a, ²³ "Kawn' nyu ye htawng' na' sot a ri keutawn'. Peue ko' na' ce ku kawn' cawng ko' mae' leuva' ka na'. Daecti yam tah' ye leuva' na', ye un' laee nyu peue hk'a'naee ka saec' ti peue." ²⁴ Yam ro' peue ko' nya hk'o' mun' keuting na' eun mae' ro' peue jhawp' rit na' pun ce ri mhawng' leukah' awn' a na', ce kuit un' doh' nguikvang' lah', "Lawng aen' a ci' na' kaw tang meuh ku' yeuh sa'nhaw'?"

²⁵ Hawc' ko', peue ti peue eun ing' lah', "Keue' reu', peue hk'awng' pe' hk'a'naee htawng' na' buih cawng ce ri sangsawn' peue heun' na' ce nang kang' hkung' ka nya hk'o' mun' keuting na'." ²⁶ Yam awn' na, ro' peue ko' nya hk'o' mun' keuting na' eun mae' peue yeuh kan' na' ce heul' va peue caee Eun Yesu' na' ce ing'. Kopti lhat' ce ri peue heun' na' kaw ce dhim' ri ri seumu na', ce un' yeuh ku' reng ri ce.

²⁷ Ce va ri ing' tuil' peue caee Eun Yesu' na' ce nanggal' ce muk peue hk'om kan' na', punta peue jhawp' rit keuting na' kaw eun hki' mhaing' ce. Eun mhaing' ce, ²⁸ "Un' laee kah ye pe' cu muis aen' na sangsawn' peue saec' peunaé, daecti yeuh pe' leukah' sangsawn' ri na' nuk nang veng Yerú'salaem na' hawc'. Kopti meuh ka yeum eun peue awn' na, pe' kuit ri kaw tang cu' ku' kleuc' ri ye."

²⁹ Petru' eun mae' peue caee Eun Yesu' na' ce top' a, "Kaw ye kah ri leuceng leukah' Eun Peucawo' na' lheu' leukah' peue na'. ³⁰ Yesu' ku' tawk' pe' yeum pang kleum' rawng'tawp' na' Peucawo' a'ta' a'ya ye na' Eun yeuh Eun kuh' im' hawc'. ³¹ Punta peue Ísarela' na' kaw ce taws' hpum' fuin map' ri pun ploé' map' ri na', Peucawo' Eun yuk Yesu' Eun huk' ut' hk'a' a'tawm' ri, uin' Eun meuh Cawo'

u'peung Cawo' htut. ³² Ye meuh nang hkam' sa'hki' ka lawng aen' na. Cit' seunga' chak' Eun Peucawo' tuil' Eun ri peue leuceng leukah' Eun na' a ku hkam' sa'hki' ka yeut."

³³ Yam mhawng' ce leukah' awn' a na', ce seungeueng' nyawk'. Ce sum' toh peue caee Eun Yesu' na' ce. ³⁴ Daecti a kue' peue Hparisae' muis Gamalela' ti peue. Eun meuh nang guil leukah' ritroe, peue gawm'euc' na' ce yumyam' eun. Eun kuh' cawng nang muk ce muk peue hk'om kan' na'. Eun kah ce va peue caee Eun Yesu' na' ce pucti heul' hk'a'nok ti yam. ³⁵ Hawc' ko', eun lah', "Peue I'sarela' na' pe', kuit ri mhawng' ku' nawp pe' ri kaw yeuh ri peue aen' ce na' meulamlam ri reu'. ³⁶ Nanggal' aen' na, Htu'das' eun pucti lah' ri meuh peue keuting. Peue hot' eun na' ce kue' hk'ao pun'pak' peue. Hawc' toh peue eun na', peue hot' eun na' ce taic'jah gawm'euc' ri. ³⁷ Hawc' awn' na, Yu'das' peue Galilae' eun tang pucti hk'a'naee yam peue kuing' na' seue' ce muis ri na'. Eun va peue ti cum na' ce yeuh ku' suksak kuing'. Peue ku toh eun yeut. Peue hot' eun na' ce ku taic'jah gawm'euc' ri. ³⁸ Kop awn' na, kaw ui' tuil' kamkuit pe, pawlaee yeuh keunhaw' ri peue aen' ce, tae' ce. Kopti ku' kuit ku' yeuh ce na' a lawn meuh ku' lih neum peue ko', lak' na' a ut' a na' rai' meun. ³⁹ Daecti a lawn meuh ku' lih neum Peucawo' Eun ko', pe' hkuin' kaw ham' ce pun. Tam na' pe' cang meuh nang ham'tap Peucawo' Eun law."

⁴⁰ Ce leuceng leukah' eun na'. Hawc' ko', ce tang klawng peue caee Eun Yesu' na' ce ing'. Ce ta'veut ce, tuil' leukah' un' laee kah ce lah' muis Eun Yesu' na' bae. Hawc' ko', ce ploé' ce.

⁴¹ Peue caee Eun Yesu' na' ce ren'kawn pucti heul' hk'ai' muk peue hk'om kan' na' ce, kopti pun ce ri hkam' ku' hk'o'kaic ku' tukhka na' kopti meuh a muis awn' na. Ce sawn' a top' ngos ri nyawk'. ⁴² Ku seunyi nang kang' hkung'

ka nya hk'o' mun' keuting na' mae' nang nya na', ce sangsawn' leukah' mun' lawng Yesu' meuh Eun Hkrit na' ce un' duing keului' ri.

6

Leuk peue a' res peue

¹ Yam awn' na yam tapae' na' tawl' heun' ce na', peue Yu'da ku' jhawp' ritroe ce peue Helasa' na' ce vuin ri peue Yu'da ku' jhawp' ritroe ce peue Hebrae' na' ce. Kopti yam gvah ce ku' hk'a ku seunyi na', a'ya seunao ce na' un' pun ce ku' hk'a meulamlam ri na'. ² Kop awn' na, peue caee Eun Yesu' kul'leual' peue na' ce klawng tapae' na' ce ing' hk'om tiduih' gawm'euc'. Ce lah', "Hk'ah' ye kan' sangsawn' leukah' Eun Peucawo' na' hawc' ye yeuh kan' gvah ku' hk'a na', un' cawp' ka yeut. ³ Ec'awng' na' pe', leuk ri ti peue hk'a'naee pe' a' res peue. Ce kaw kah ri meuh ku' yawng peue, meuh ce nang kue' Cit' seunga' htonnuk, nang kue' cu'yi na'. Ye na' tuil' ce yeuh kan' awn' na. ⁴ Ye kaw hk'o' mun' yeuh kan' leukah' mun' awn' na palkoe meulamlam ri."

⁵ Ku' lah' ce na' a htuk' hpum' ce peue hk'om na' gawm'euc'. Ce leuk ku' kue' hk'a' yum' kue' Cit' seunga' htonnuk muis Satehpan na' eun, mae' Hpi'lip', Plo'hko'ras', Ni'hkan, Ti'mon, Pamenas' mae' Ni'hko'las' meuh peue veng Anhti'ok eun ing' lec ritroe ce peue Yu'da na'. ⁶ Ce va peue a' res peue aen' ce ing' ri peue caee Eun Yesu' na' ce. Hawc' tang' ce ti' ri hk'a' pang ce na', ce hk'o' mun' pun ce.

⁷ Kop awn' na, leukah' Eun Peucawo' na' a laws' pucti heul'. Tapae' nang veng Yeru'salaem na' ce gawm yao heun' nyawk'. Peue jhawp' rit heun'heun' na' ce ku ing' leuceng ri yum' yeut.

Mheut' Satehpan eun

⁸ Munhpung' tí'ca Eun Peucawó' ná' a htonnuk hk'a'naee Satehpan eun. Eun yeuh ku' hk'o'am' maeé' het' keuting ná' heun' ceu nanggal' peue. ⁹ Daecti peue muk sa'la vang hk'o' mun' muis Mhai' Pon ná' ce, meuh ce peue Yu'da ing' neum veng Sai'rin', veng Alek'sandrian, kuing' Sí'lí'sí' maeé' kuing' Asa' ná', ce htu'hting' Satehpan eun. ¹⁰ Daecti ce un' cang pe cu'yi eun ná' maeé' ku' Cit' seunga' cu' ka eun lah' ná'.

¹¹ Hawc' ko', ce ra ri sa'lit peue lah', "Pun ye ri mhawng' Satehpan lah' eun ku' un' nawpsang ri Mo'se eun maeé' Peucawó' Eun."

¹² Kop awn' na, ce heul' cu' peue kuing', nang kawt maeé' peue guil leukah' ritroe ná' ce. Hawc' ko', ce mheut' Satehpan eun. Ce va eun heul' nanggal' ce muk peue hk'om kan' ná'. ¹³ Ce pleng' ri meuh nang hkam' sa'hki' chí'lai ngon'. Ce lah', "Peue aen' lah' eun ku' un' nawpsang ri vang seunga' chak' ná' maeé' leukah' ritroe ná' un' htawt' un' deut. ¹⁴ Kopti pun ye ri mhawng' lah' eun, 'Yesu' peue veng Nasaraet' ná' kaw Eun yeuh nya hk'o' mun' aen' na lu. Rit Mo'se tuil' eun ri e' ná', Eun ku kaw plin' a yeut."

¹⁵ Peue ut' hk'a'naee muk peue hk'om kan' ná' ce gawm'euc' ce keue' ri Satehpan eun. Ce pun ri nyu buh eun ná' seun' a buh in'hpom ná' ko'.

7

Leukah' Satehpan lah' eun ri muk peue hk'om kan'

¹ Hawc' ko', peue jhawp' rit keuting ná' eun mhaing' Satehpan eun, "Seun' a ku' tang' ce ná' aw?" ² Satehpan eun top' a, "Ec'awng' maeé' nang kawt ná' pé', hk'o' pé' leuceng a. Peucawó' munhpung' keuting Eun pucti lih ri kuiing' e' Abraham eun yam kawn' ut' eun nang kuing' Meso'po'tami' nanggal' yam un' nang heul' ut' eun nang

veng Haran na'. ³ Peucawo' Eun lah', 'Tecla kuing' mi na' bae peue ceu mi na' ce, heul' vang ut' peue un' meuh peue ceu mi vang kaw Ui' tuil' mi nyu na' reu'*

⁴ Kop awn' na, eun pucti neum kuing' Hke'den na' eun heul' tang' ri ut' nang veng Haran na'. Hawc' kuiing' eun yeum eun na', Peucawo' Eun cus' eun heul' ut' vang ut' pe' maet'maen' aen' na. ⁵ Daecti sin' peun dak cung yawo, Peucawo' Eun un' tuil' a ri heun nang kuing' aen' na. Daecti Peucawo' Eun tuil' kati kaw tuil' ce is' kuing' aen' a ri heun mae' kon'hk'i eun na' ce. Saec' yam awn' na Abraham eun hkuin' nang kue' kon'. ⁶ Peucawo' Eun lah' a ri heun, 'Kon'hk'i mi na' ce kaw pun ri meuh peue leuvok nang kuing' peue. Ce kaw pun ri meuh mhai' hkam' hk'a' keunhap' nokneh rot pun'pak' neum. ⁷ Daecti Ui' kaw ciyang peue ceu ku' kah ce meuh mhai' awn' ce. Hawc' ko', kon'hk'i mi na' ce kaw pucti hk'ai' kuing' awn' na, ce na' tang ing' faee' Ui' maen'.† ⁸ Hawc' ko', Eun tuil' kati sat'ca' ton' duing' hak' na' ri Abraham eun. Hawc' awn' na, Abraham eun ku' pun kon' me muis I'cak' eun. Yam pun eun seudi' seunyi na', eun ton' duing' hak' eun. Hawc' awn' na, I'cak' eun kue' kon' me muis Yakop'. Yakop' eun meuh kuiing' ce a'ta' keuting kul'leual' peue na'.

⁹ A'ta' keuting awn' ce kopti mang' ce Yo'saep eun, ce paing' eun meuh mhai' nang kuing' E'ji'tu' na'. Daecti Peucawo' Eun ut' mae' heun. ¹⁰ Eun yeuh eun pun ri pon ku' tukhka na' gawm'euc' ka. Eun tuil' eun kue' cu'yi, kah eun pun ku' chak' neum hkun'haw'hkam' Hparaw' kuing' E'ji'tu' eun. Hkun'haw'hkam' eun tuil' eun u'peung kuing' E'ji'tu' na' gawm' haw' ri na' euc'.

¹¹ Hawc' awn' na, kuing' E'ji'tu' na' mae' kuing' Hkanan na' a rot ut' ngeup' keuting, a tukhka nyawk'. A'ta' keuting

* ^{7:3} 7:3 Yamla 12:1 † ^{7:7} 7:7 Yamla 15:13, 14

é ná ce sok ku' hk'a ku' som', ce un' pun. ¹² Yam Yakop' pun eun ri yawng nang kuing' E'ji'tu' ná kue' a ku' hk'a ku' som' ná, eun ploé' a'ta' keuting é ná ce heul' teh' pok nanggal' ná. ¹³ Yam tang heul' ce bae lal' pok ti pok ná, Yo'saep eun tuil' ec' ri ná ce yawng tu' ri ná. Hkun'haw'hkam' Hparaw' eun ku pun ri yawng lawng peue nya peue hk'ul' eun Yo'saep ná ce. ¹⁴ Hawc' kó, Yo'saep eun kah peue heul' va kuiing' ri Yakop' eun maeé' peue nya ri ná ce ing' ri ti gawm'euc'. Ce kue' a'reskul' hpawn' peue. ¹⁵ Kop awn' na, Yakop' eun ku heul' ut' nang kuing' E'ji'tu' ná. Tu' eun ná maeé' a'ta' keuting é ná ce ku yeum teh' gawm'euc' ri. ¹⁶ Peue klawm' tu' ce ná ing' nang veng Senghkeng, ing' puing' ce nang keutui' leumuic Abraham leuvaee eun hk'ai' leumuil ti meul' ri kon'hk'i eun Hamol ná ce nang veng Senghkeng ná.

¹⁷ Kati Eun Peucawo' yeuh Eun ri Abraham eun ná yam kaw a hk'aws' htonnuk ná, peue ceu é ná ce baet ri heun' nang kuing' E'ji'tu' ná nyawk'. ¹⁸ Rot ri hkun'haw'hkam' un' yawng Yo'saep eun ná yuk eun ri u'peung kuing' E'ji'tu' ná, ¹⁹ cawo' awn' eun hpum' vok' ces ri peue ceu é ná ce. Eun keunhap' a'ta' keuting é ná ce, kah ce tec o'ngak kawn' keut' ná ce yeum.

²⁰ Yam awn' na, Mo'se eun keut'. Eun kue' juik hk'ai' kon' seubu ná ce. Ce uii' eun pun loé' chí' nang nya kuiing' eun ná. ²¹ Yam heul' tec ce eun ná, kon' beun' hkun'haw'hkam' Hparaw' ná eun seut' ri uii' eun, sawn' eun meuh kon' ri. ²² Mo'se eun pun ri rin cu'yi ce peue E'ji'tu' ná gawm'euc' ka. Vang leukah' leupong eun maeé' vang yeuh eun kan' ná eun kue' tí'ca nyawk'.

²³ Yam a'yu eun pun a pun'kul' neum ná, eun kuit a deut nang hpum' ri eun kaw eo' glue ri ec'awng' peue ceu I'sarela' ri ná ce. ²⁴ Eun nyu peue E'ji'tu' ná buih keunhap' eun peue I'sarela' ná eun. Eun heul' teum'kawm peue

Ísarela' na' eun. Eun top' a tang' eun, eun toh peue E'jí'tu' na' eun. ²⁵ Eun saec' hteum' ec'awng' ri na' ce kaw yawng Peucawo' cu Eun ri eun kaw teum'kawm htut ce lawtpon na', daecti ce un' yawng a. ²⁶ Hawc' awn' na ti seunyi, Mo'se eun nyu peue Ísarela' lal' peue na' kleuc' ka puri. Eun ham' ka lah' a ri ka, 'A'mawo, meuh pa' ec'awng'. A cí yeuh keunhaw', pa' vaeé' kleuc' puri?'

²⁷ Daecti ku' buih klaee' na' eun cut' ri tec Mo'se eun. Hawc' ko', eun lah', 'A'nhaw' cí uin' mi meuh cawo' maeé' nang taws' á'mu ri ya? ²⁸ Sum' toh mi uí' seun' toh mi peue E'jí'tu' na' eun peunku' na' aw'?'‡ ²⁹ Yam Mo'se pun eun ri mhawng' leukah' awn' a na', eun hk'uih heul' nang kuing' Mí'den. Eun tang' ri ut' teh' seun' peue leuvok ko'. Eun kue' kon' me lal' peue.

³⁰ Hawc' ka pun'kul' neum na', in'hpom eun pucti ri heun nang bang' yuim ngawl ha' ka nang vang hk'oh'hk'oeng' keunam gong Sí'nai na'. ³¹ Yam Mo'se pun eun ri nyu a na', eun am' ri ka. Yam buih sat eun ri heul' nawk a de na', eun mhawng' leukah' Eun Peucawo' na' laws' ka puc ri, ³² 'Meuh Uí' Peucawo' ce a'ta' keuting mi, Peucawo' ce Abraham, Ícak' maeé' Yakop'.'§ Mo'se eun lhat' ruing, eun un' laee hat' ri keue'.

³³ Hawc' ko', Peucawo' Eun lah' a ri heun, 'Hpuic' jhaep' mi na' reu', kopti buih cawng mi pang vang seunga' chak' na'. ³⁴ Pun Uí' ri nyu ku' tukhka ku' kleh'klai' ce peue ceu Uí' na' nang kuing' E'jí'tu' na' hawc'. Pun Uí' ri mhawng' seng' nyel ce na' hawc'. Punta kaw Uí' ploé' ce pon na', Uí' lih. Ing' maen', maet'maen' kaw Uí' cus' mi keutah ing' nang kuing' E'jí'tu' na'.*

³⁵ Meuh a Mo'se aen' eun ku' peue Ísarela' na' un' sahpaw' ce eun na'. Ce lah', 'A'nhaw' cí uin' mi meuh

‡ 7:28 7:28 Pucti heul' 2:14 § 7:32 7:32 Pucti heul' 3:6 * 7:34 7:34
Pucti heul' 3:5, 7, 8, 10

cawo' mae' nang taws' a'mu?' Peucawo' cu Eun in'hpom ku' pucti ri Mo'se eun nang bang' yuim na', Eun cus' meun Mo'se eun meuh cawo' mae' nang htut ce. ³⁶ Mo'se eun teuk' va peue I'sarela' na' ce pucti hk'ai' kuing' E'ji'tu' na'. Eun yeuh ku' hk'o'am' mae' het' keuting nang mha'seumut' Seurak', nang kuing' E'ji'tu' na' mae' yam ut' ce nang vang hk'oh'hk'oeng' na' pun pun'kul' neum na'.

³⁷ Meuh a Mo'se aen' lah' eun a ri peue I'sarela' na' ce, 'Peucawo' kaw Eun cus' peue suip leukah' ri nang seun' ui' ri ti peue pun pe' lih neum hk'a'naee ec'awng' pe' na' ce.† ³⁸ Mo'se aen' ut' eun mae' muk peue na' ce nang vang hk'oh'hk'oeng' na', mae' in'hpom ku' leukah' mae' heun pang gong Si'nai na', mae' a'ta' keuting e' na' ce. Eun ku rap ri ti leukah' a'yu im' kaw suip ri to' ri ri e' heul' na' yeut.

³⁹ Daecti a'ta' keuting e' na' ce un' leuceng ri ti leukah' eun na'. Ce un' rap ri ti eun. Ce kue' hpum' sum' tang keutah ing' nang kuing' E'ji'tu' na'. ⁴⁰ Ce lah' a ri Aron eun, 'Pleng' peucawo' kaw teuk' va e' heul' hk'a' nanggal' reu'. Kopti Mo'se teuk' va eun ye neum kuing' E'ji'tu' na', un' yawng ye yeuh eun sa'nhaw'?‡ ⁴¹ Yam awn' na, ce pleng' ruphtu kon' a'moe ti tu'. Ce dum ri tan sat' na' ri ka. Ce yeuh pawe munkvaen mae' ku' pleng' meun ce ri ti' ri na'. ⁴² Daecti Peucawo' Eun eung' kui' ri ri ce. Eun taé' ce fae' ku' ceng' kue' pang mao' na'. A seun' ku' tem' ri nang htawm ce peue suip leukah' Eun Peucawo' yeuhki' na',
 'Peue I'sarela' na' pe', yam ut' pe' nang vang
 hk'oh'hk'oeng' na' pun pun'kul' neum na',
 pe' hkuin' duing dum ri tan sat' na' mae' ku' tan na'
 ri Ui'.

⁴³ Pe' klawm' tup' Molec' na'

† 7:37 7:37 Saw'n leukah' mun' 18:15 ‡ 7:40 7:40 Pucti heul' 32:1

maee' seumeueng' eun peucawo' Rehpan pe' na' hot' ri.

A meuh ruphtu pleng' pe' ri faee' heun' ceu.

Kop awn' na, Ui' kaw cus' pe' heul' meuh mhai' nang kuing' seungai[§] hk'ai' kuing' Babu'lon na'.

⁴⁴ A'ta' keuting e' na' ce ku kue' tup' kati sat'ca' nang vang hk'oh'hk'oeng' na'. A pleng' ri seun' ku' Peucawo' lah' Eun ri Mo'se pun eun ri nyu a na'. ⁴⁵ Yam pun ce tup' awn' na, hk'a'ruim vang u'peung eun Yaw'su' na', a'ta' keuting e' na' ce ku ti tup' awn' na hot' ri yam ing' lec ce kuing' ce peue un' meuh peue ceu Yu'da ku' Peucawo' ra Eun ri tec ce nanggal' ce na'. Tup' awn' na kue' rot cu eun hkun'haw'hkam' Davit' na' yeut. ⁴⁶ Hkun'haw'hkam' Davit' eun meuh peue htuk' hpum' Eun Peucawo'. Eun saec' hk'o' ri pleng' nya vang ut' Eun Peucawo' Yakop' na', ⁴⁷ daecti ku' pun ri pleng' nya pun Peucawo' Eun na' a meuh hkun'haw'hkam' Saw'lamon eun.

⁴⁸ Saec' yeuh sa'nhaw', Peucawo' Cawo' lhung' hk'ai' peue na' Eun, hpaw Eun ca' ut' nang nya pleng' peue na'. Seun' ku' lah' ce peue suip leukah' Eun Peucawo' na',

⁴⁹ 'Peucawo' Eun lah', "Kuing' pang mao' na' a meuh tenceo' Ui'.

Bhen' keute' na' a meuh vang tang' cung Ui'.

Pe' ci' kaw pleng' nya yeuh sa'nhaw' pun Ui'?

Vang keului' Ui' na', a ci' kaw meuh tawngnhaw'?

⁵⁰ Aen' ce gawm'euc', un' meuh a ku' pleng' Ui' ri ti' ri aw'?"* ,

⁵¹ Peue cing' cen', hpum' lheu' leukah' maee' yhuk' un' leuceng na' pe', pe' ku' seun' a'ta' keuting ri na' ce yeut. Ce ham'tap Cit' seungá' chak' na' laleung. ⁵² Peue suip leukah' Eun Peucawo' ku' a'ta' keuting pe' un' keunhap' ce na', a ci' kue' a'nhaw'? Saec' meuh peue tamnai lawng

§ 7:43 7:43 Amo' 5:25 * 7:50 7:50 I'saya' 66:1, 2

peue leupaws seumeu' kaw Eun lih na', a'ta' keuting pe' na' ce ku toh ce yeut. Maet' maen', pe' fuin Eun, pe' toh Eun. ⁵³ Suip pe' ri pun leukah' ritroe ri in'hpom na' ce, daecti pe' un' leuceng a."

Dhim' Satehpan eun yeum ri seumu

⁵⁴ Yam mhawng' ce leukah' awn' a na', ce seungeueng' nyawk' cet rang' ri ri Satehpan eun. ⁵⁵ Daecti Satehpan eun kue' Cit' seunga' chak' na' htonnuk. Eun mung' maot' na', eun pun ri nyu munhpung' Eun Peucawo' na' mae' Yesu' cawng Eun hk'a' a'tawm' Eun Peucawo' na'. ⁵⁶ Eun lah', "Keue' reu', pun ui' ri nyu maot' na' dah' ka, Kon' ai' peue na' buih cawng Eun hk'a' a'tawm' Eun Peucawo' na'."

⁵⁷ Yam awn' na, ce dho' yhuk' ri ti reng ri ho'hae'. Ce hk'uih ing' lec ri Satehpan eun. ⁵⁸ Ce ol' eun heul' hk'a' nok ka veng na'. Ce va puri dhim' eun ri seumu. Yam awn' na, peue hkam' sa'hki' chi'lai na' ce hpuic' ri uin' hk'o ri keunam cung eun nang nhum' muis Saw'lu na'.

⁵⁹ Yam buih dhim' ce Satehpan eun ri seumu na', Satehpan eun hk'o' mun' lah', "Cawo' Yesu', hk'o' Mi rap ri ti civit ui' na'." ⁶⁰ Hawc' ko', eun seukluin ri klawng ri lah', "Cawo', pawlaee tang' map' aen' na hk'a' pang ce." Hawc' ko', eun hpum' deut.

8

¹ Saw'lu eun ku ut' mawn'. Satehpan yeum eun na' a ku htuk' hpum' eun yeut.

Saw'lu keunhap' eun muk kon' Hkrit na' ce

Yam awn' na, hk'a' keunhap' keuting na' a keut' kue' ri muk kon' Hkrit ut' nang veng Yeru'salaem na' ce. A lawn un' meuh peue caee Eun Yesu' na' ce ko', muk kon' Hkrit na' ce gawm'euc' ce taic'jah hk'uih heul' ut' nang kuing' Yu'da na' mae' kuing' Samari' na' ku duih' ka. ² Peue

yumyam' Peucawo' Eun na' ce heul' puing' Satehpan eun, ce aec'rak yam eun nyawk'. ³ Daecti Saw'lu eun tang' ri yeuh muk kon' Hkrit na' ce lu. Eun eo' ri lec nya na' ti nya hawc' ti nya. Eun yat ri heul' seue' beun' me na' ce nang htawng'.

Leukah' mun' ren'kawn na' laws' a heul' nang kuing' Samari'

⁴ Peue taic'jah hk'uih heul' na' ce heul' sangsawn' leukah' mun' ren'kawn na' vang heul' ri na' ku duih' ka. ⁵ Hpi'lip' eun lih sangsawn' lawng Eun Hkrit na' nang kuing' Samari' na' ti veng. ⁶ Yam peue heun' na' pun ce ri mhawng' ku sangsawn' eun na' mae' het' keuting yeuh eun na', ce leuceng leukah' eun na' meulamlam ri gawm'euc'. ⁷ Seuca' rai na' a aec'rak pucti heul' hk'ai' peue heun' peue. Peue ti' cung chuing' na' mae' peue lucat na' ce ku cuin heun' peue. ⁸ Kop awn' na, nang veng awn' a kue' ku ren'kawn heun' nyawk'.

Si'mon peue yeuh kahta'

⁹ Nang veng awn' na, a kue' peue muis Si'mon ti peue. Tang' neum nanggal' aen' na, eun yeuh kahta'. Eun yeuh peue Samari' na' ce gawm'euc' ce am' ri ku yeuh ri na'. Eun tang' meun ri meuh peue keuting lhung'. ¹⁰ Saec' meuh peue sum'hpap peue kue' muis na' ce ku leuceng leukah' eun na'. Ce suk'seun' lah', "Peue aen' meuh eun peue ti'ca keuting Eun Peucawo', klawng eun muis 'Ti'ca Keuting.'" ¹¹ Kopti am' ce ri kahta' yeuh eun na' ling' hawc' na', ce hot' eun. ¹² Daecti yam Hpi'lip' sangsawn' eun ce ri leukah' mun' ren'kawn lawng kuing' Eun Peucawo' na' mae' muis Eun Yesu' Hkrit na', ce ku yum' Hpi'lip' eun. Ce rap ri ti hk'a' cum' na' gawm' beun' gawm' me ri. ¹³ Saec' meuh Si'mon eun ku yum', eun rap ri ti hk'a' cum' na'. Eun hot'

Hpi'lip' eun heul' ku duih'. Eun am' ri het' keuting maeé' ku' hk'o'am' nyu ri na' ce nyawk'.

¹⁴ Yam peue caee Eun Yesu' ut' nang veng Yeru'salaem na' pun ce ri mhawng' lawng peue Samari' na' rap ce ri ti leukah' Eun Peucawo' na' hawc' na', ce cus' Petru' eun maeé' Yo'han ka heul' ri ce. ¹⁵ Yam heul' rot ka na', ka hk'o' mun' pun kaw ce pun Cit' seunga' chak' na', ¹⁶ kopti Cit' seunga' chak' na' un' nang lih a hk'a'pang ce saec' ti peue, kaw'n' rap ce ri ti yawo hk'a' cum' na' hk'a'naee muis Eun Yesu' na' palkoe. ¹⁷ Hawc' ko', Petru' eun maeé' Yo'han ka tang' ti' ri hk'a'pang ce. Ce pun Cit' seunga' chak' na'.

¹⁸ Kopti peue caee Eun Yesu' na' tang' ka ti' ri ce pun Cit' seunga' chak' na', yam Si'mon pun eun ri nyu a na', eun ing' mhaing' ri tuil' leumuil ri ka. ¹⁹ Eun lah', "Punta peue tang' ui' ti' ri hk'a'pang ce ku peue na' kaw ce pun Cit' seunga' chak' na', hk'o' pa' tuil' ti'ca aen' na ri ui' yeut."

²⁰ Petru' eun top' a, "Kopti kuit mi ri kaw cang leuvaee lapsawng' Eun Peucawo' na' hk'ai' leumuil na', kah leumuil mi na' lu maeé' tu' mi na' reu'. ²¹ Kopti hpum' mi na' un' seumeu' ka nanggal' Eun Peucawo' na', kaw mi pawng' ri yeuh kan' aen' a un' kue' pun mi. ²² Ku' rai aen' a taws' hpum' fuin map' mi ri ka, hawc' ko' hk'o' mun' ri Peucawo' Eun reu'. Na' Eun ploé' map' ku' kuit mi nang hpum' ri yeuhki' na' un' yawng. ²³ Kopti pun ui' ri nyu ku' hkoé'mang' na' nuk a hk'a'naee mi na', map' na' a mawt mi."

²⁴ Hawc' ko', Si'mon eun top' a, "Punta ku' lah' pa' na' kaw a un' cang rot pang ui' saec' ti ceu na', hk'o' mun' pun ui' ri Peucawo' Eun reu'."

²⁵ Yam Petru' eun maeé' Yo'han hkam' ka sa'hki' sangsawn' leukah' Eun Peucawo' hawc' na', ka keutah ing' huk' nang veng Yeru'salaem. Yam hot' ka hk'a' ing' na', ka

sangsawn' leukah' mun' ren'kawn na' nang yung' ce peue Samari' na' heun' yung' ing'.

Hpi'lip' eun mae' ro' roksa' vahtu' hk'il' leumuil peue kuing' Ehti'opya

²⁶ Yam awn' na, in'hpom Eun Peucawo' na' eun tuil' leukah' ri Hpi'lip' eun, "Lih hon' hk'a'col, lih ri hk'a' un' kue' peue ut' heul' ri veng Yeru'salaem a heul' doh' ri veng Gasa na' reu'." ²⁷ Kop awn' na, Hpi'lip' eun pucti heul'. Lang' hk'a' na', eun heul' hk'eup' peue kuing' Ehti'opya ti peue. Peue awn' eun meuh peue tawn' ri. Eun meuh ro' roksa' vahtu' hk'il' leumuil ka nang' haw' hkam' kuing' Ehti'opya muis Kandas na'. Eun ing' neum heul' faee' ri nang veng Yeru'salaem na'. ²⁸ Yam buih ing' eun na', eun mok' ri lip htawm peue suip leukah' Eun Peucawo' htawm I'saya' na' nang law ka rawng ri na'. ²⁹ Cit' seunga' na' a lah' a ri Hpi'lip' eun, "Heul' ri keunam ka law ka rawng teh' a reu'."

³⁰ Kop awn' na, Hpi'lip' eun hk'uih heul' keunam ka law ka rawng na'. Eun mhawng' seng' peue lip eun htawm peue suip leukah' Eun Peucawo' htawm I'saya' na'. Eun mhaing' eun, "Lak' yawng mi ku' lah' ka htawm lip mi aen' na aw?"

³¹ Eun top' a, "Peue lawn un' ris ui' mhawng' vangdoh' ka na' ko', ui' ci' kaw cang yawng a yeuh sa'nhaw'?" Hawc' ko', eun klawng Hpi'lip' eun huk' mok' mae' ti nang law na'.

³² Htawm Seunga' buih lip eun na' a meuh ton aen' na, "Teuk' Eun heul' seun' kon'yung' kaw nghawm' ri na'.

Seun' kon'yung' na' dit' a ri ri peue cip' huik' ri na' eun,

Eun ku un' ang' moeng ri.

³³ Yam hkam' Eun ku' keunhap' peue ri na',

Eun hkam' a' mu un' cawp' un' seumeu' na'.

Eun hkuin' kue' ceucat, kopti tec peue a'yu Eun hk'ai'
bhen' keute' na' hawc'."*

³⁴ Ro' roksa' vahtu' hk'il' leumuil na' eun mhaing' Hpi'lip' eun, "Hk'o' mi lah' ui' mhawng' a, peue suip leukah' Eun Peucawo' aen' eun ci' buih lah' lawng a'nhaw', lah' eun lawng tu' ri na' meun aw, a'ko' lah' eun lawng nang seubu ti ri peue aw?" ³⁵ Kop awn' na, Hpi'lip' eun tang' a ri htawm Seunga' ton aen' na eun lah' ris leukah' mun' ren'kawn lawng Eun Yesu' na' ri heun.

³⁶ Yam buih hot' ka hk'a' heul' na', ka rot vang kue' leuum' ti duih' na'. Ro' roksa' vahtu' hk'il' leumuil na' eun lah', "Keue' reu', mawn' na' kue' a leuum'. A ci' kue' keunhaw' kaw un' kah ui' rap ri ti hk'a' cum' na'?"†

³⁸ Hawc' ko', eun kah law na' kuit'. Hpi'lip' eun mae' ro' roksa' vahtu' hk'il' leumuil na' eun ka lih lec nang leuum' na'. Hpi'lip' eun tuil' hk'a' cum' ri heun. ³⁹ Yam puc ka ri hk'ai' leuum' na', Cit' seunga' Eun Peucawo' na' a keulawn' ti Hpi'lip' eun heul'. Ro' roksa' vahtu' hk'il' leumuil na' eun un' laee nyu eun. Daecti, eun tang ren'kawn suip hk'a' ri na' heul'. ⁴⁰ Saec' yeuh sa'nhaw', peue nyu Hpi'lip' eun nang veng Asotas' na'. Eun heul' sangsawn' leukah' mun' ren'kawn nang veng na' ku duih' rot ri veng Kae'sari' na'.

9

Saw'lu ing' meuh eun peue yum'

¹ Hk'a'naee yam awn' na, Saw'lu eun blih' ri lah' ri kaw toh tapae' Eun Peucawo' na' ce. Eun heul' ri peue jhawp' rit keuting na' eun. ² Punta kaw eun mheut' ri va ku' pun eun ri hk'eup' beun' me hot' hk'a' ka ritroe aen' a na' ce ing'

* **8:33** 8:33 I'saya' 53:7, 8 † **8:36** 8:36 Nang htawm Seunga' seubu na' kue' a nambat aet' aen' na yeut. ³⁷ Hpi'lip' eun lah', "Mi lawn yum' nang hpum' ri gawm'euc' ko', mi kaw pen' rap ri ti hk'a' cum' na' yeut." Eun top' a, "Yum' ui' Yesu' Hkrit meuh Eun Kon' ai' Eun Peucawo'."

nang veng Yeru'salaem seun' peue htawng' na', eun heul' hk'o' lai kaw eun tuil' a ri sa'la vang hk'o' mun' kue' nang veng Damas'kas' na' ku duih' ka. ³ Yam Saw'lu buih kaw eun hk'aws' heul' rot nang veng Damas'kas' na', a keulawn' kue' ku' ceng' lih neum pang mao' na', a htawng' eun rop. ⁴ Eun cung'kus pang keute' na'. Eun pun ri mhawng' leukah' na' lah' ka a ri ti, "Saw'lu, Saw'lu, a ci' meuh kop keunhaw', mi vae' keunhap' Ui'?"

⁵ Saw'lu eun mhaing' Eun, "Cawo', Mi ci' meuh a'n-haw'?" Cawo' Eun top' a, "Meuh Ui' Yesu' ku' buih keunhap' mi na' Eun. ⁶ Maet'maen', kuh' ing' lec nang veng na' reu'. Mi kaw htuk' ri yeuh sa'nhaw' na', a kaw kue' peue lah' a ri mi."

⁷ Peue hot' Saw'lu eun heul' na' ce cawng di'ti mawn', ce un' cang leukah'. Ce saec' mhawng' leukah' awn' a na', daecti ce un' nyu a'nhaw' saec' ti peue. ⁸ Saw'lu eun kuh'. Daecti yam plang' eun ngai' ri na', eun un' nyu keunhaw' saec' ti ceu. Kop awn' na, ce teuk' ti' eun na' heul' lec nang veng Damas'kas' na'. ⁹ Eun ngai' fec'. Eun un' laee hk'asom' pun loe' seunyi.

¹⁰ Nang veng Damas'kas' na' a kue' tapae' ti peue, eun muis Anani'. Peucawo' Eun klawng Anani' eun nang limit na', "Anani'."

Eun top' a, "Euh', Cawo'."

¹¹ Peucawo' Eun lah' a ri heun, "Kuh' long hk'a' heul' ri nya eun Yu'das' hk'a' lah' peue meuh hk'a' seumeu' na' reu'. Hawc' ko', heul' mhaing' ri sok peue muis Saw'lu peue veng Tarsas' na' eun. Kopti buih hk'o' eun mun'. ¹² Hk'a'naee limit eun na', punta ngai' eun na' kaw a ceng' bae' na', eun nyu peue muis Anani' tang' eun ti' ri hk'a' pang ri."

¹³ Anani' eun top' a, "Cawo', pun ui' ri mhawng' lawng eun peue aen' a mae' ku' rai yeuh eun ri peue Mi nang

veng Yeru'salaem na' heun' ceu hawc'. ¹⁴ Punta kaw eun mawt ri ti peue klawng muis Mi na' ce gawm'euc' na', eun ing' nang ti'ca eun peue jhawp' rit keuting na' maen'."

¹⁵ Daecti Peucawo' Eun lah' a ri Anani' eun, "Heul' yawo reu', punta kaw eun ti muis Ui' na' heul' ri peue un' meuh peue ceu Yu'da na' mae' hkun'haw' hkam' ce na' mae' peue I'sarela' na' ce, peue aen' meuh eun hk'eung leuk Ui' ri uin' hawc'. ¹⁶ Kopti meuh a muis Ui' na', eun kaw pun ri tukhka a'neng, Ui' kaw yeuh eun nyu a."

¹⁷ Hawc' ko', Anani' eun heul' ri nya awn' na. Eun heul' lec' nya na'. Eun tang' ti' ri hk'a' pang Saw'lu eun. Eun lah', "Awng' ui' Saw'lu, punta kaw mi nyu hk'a' ri bae mae' punta Cit' seunga' na' kaw a htonnuk hk'a' nae mi na', Yesu' ku' tuil' mi nyu ri lang' hk'a' yam buih ing' mi maen' na' Eun, cus' Eun ui' ing' ri mi." ¹⁸ A keulawn' kue' ku' seun' gop' bhuic' hk'ai' ngai' eun Saw'lu na', eun tawl' nyu hk'a' ri bae. Eun kuh' rap ri ti hk'a' cum'. ¹⁹ Hawc' hk'asom' eun na', eun tang' kue' kaw' reng bae.

Saw'lu ut' eun nang veng Damas'kas'

Saw'lu eun ut' mae' tapae' na' ce nang veng Damas'kas' na' heun' seunyi. ²⁰ Eun keulawn' tang' ri sangsawn' lawng Yesu' meuh Eun Kon' ai' Eun Peucawo' na' nang sa'la vang hk'o' mun' na' ce. ²¹ Peue pun ri mhawng' a na' ce am' gawm'euc'. Ce lah', "Peue aen' meuh eun ku' yeuh peue klawng muis Eun Yesu' nang veng Yeru'salaem na' ce lu na', un' meuh ka aw? Punta kaw eun mheut' ri va peue awn' ce heul' ri ro' peue jhawp' rit na' ce seun' peue htawng' na' ko', eun ing' maen', un' meuh ka aw?" ²² Daecti hk'a' civit eun Saw'lu na' a gawm' ut' gawm' keuting. Eun yeuh peue Yu'da ut' nang veng Damas'kas' na' ce mawo, ce un' laee cang htu' hting' ri ku' tuil' eun ce nyu sa' hki' ka lawng Yesu' meuh Eun Hkrit na'.

²³ Yam pon a ing' heun' seunyi na', peue Yu'da na' ce sa'lit puri kaw toh Saw'lu eun. ²⁴ Daecti Saw'lu eun pun ri yawng kan' sa'lit ce puri na'. Punta peue Yu'da na' kaw ce toh eun na', ce ko' nang leuva' ka veng na' gawm' sum' gawm' seunyi. ²⁵ Daecti tapae' eun Saw'lu na' ce va eun pucti heul' peunsum'. Ce seue' eun nang a'hk'uip, ce ruic' eun hk'a' keutui' ka hkui veng na'.

Saw'lu ut' eun nang veng Yeru'salaem

²⁶ Yam Saw'lu ing' rot eun nang veng Yeru'salaem na', eun co'ca' ri kaw ing' pawng' ri mae' tapae' na' ce. Daecti ce lhat' ri heun gawm'euc', ce un' yum' meuh eun tapae' neumneum. ²⁷ Daecti Banabas' eun va eun heul' hk'eup' peue caee Eun Yesu' na' ce. Lawng Saw'lu nyu eun Yesu' Eun lang'hk'a' na' mae' lawng Yesu' leukah' Eun mae' heun yeuh sa'nhaw' na', mae' lawng cu eun muis Eun Yesu' na' eun sangsawn' leukah' mun' ri hpum' hat'han' ri nang veng Damas'kas' na' yeuh sa'nhaw' na', Banabas' eun ris ce mhawng' a. ²⁸ Kop awn' na, Saw'lu eun pun ri ut' mae' ce. Eun un' laee hki'keung lec lih nang veng Yeru'salaem na'. Eun leukah' hk'a'naee muis Eun Peucawo' ri hpum' hat'han' ri. ²⁹ Eun htu'hting' peue Yu'da ku' lah' leukah' Helasa' na' ce, daecti ce co'ca' ri kaw toh eun. ³⁰ Yam ec'awng' na' yawng ce lawng awn' a na', ce va Saw'lu eun heul' nang veng Kae'sari' na'. Hawc' ko', ce suip eun ri reu ing' rot nang veng Tarsas' na'.

³¹ Hawc' awn' na, muk kon' Hkrit ut' nang kuing' Yu'da, kuing' Galilae' mae' kuing' Samari' na' ce ku duih', ce kue' hk'a' kuit nyawk' kuit sam'ran. Cit' seunga' chak' na' a tuil' kaw'l'reng ce. Ce reng keuting. Ce lhat'til ri Peucawo' Eun, ce baet ri heun'.

Bai' Ai'nes eun cuin

³² Yam Petru' heul' eun ti duih' hawc' ti duih' na', eun heul' glue ri peue Eun Peucawo' ut' nang veng Li'da na' ce. ³³ Mawn' na', eun pun ri nyu peue muis Ai'nes ti peue. Eun ti' cung chuing'. Eun it' ri vang it' ri na' pun seudi' neum. ³⁴ Petru' eun lah' a ri heun, "Ai'nes, Yesu' Hkrit bai' Eun mi cuin, kuh' top hk'eung it' mi na' reu'." Eun ku keulawn' kuh'. ³⁵ Peue ut' nang veng Li'da na' ce mae'e' peue ut' nang keuleung ka Saron na' ce gawm'euc' ce pun ri nyu peue awn' eun. Ce plin' hpum' ri ing' hk'a' Eun Peucawo' na'.

Dawkas tang kuh' im' ka

³⁶ Nang veng Yu'pe na', a kue' tapae' beun' ti peue muis Tabi'hta' (leukah' Helasa' ka, a meuh Dawkas). Ka yeuh kan' chak' na' mae'e' ka teum'kawm peue hk'o'tukyak na' ce laleung. ³⁷ Yam awn' na, ka peuyhat, ka yeum. Ce huim' tu' yeum ka na', ce uin' ka nang hkawng htan hk'a'tuh na'. ³⁸ Veng Li'da na' a de veng Yu'pe na'. Kop awn' na yam tapae' na' mhawng' ce Petru' ut' eun nang veng Li'da na', ce cus' me lal' peue na' ka heul' hk'o'hk'ang eun. Ka lah', "Keulawn' hot' ya heul' vaevae."

³⁹ Petru' eun hot' ka heul'. Yam ing' rot ce na', ce va Petru' eun huk' nang hkawng htan hk'a'tuh na'. Beun' seunao na' ce rop Petru' eun. Ce yam, ce tuil' Petru' eun nawk hk'eung cing ka Dawkas yam kawm' ut' ka na'.

⁴⁰ Petru' eun kah ce pucti lih hk'ai' hkawng na' gawm'euc' ri. Hawc' ko', eun seukluin ri hk'o' mun'. Eun hpawt' ri hk'a' ka peue yeum na'. Eun lah', "Tabi'hta', kuh' reu'." Beun' awn' ka plang' ngai' ri na'. Yam nyu ka Petru' eun na', ka kuh' mok'. ⁴¹ Petru' eun jhawp' ti' ka na', eun vuh ka kuh' cawng. Hawc' ko', eun klawng peue yum' mae'e' beun' seunao na' ce ing'. Eun ap beun' tang kuh' im' awn' ka ri ce. ⁴² Lawng aen' a seutuin seutan nang veng Yu'pe na' ku duih' ka. Peue heun' na' ce ing' yum' Peucawo' Eun. ⁴³ Petru' eun ut' mae'e' Si'mon ku' meuh

peue pleng' hak' na' meuh hk'eung lo' na' eun nang veng Yu'pe na' heun' seunyi.

10

Petru' eun mae' Kawneli'

¹ Nang veng Kaesari' na' kue' a po' suik' ti peue muis Kawneli'. Eun ut' nang tawp lah' peue meuh Muk Suik' It'tali na'. ² Heun ri mae' peue nya peue hk'ul' eun na' ce gawm'euc' ce meuh peue tam' mun' tam' sin' ri lhat'til ri Peucawo' Eun. Eun hpum' vah teum'kawm peue hk'o'tukyak na' ce. Eun hk'o' mun' ri Peucawo' Eun laleung. ³ A kue' ti seunyi yam meuh a hk'ao loe' nali hk'a'pul na', nang limit eun na' eun pun ri nyu in'hpom Eun Peucawo' ti peue meulamlam ri. In'hpom na' eun lih ri heun, eun lah', "Kawneli'."

⁴ Kawneli' eun seuluil' eun mae' lhat' ri. Eun mhaing' eun, "Cawo', a ci' meuh keunhaw'?"

In'hpom na' eun top' a, "Seng' hk'o' mi mun' na' mae' hk'a' teum'kawm mi peue hk'o'tukyak na' huk' rot a nanggal' Eun Peucawo' seun' meuh a ku' tan kuit rot ri mi na' hawc'. ⁵ Maet'maen' cus' peue heul' nang veng Yu'pe, heul' va peue muis Simon' ku' klawng peue meuh Petru' na' eun ing' reu'. ⁶ Buih ut' eun nang nya eun Simon' ku' meuh nang pleng' hak' na'. Nya eun na' a ut' keunam ka mha'seumut' na'."

⁷ Yam in'hpom ku' leukah' mae' heun na' keutah eun ing' na', Kawneli' eun klawng mhai' lal' peue mae' peue suik' meuh mhai' eun ku' meuh peue tam' mun' tam' sin' ti peue na' ce ing'. ⁸ Eun ris lawng ku' meuh ku' ceu na' ri ce. Hawc' ko', eun kah ce heul' nang veng Yu'pe na'.

Limit eun Petru'

⁹ Hawc' ka na' ti seunyi yam meuh a hk'ao peunnyi keuting na', yam peue awn' kaw ce hk'aws' heul' rot

keunam veng Yu'pe na', punta Petru' kaw eun hk'o' mun' na', eun huk' ri htan keuleung ka seubul nya na'. ¹⁰ Eun kluit', eun sum' hk'a ku' hk'a. Yam buih rangraen ce ku' hk'a na', eun pun ri nyu limit. ¹¹ Eun nyu mao' na' dah' ka. Ku' seun' hpen' keuting mawt ce' ri pun' plak' na' a ruic' ri lih pang bhen' keute' na'. ¹² Hk'a'naee ka na' a kue' sat' cung pun' plak', sat' muilmal sat' leun ri pang bhen' keute' na' mae' sim' peul' eo' nang vawo na' ce ku ceu ka. ¹³ Hawc' ko', a kue' seng' ti seng' lah' a ri heun, "Petru', kuh' nghawm' mi hk'a pawn' a reu'."

¹⁴ Petru' eun top' a, "Uih' Cawo', un' duing hk'a ui' ku' hk'aw'jeuk ku' un' seunga' na' saec' ti pok."

¹⁵ Seng' na' a lah' a ri heun lal' pok ti pok, "Ku' Peucawo' saic' Eun seunga' hawc' na', pawlaee lah' a meuh ku' hk'aw'jeuk."

¹⁶ A meuh seun' awn' na hton loe' pok ka na', hpen' keuting awn' na keulawn' ti ri keutah huk' pang mao'.

¹⁷ Yam Petru' buih mawo eun ri vangdoh' ka limit aen' na, peue eun Kawneli' cus' eun heul' na' ce sok ri nyu nya eun Si'mon na'. Ce cawng keunam bawl' leuva' na'. ¹⁸ Ce klawng ri mhaing' lah', "Si'mon ku' lah' peue meuh Petru' na' ut' eun maen' aw?"

¹⁹ Yam Petru' buih kuit eun lawng limit na', Cit' seunga' na' a lah' a ri heun, "Si'mon, peue loe' peue na' buih sok ce mi. ²⁰ Kop awn' na, kuh' lih hk'a'col reu'. Pawlaee kangkae ri kaw mi heul' mae' ce, kopti cus' ui' ce ing' ri mi."

²¹ Petru' eun lih. Eun lah' a ri ce, "Peue sok pe' na' meuh a ui' ri hawc'. A ci' meuh kop keunhaw', pe' vae' ing' maen'?"

²² Ce top' a, "Ing' ye neum po' suik' Kawneli' eun. Meuh eun peue leupaws seumeu' lhat' til ri Peucawo' Eun. Eun ku meuh ku' peue Yu'da na' hkopyawm' yumyam' ce gawm'euc'. Punta kaw eun leuceng leukah' mi na',

in'hpom seungá chak' ná eun lih kah eun heul' pang' mi ing' ti nya eun ná."

Petru' eun nang nya eun Kawneli'

²³ Hawc' ko', Petru' eun rap ri ti ce ing' meuh chec' ri nang nya ná. Hawc' ka ná ti seunyi, Petru' eun tang heul' maeé ce. Ec'awng' ut' nang veng Yu'pe ná ce ngon' ce ku hot' eun heul' yeut. ²⁴ Hawc' ka ná ti seunyi, Petru' eun ing' rot nang veng Kae'sari' ná. Kawneli' eun buih ko' ri rap ri ti ce. Eun pang' ec'awng' maeé a'mawo ri ná ce hk'on' ri. ²⁵ Yam Petru' ing' lec eun nya ná, Kawneli' eun hk'eup' eun. Eun nghup' ri keunam cung eun Petru' ná maeé hkopyawm' ri. ²⁶ Daecti Petru' eun teuk' eun kuh'. Eun lah', "Kuh' cawng reu', uí ri, uí ku meuh peue yeut."

²⁷ Yam Petru' u ka puri ing' lec nang nya ná, eun pun ri nyu peue heun' ná cu ce ri. ²⁸ Petru' eun lah' a ri ce, "Peue Yu'da ti peue ná eun lawn yeuh a'mawo ri peue un' meuh peue ceu Yu'da ná ko', a'ko' glue ri heun ko', pé ku yawng kleuc' eun ritroe ri ná. Daecti punta kaw uí un' htuk' ri klawng peue ti ri peue eun meuh peue hk'aw'jeuk peue un' seungá ná, Peucawo' tuil' Eun uí nyu a hawc'. ²⁹ Kop awn' na yam pang' pé uí ing' ná, uí ku un' laee plo'h'pleh' ri, uí ing'. Uí sum' mhaing' pé, 'A cí meuh kop keunhaw', pé vaeé heul' pang' uí ing'?"

³⁰ Kawneli' eun top' a, "Yam pon a ing' pun' seunyi ná, yam buih hk'o' uí mun' ti nya yam hk'a'pul loe' nali yam maet'maen' aen' na, a keulawn' kue' peue cuip' hk'eung ceng' ti peue, eun cawng nanggal' uí ná. ³¹ Eun lah', 'Kawneli', Peucawo' mhawng' Eun seng' hk'o' mi mun' ná maeé kuit rot Eun ri ku' teum'kawm mi peue hk'o'tukyak ná ce hawc'. ³² Cus' peue heul' nang veng Yu'pe ná, heul' va peue muis Sí'mon ku' klawng peue meuh Petru' ná eun ing' reu'. Buih ut' eun nang nya eun Sí'mon ku' meuh

nang pleng' hak' na' eun. Nya eun na' a ut' keunam ka mha'seumut' na'.³³ Kop awn' na, uí' keulawn' cus' peue ri na' ce heul' pang' mi. Mun' keuting ri ing' mi. Punta kaw ye leuceng ku' Peucawo' kah Eun mi lah' ri ye na' ce ku ceu ka na', maet'maen' ye ut' nanggal' Eun Peucawo' gawm'euc' ri hawc'."

³⁴ Hawc' ko', Petru' eun tang' ri lah', "Maet'maen', pun uí' ri ceng' ri Peucawo' un' keue' Eun ri vang ces vang leumeus' ri peue neumneum hawc'.³⁵ Daecti Eun rap ri ti peue ceu ku ceu ku' lhat'til ri Heun na' maeé' ku' yeuh ku' leupaws seumeu' na' ce.³⁶ Pe' ku yawng lawng leukah' tuil' Eun ri peue I'sarela' na' ce. A meuh leukah' mun' ren'kawn to' ri hk'a' kuit nyawk' kuit sam'ran cumyen' ku' suip ri ris ri neum Yesu' Hkrit meuh Eun Peucawo' peue gawm'euc' na'.³⁷ Pe' ku yawng lawng ku' meuh nang kuing' Yu'da tang' neum kuing' Galilae' na' ku duih' hk'a'kui' hawc' ka tuil' hk'a' cum' sangsawn' eun Yo'han na'.³⁸ A meuh lawng Peucawo' tang' Eun ri uin' Yesu' peue veng Nasaraet' na' Eun ri cu Eun Cit' seunga' chak' na' maeé' ti'ca ri na', maeé' lawng heul' Eun ti duih' hawc' ti duih', Eun yeuh ku' chak' maeé' bai' Eun peue ut' hk'a'ruim ti'ca ka Satan na' ce ku peue ri, kopti Peucawo' ut' Eun maeé' Heun.

³⁹ Ye meuh nang hkam' sa'hki' ka ku' yeuh Eun nang kuing' ce peue Yu'da na' maeé' nang veng Yeru'salaem na' ku ceu ka. Ce toh ri tuik' Eun hk'a'pang kleum' hku'.⁴⁰ Daecti loe' seunyi ka na', Peucawo' Eun tang yeuh Eun kuh' im', Eun tuil' peue nyu tu' ri na'.⁴¹ Peue hkuin' caee ri nyu Eun gawm'euc'. Ku' Peucawo' leuk Eun ri uin' ce kaw meuh nang hkam' sa'hki' na' ce nyu Eun koe. Peue aen' meuh a ye ri, ye hk'asom' maeé' Heun hawc' kuh' im' Eun hk'ai' hk'a' yeum ri na'.⁴² Eun tuil' leukah' ri ye, kah ye sangsawn' leukah' mun' ren'kawn na' ri peue heun' na' ce. Eun kah ye meuh nang hkam' sa'hki' ka lawng meuh

Eun ku' Peucawo' tang' Eun Eun meuh nang taws' a' mu ri peue im' mae' peue yeum na' ce. ⁴³ Peue suip leukah' Eun Peucawo' na' ce gawm' euc' ce hkam' sa' hki' ka lawng Eun na'. Ce lah', 'Peue yum' Eun na' ce ku peue kaw ce pun plo'e' map' ri muis Eun na'.' ”

⁴⁴ Yam Petru' buih lah' eun leukah' aen' a na', Cit' seunga' chak' na' a lih hk'a' pang peue pun ri mhawng' leukah' aen' a na' ce gawm' euc' ri. ⁴⁵ Peue yum' ce ton' duing' hak' ri hawc' ku' hot' Petru' eun na' ce am' nyawk' ri Peucawo' Eun ku vae' buit Cit' seunga' chak' na' lih hk'a' pang peue un' meuh peue ceu Yu'da na' ce. ⁴⁶ Kopti pun ce ri mhawng' peue awn' lah' ce leukah' peue ceu heun' ceu suk' seun' Peucawo' Eun na'.

Hawc' ko', Petru' eun lah', ⁴⁷ “Peue aen' kaw ce un' pun ri rap ri ti hk'a' cum' ri leuum' na', a' nhaw' ci' kaw ham' tap ce? Ce ku pun Cit' seunga' chak' na' seun' ye ri yeut.” ⁴⁸ Kop awn' na, Petru' eun kah ce rap ri ti hk'a' cum' na' hk'a' naee muis Eun Yesu' Hkrit na'. Hawc' ko', ce hk'o' Petru' eun ut' mae' ti lal' loe' seunyi.

11

Petru' eun ris ce mhawng' lawng ku' yeuh ri

¹ Peue caee Eun Yesu' na' mae' ec' awng' ut' nang kuing' Yu'da na' ce ku duih' ce pun ri mhawng' lawng peue un' meuh peue ceu Yu'da na' ce ku rap ri ti leukah' Eun Peucawo' na'. ² Kop awn' na yam Petru' huk' eun nang veng Yeru' salaem na', peue Yu'da yum' pun ri ton' duing' hak' ri na' ce ram ri heun. ³ Ce lah', “Lec mi nang nya ce peue un' meuh peue ceu Yu'da na', mi hk'asom' mae' ce.”

⁴ Kop awn' na, Petru' eun lah' ris lawng ti ceu hawc' ti ceu na' tang' neum yamla ka na' ri ce. Eun lah' a, ⁵ “Yam buih hk'o' ui' mun' nang veng Yu'pe na', ui' pun ri nyu limit. Ku' seun' hpen' keuting mawt ce' ri pun' plak' na'

a ruic' ri lih neum pang maó na' lih ri vang ut' ui' na'.
⁶ Yam seuluil' ui' hk'a'naee ka na', ui' pun ri nyu sat' cung
 pun' plak' ka pang bhen' keute' na', sat' nang hk'i, sat'
 muilmal sat' leun ri na' maeé sim' peul' eo' nang vawo na'
 ce. ⁷ Hawc' ko', ui' pun ri mhawng' seng' na' lah' ka a ri ui',
 'Petru', kuh' nghawm' mi hk'a' pawn' a reu'.

⁸ Ui' top' a, 'Uih' Cawo', ku' hk'aw'jeuk maeé ku' un'
 seunga' na' un' duing lec a moeng ui' na' saec' ti pok.'

⁹ Seng' na' a tang laws' neum pang maó na' lal' pok ti
 pok, 'Ku' Peucawo' saic' Eun seunga' hawc' na', pawlaee
 lah' a meuh ku' hk'aw'jeuk.' ¹⁰ A meuh seun' awn' na hton
 loe' pok ka na', a tang ti ri keutah huk' pang maó'.

¹¹ Yam awn' na, peue cus' ri heul' ri ui' neum veng
 Kae'sari' loe' peue na' ce kuit' keunam nya vang ut' ui' na'.
¹² Cit' seunga' na' a lah' a ri ui', 'Pawlaee kangkae, heul'
 maeé ce reu'. Ec'awng' les peue aen' ce ku hot' ui' heul'.
 Ye heul' lec nya eun peue awn' na. ¹³ Eun ris ye mhawng'
 lawng pun eun ri nyu in'hpom puc eun ri nang nya ri na'.
 In'hpom na' eun lah', 'Cus' peue heul' klawng Sí'mon ku'
 klawng peue meuh Petru' na' eun nang veng Yu'pe na'
 reu'. ¹⁴ Eun kaw ris mi mhawng' lawng ku' ti ceu. Kopti
 meuh a lawng aen' na, tu' mi na' maeé peue nya peue
 hk'ul' mi na' pé' gawm'euc' kaw pé' pun hk'a' htut lawtpon
 na'.

¹⁵ Yamla ui' ri lah' ris a na', Cit' seunga' chak' na' a
 lih hk'a'pang ce seun' lih ka hk'a'pang e' nanggal' aen' a
 na'. ¹⁶ Yam awn' na, ui' kuit' rot ri leukah' Yesu' lah' Eun,
 'Yo'han tuil' eun hk'a' cum' na' ri pé' ri leuum'. Daecti pé'
 kaw pun ri rap ri ti hk'a' cum' na' ri Cit' seunga' chak' na'.
¹⁷ Kop awn' na, Peucawo' Eun lawn tuil' lapsawng' ri ce
 keuteul puri seun' tuil' Eun ri e' ku yum' Yesu' Hkrit Eun
 na' e' ko', ui' cí' meuh a'nhaw', ui' vaeé kaw kuit' ri to'tam'
 Peucawo' Eun."

¹⁸ Yam mhawng' ce lawng aen' a na', ce un' laee kue' ku' kaw ram ri heun bae. Ce suk'seun' Peucawo' Eun. Ce lah', "Yeuh keutit' ko', saec' meuh peue un' meuh peue ceu Yu'da na' ce, Peucawo' Eun ku kah ce taws' hpum' fuin map' ri lec nang civit im' na' yeut."

Muk kon' Hkrit nang veng Anhti'ok

¹⁹ Yam awn' na, peue taic'jah heul' kopti lawng Satehpan hkam' eun ku' keunhap' na' ce heul' rot nang kuing' Hpi'ni'sia, kaw' kuing' Sai'plas' na' mae' veng Anhti'ok na'. Ce lah' ris leukah' mun' ren'kawn na' ri peue Yu'da na' ce koe. ²⁰ Daecti ku' ing' neum kaw' kuing' Sai'plas' mae' veng Sai'rin' na' ce ing' rot veng Anhti'ok na'. Ce ku lah' ris leukah' mun' lawng Eun Cawo' Yesu' na' ri peue Helasa' na' ce yeut. ²¹ Peucawo' Eun teum'kawm ce. Peue heun' na' ce yum'. Ce plin' hpum' ri ing' hk'a' Eun Peucawo' na'.

²² Yam lawng aen' rot a ri muk kon' Hkrit nang veng Yerusalaem na' ce na', ce cus' Banabas' eun heul' nang veng Anhti'ok na'. ²³ Yam rot eun teh' na', eun pun ri nyu sa' hki' ka mun' Eun Peucawo' na'. Eun ren'kawn nyawk'. Punta kaw ce hpum' keutawn' seupit ri Cawo' Yesu' Eun na', eun tuil' kaw'l'reng ri ce gawm'euc'. ²⁴ Banabas' eun meuh peue chak', eun htonnuk ri Cit' seunga' chak' na' mae' hk'a' yum' na'. Peue heun' na' ce tang ing' yum' Cawo' Yesu' Eun.

²⁵ Hawc' ko', Banabas' eun heul' sok Saw'lu eun nang veng Tarsas' na'. ²⁶ Yam pun eun ri nyu eun na', eun va eun ing' nang veng Anhti'ok na'. Ka hk'om mae' muk kon' Hkrit na' ce mae' sangsawn' peue cum heun' na' ce ti neum nuk. Muis lah' tapae' na' ce meuh kon' Hkrit na', a la ri lah' ri nanggal' nang veng Anhti'ok na'.

²⁷ Yam awn' na, peue suip leukah' Eun Peucawo' na' ce ngon', ce lih neum veng Yerusalaem na' ce rot nang veng Anhti'ok na'. ²⁸ Hk'a'naee ce ri, ku' muis Agabas'

na' eun kuh' tamnai ri Cit' seungá na'. Eun lah' a kaw kue' ku' ut' ngeup' keuting ri pang bhen' keute' vang peue suik' Ro'ma na' u'peung ce na' gawm'euc' ka. (Ku' ut' ngeup' keuting awn' na, a pucti meuh cu eun cawo' Hkaodi'as' na'.) ²⁹ Kop awn' na, tapae' na' kaw ce pawng' puri teum'kawm ec'awng' ut' nang kuing' Yu'da na' ce seun' sawng' kue' ce kaw'ring na', ce kuit a deut. ³⁰ Ce yeuh a seun' awn' na. Ce bu' lapsawng' na' ri Banabas' eun mae' Saw'lu ka ri ro'kan nang kawt ce muk kon' Hkrit na' ce.

12

Petru' lawtpon eun htawng' ri ku' hk'o'am'

¹ Yam awn' na, punta hkun'haw'hkam' Herot' kaw eun keunhap' peue ut' hk'a'naee muk kon' Hkrit na' ce, eun mheut' ri ti ce. ² Eun kah peue bhat' Yakop' ec' Yo'han na' eun yeum ri leungawng. ³ Yam nyu eun htuk' a hpum' ce peue Yu'da na', eun ku kah peue mheut' ri ti Petru' eun yeut. Lawng aen' a keut' kue' yam pawe un' seue' hkawomun' is' paeng na'. ⁴ Hawc' eun mheut' ri ti Petru' eun ko', eun seue' eun nang htawng' na'. Eun kah peue suik' pun' cum na' ce ko' eun pok ka ti cum, cum ka pun' peue. Eun kuit ri kaw hue' ri taws' a'mu ri Petru' eun nanggal' ce peue heun' na' yam pawe vel nya na' hawc' ka na'.

⁵ Kop awn' na, Petru' eun pun ri hk'awng' ri nang htawng' na'. Daecti muk kon' Hkrit na' ce sae'caee' hk'o' mun' pun eun ri Peucawo' Eun.

⁶ Bul nanggal' ka yam cawo' Herot' kaw eun hue' ri taws' a'mu ri heun na', Petru' eun buih it' nang seuna' ka peue suik' lal' peue na'. Ce mawt eun ri mu' lhec' lal' nyeng. Peue suik' ko' yam' na' ce ku cawng ri kawm nang leuva' htawng' na'. ⁷ A keulawn' kue' in'hpom Eun Peucawo' ti

peue pucti, ku' ceng' na' a ceng' ing' lec hkawng awn' na. In'hpom na' eun dah lungkhang eun Petru' na', eun sawl' eun kuh'. Eun lah', "Kuh' vaevae." Hawc' ko', mu' lhec' na' a bhuic' hk'ai' plong' ti' eun na'.

⁸ Hawc' ko', in'hpom na' eun lah' a ri heun, "Mawt sae'caet' mi na', cuip' jhaep' mi na' reu'." Petru' eun ku yeuh a. Hawc' ko', in'hpom na' eun lah', "Cuip' hk'o keuting mi na'. Hawc' ko', mi na' hot' ui' heul'." ⁹ Petru' eun pucti hot' in'hpom na' eun heul' hk'ai' htawng' na'. Daecti eun un' yawng ku' yeuh eun in'hpom na' meuh a ku' neum, eun hteum' ri buih nyu limit. ¹⁰ Yam puc ka ri pon peue suik' ko' yam' cum nanggal' mae' cum hot' na' ce na', ka rot ri leuva' lhec' lec nang veng na'. Punta kaw ka lec leuva' na', a dah' meun ri ka. Yam heul' rot ka lang' hk'a' na', in'hpom na' eun keulawn' gah' hk'ai' heun.

¹¹ Yam awn' na, Petru' eun tang pawn kui' ri. Eun lah', "Maet' maen', pun ui' ri yawng Peucawo' cus' Eun in'hpom ri lih teum'kawm ui' pon hk'ai' dak ti' eun cawo' Herot' mae' ku' peue Yu'da na' kuit ce ri kaw yeuh ui' lu na' neum hawc'."

¹² Yam pun eun ri pawn lawng aen' a na', eun heul' ri nya ka Mari' meuh ma eun Yo'han na', peue ku klawng eun meuh Maku' yeut. Nya awn' a meuh vang peue heun' na' hk'om ce puri hk'o' mun'. ¹³ Yam Petru' toe' eun leuva' ru ka hkum nya na', mhai' beun' muis Ro'da na' eun ing' ri leuva' na'. ¹⁴ Yam pun eun ri mhawng' meuh a seng' eun Petru' na', kopti ren' nyawk' eun, eun un' tah' leuva' na' eun hk'uih ing' lec nya na'. Eun klawng ri lah', "Petru' ut' eun mae' leuva' na'."

¹⁵ Ce lah' a ri heun, "Meuh mi peue ma'rat aw?" Daecti yam gawm lah' eun meuh a neumneum, ce ku lah', "Na' meuh cit' eun Petru' na'."

¹⁶ Daecti Petru' eun kawn' meung toe' ri leuva' na'. Yam tah' ce leuva' na' ce nyu meuh a heun ri na', ce am' nyawk'.

Peue caee 12:17 44 Peue caee 12:25

¹⁷ Eun kvaeé tí ri kah ce dit'ti. Hawc' ko', lawng Peucawó ti Eun eun lih hk'ai' htawng' ná a yeuh sa'nhaw' ná, eun ris ce mhawng' a. Eun ku tuil' leukah' ri ce, "Ris Yakop' eun maeé ec'awng' eun ná ce mhawng' lawng aen' na yeut reu'." Hawc' ko', eun tang pucti heul' vang tawk seubu ná.

¹⁸ Yam ceng' ka ná, peue suik' ná ce tuin'tung yo'ya' ri Petru' eun cí ná yeuh sa'nhaw'. ¹⁹ Hawc' cawó Herot' heul' sok eun Petru' eun hk'awp' ná, daecti kopti un' laee hk'eup' eun eun ná, eun hki' mhaing' peue suik' ko' yam' ná ce. Eun tuil' leukah' kah ce toh ce.

Cawó Herot' yeum eun

Hawc' awn' na, cawó Herot' eun kuh' neum kuing' Yu'da ná eun heul' ut' nang veng Kae'sari' ná ti cu hkao'.

²⁰ Nanggal' aen' na, cawó Herot' un' htuk' eun peue veng Tai'ra' maeé peue veng Sí'don ná ce. Maet'maen', ce cu peue muis Balatas' ku' meuh mhai' cawó Herot' yum' pun eun ná, ce pong puri ing' ri cawó Herot' eun. Kopti kaw ce htuk' ri puing kuing' eun cawó Herot' pun ku' hk'a ku' som' ná, ce ing' hk'o' ri htuk'lung eun.

²¹ Yam rot a seunyi hpawt' eun cawó Herot' ná, eun dok' hk'eung hkun'haw'hkam' ri mok' pang ten ná, eun leukah' ri peue heun' ná ce. ²² Ce klawng ri lah', "Seng' aen' meuh a seng' Peucawó, un' meuh a seng' peue."

²³ Kopti cawó Herot' un' tuil' eun munhpung' ri Peucawó Eun ná, in'hpom Eun Peucawó ná eun keulawn' yeuh eun peuyhat, rec ná a hk'a eun yeum.

²⁴ Daecti leukah' Eun Peucawó ná a baet ri keuting vah heul'.

Cus' Banabas' eun maeé Saw'lu ka

²⁵ Hawc' Banabas' eun maeé Saw'lu yeuh ka kan' teum'kawm peue ná, ka kuh' neum veng Yeru'salaem tang

ing' nang veng Anhti'ok na'. Ka ku va Yo'han ku' klawng peue meuh Maku' na' eun hot' ri.

13

¹ Muk kon' Hkrit nang veng Anhti'ok na' ce kue' peue suip leukah' Eun Peucawo' mae' seura'. A meuh Banabas', Si'me'on ku' klawng peue meuh Ni'ga', Lusias' peue kuing' Sai'rin', Mane (ku' keuting mae' cawo' Herot' Anhti'pas' eun) mae' Saw'lu ce. ² Yam buih eut' ce ku' hk'a ri fae' Peucawo' Eun na', Cit' seunga' chak' na' a lah', "Punta Banabas' mae' Saw'lu kaw ka yeuh kan' ku' klawng ui' ka yeuh na', tang' ri uin' ka reu'." ³ Kop awn' na yam hawc' ce eut' ku' hk'a ri hk'o' mun' na', ce tang' ti' ri hk'a' pang ka. Ce cus' ka heul'.

Nang kaw' kuing' Sai'plas'

⁴ Cit' seunga' chak' na' a cus' ka lih nang veng Seluki' na'. Ka pawk reu neum mawn' na', ka heul' nang kaw' kuing' Sai'plas' na'. ⁵ Yam rot ka nang veng Salamis' na', ka sangsawn' leukah' mun' Eun Peucawo' na' nang sa'la vang hk'o' mun' ce peue Yu'da na'. Yo'han eun ku ut' mawn'. Eun meuh nang teum'kawm ka.

⁶ Ce heul' ti duih' hawc' ti duih' nang kaw' awn' na. Yam rot ce nang veng Pahpos' na', ce pun ri hk'eup' peue Yu'da ku' meuh peue cang kahta'. Eun meuh peue guil ri meuh peue suip leukah' Eun Peucawo' muis Ba-Yesu' na'. ⁷ Peue awn' eun meuh peue eun cawo' veng muis Seugias' Hpaw'luas' na'. Cawo' veng awn' eun meuh peue heng' yawng. Kopti sum' mhawng' eun lawng leukah' Eun Peucawo' na', eun cus' peue heul' klawng Banabas' eun mae' Saw'lu ka. ⁸ Daecti E'li'mas' (a meuh muis Helasa') peue cang kahta' na' eun ham'tap ka, eun co'ca' ri yeuh cawo' veng na' eun un' yum'. ⁹ Saw'lu ku' lah' peue meuh Paw'lu na' eun htonnuk ri kue' ri Cit' seunga' chak' na'.

Eun keue' seumeu' lah' a ri E'li'mas' eun, ¹⁰ "Meuh mi kon' Satan, mi ku meuh ransu ka ku' leupaws seumeu' na' ku ceu ka. Mi cang chi'lai mae' cang yeuh ku' rai. Yeuh mi hk'a' cawp' Eun Peucawo' a vok' na'. Kaw mi un' yut' a aw? ¹¹ Maet'maen' ti' Eun Peucawo' na' kaw a tawm' mi. Mi kaw ngai' fec' un' laee nyu ceng' seunyi na' ti vut ti yam."

A keulawn' kue' ku' duim'lawng ghuim' eun. Eun muik'mak' sok ri is' nang kaw teuk' ti' ri na' heul'. ¹² Yam cawo' veng na' nyu eun ku' meuh awn' a na', kopti am' eun ri ku' sangsawn' lawng leukah' Eun Peucawo' na', eun ku yum' yeut.

Nang veng Anhti'ok kuing' Pi'si'di'

¹³ Paw'lu eun mae' a'mawo eun na' ce pawk reu neum nang veng Pahpos' na', ce heul' nang veng Peukah kuing' Pamhpi'li' na'. Yo'han eun gah' hk'ai' ka teh', eun keutah ing' nang veng Yeru'salaem na'. ¹⁴ Neum veng Peukah na', ka suip ri heul' rot nang veng Anhti'ok kuing' Pi'si'di' na'. Yam meuh a seunyi Sin' na', ka lec ri mok' nang sa'la vang hk'o' mun' na'. ¹⁵ Hawc' lip htawm leukah' ritroe mae' htawm ce peue suip leukah' Eun Peucawo' na', ro' ka sa'la vang hk'o' mun' na' ce kah peue heul' lah' a ri ka, "Ec'awng', pe'lawm kue' leukah' kaw tuil' kaw' reng ri peue hk'om na' ce ko', lah' a reu'."

¹⁶ Paw'lu eun kuh' yuk ti' ri. Eun lah', "Peue I'sarela' na' mae' peue un' meuh peue ceu Yu'da ku' fae' Peucawo' Eun na' pe', leuceng ui'. ¹⁷ Peucawo' ce peue I'sarela' na' leuk Eun ri ti a'ta' keuting e' na' ce. Yam ut' ce nang kuing' E'ji'tu' na', Eun kah ce huk'hawn' vah keuting heun'. Eun va ce pucti lih hk'ai' kuing' awn' na ri ti'ca keuting ri na'. ¹⁸ Eun yeun'hkam ku' yeuh ce na' nang vang hk'oh'hk'oeng' na' rot pun'kul' neum. ¹⁹ Eun yeuh peue ceu a' res ceu ut' nang kuing' Hkanan na' ce lu. Hawc' ko',

Eun tuil' kuing' ce peue awn' a meuh sin' ri peue ri na' ce.
²⁰ Lawng aen' a ling' hk'ao pun'pak' hpawn'kul' neum.

Hawc' awn' na, Peucawo' Eun tuil' cawo' taws' a'mu ri ce rot ri cu eun Samoela' meuh peue suip leukah' Eun Peucawo' na' eun. ²¹ Hawc' awn' na, ce hk'o' ri is' hkun'haw'hkam'. Peucawo' Eun tuil' Saw'lu kon' eun Hkis' ceucat eun Benyamin na' eun ri ce. Eun u'peung ce pun pun'kul' neum. ²² Hawc' Peucawo' ti Eun Saw'lu eun hk'ui'c' na', Eun tang yuk Davit' eun meuh hkun'haw'hkam'. Peucawo' Eun hkam' sa'hki' lawng eun Davit' na'. Eun lah', 'Nyu Ui' Davit' kon' eun Yesae' na' eun htuk' hpum' ri nyawk'. Eun kaw yeuh ku' sum' kah Ui' eun yeuh na' ku ceu ka.'

²³ Neum ceucat eun Davit' na', Peucawo' Eun ti ri tuil' Yesu' Cawo' teum'kawm htut peue I'sarela' na' ce lawtpon na' seun' yeuh Eun kati ri hawc' na'. ²⁴ Nanggal' ka yam Yesu' un' nang tang' Eun ri yeuh kan' na', Yo'han eun sangsawn' lawng taws' hpum' fuin map' ri na' mae' lawng rap ri ti hk'a' cum' na' ri peue I'sarela' na' ce gawm'euc'. ²⁵ Yam Yo'han kaw eun hk'aws' hawc' kan' ku' yeuh ri na', eun lah', 'Pe' ci' hteum' ui' meuh a'nhaw'? Hpaw ui' ca' meuh peue buih sok pe' na' Eun. Daecti a kue' peue buih ing' hk'a'kui' ui' ti peue, ui' un' kuing' ri kaw kah' mu' jhaep' Eun na'.

²⁶ Ec'awng' ku' meuh ceucat kon'hk'i eun Abraham na' mae' peue un' meuh peue ceu Yu'da ku' lhat'til ri Peucawo' Eun na' pe', leukah' lawng hk'a' htut lawtpon aen' lih rot ka na' meuh a kopti e' ri. ²⁷ Peue veng Yeru'salaem na' mae' hkun'cawo' ce na' un' yawng ce Yesu' meuh Eun a'nhaw'. Ce saec' taws' a'mu ciyang Eun ko', ce yeuh ku' lah' ce peue suip leukah' Eun Peucawo' lawng Eun Yesu' ku' lip ce seunyi Sin' ku sin' na' nuk. ²⁸ Ce saec' un' nyu tut kuing' ri yeum ri Heun, daecti ce hk'o'

cawó Pi'lat eun toh Eun. ²⁹ Hawc' yeuh ce a htonnuk seun' ku' tem' a ri lah' lawng Eun na' gawm'euc' ka na', ce ti nong Eun na' lih hk'ai' kleum' hku' na'. Ce seue' Eun nang keutui' leumuic. ³⁰ Daecti Peucawó Eun tang yeuh Eun kuh' im' hk'ai' vang yeum ri na'. ³¹ Peue tawn hot' Eun tang' neum kuing' Galilae' na' rot nang veng Yeru'salaem na' ce pun ri nyu Eun heun' seunyi. Maet'maen', ce meuh nang hkam' sa' hki' ri peue e' na' ce.

³² Ris ya leukah' mun' ren'kawn aen' a ri pe'. A meuh kati Peucawó tuil' Eun ri a'ta' keuting leumah' e' na' ce. ³³ Pun ku' meuh kon'hk'i ce na' e', Peucawó Eun yeuh a htonnuk hawc' ri yeuh Eun Yesu' Eun kuh' im' seun' tem' a ri uin' ri nang htawm Suk'seun' nambat keuting leual' ka na' a tem' ri, 'Meuh Mi Kon' ai' Ui',

seunyaen' Ui' pun ri meuh Kuing' Mi hawc'.*

³⁴ Lawng ku' neumneum Peucawó tang yeuh Eun Yesu' Eun kuh' im' hk'ai' vang yeum ri, Eun un' laee rot vang seueum' jah na' a tem' ri nang htawm seubu na' yeuhki', 'Kaw Ui' tuil' mun' seunga' chak' keutawn' seupit seun' tuil' Ui' kati ri Davit' eun na' ri pe'.†

³⁵ Nang tawk seubu ka na' a tem' ri,

'Mi kaw un' kah Peue seunga' chak' ri na' Eun seueum'.‡

³⁶ Kopti yam Davit' yeuh eun ku' cawp' alo Eun Peucawó nang cu ri na' hawc' na', eun ku yeum. Peue puing' eun mae' a'ta' keuting leumah' eun na' ce. Tu' eun na' a ku seueum'. ³⁷ Daecti ku' Peucawó yeuh Eun kuh' im' na', Eun un' duing seueum'.

³⁸ Kop awn' na ec'awng' na' pe', ui' sum' kah pe' yawng kopti meuh a Yesu' aen' Eun, pe' pun hk'a' plo'e' map' na'.

³⁹ Peue yum' Yesu' Eun na' ce ku peue ri, ku' leukah' ritroe

* 13:33 13:33 Suk'seun' 2:7 † 13:34 13:34 I'saya' 55:3 ‡ 13:35 13:35 Suk'seun' 16:10

eun Mo'se un' cang yeuh ka ce pon a na', ce pun ri pon a gawm'euc' ka. ⁴⁰ Uin' sati ri meulamlam ri reu'. Pawlaee kah ku' lah' ce peue suip leukah' Eun Peucawo' na' meuh ri pe'. A lah',

⁴¹ 'Keue' reu',
peue lah' ku' un' nawpsang na' kaw pe' am', pe' kaw lulaic.

Kopti kaw Ui' yeuh ku' ti ri ceu hk'a'naee seunyi meuyam pe' na'.

A saec' na' kue' peue ti ri peue lah' pe' mhawng' a na' ko',

pe' hkuin' kaw yum' a.' "§

⁴² Yam Paw'lu eun maeé Banabas' puc ka ri heul' hk'ai' sa'la vang hk'o' mun' na', ce hk'o' ka tang ris lawng aen' na sin' hot' bae. ⁴³ Yam hawc' hk'om ce na', peue Yu'da maeé peue tam' mun' tam' sin' ing' lec ritroe ce peue Yu'da na' ce hot' Paw'lu eun maeé Banabas' ka heun' peue. Ka leukah' maeé ce, ka kah ce ut' hk'a'naee mun' sin' Eun Peucawo' na' laleung.

⁴⁴ Bae seunyi Sin' hot' na', peue nang veng na' ce daee ing' cu ri leuceng leukah' Eun Peucawo' gawm'euc' ri.

⁴⁵ Yam peue Yu'da na' nyu ce peue cum heun' na' ce na', ce hkoe'mang' ka nyawk'. Ce top'tawt ku' lah' eun Paw'lu na'. Ce lah' leukah' cu' ku' kleuc' ri heun.

⁴⁶ Paw'lu eun maeé Banabas' ka htu'hting' ce ri hpum' hat'han' ri. Ka lah', "Kaw ya htuk' ri lah' leukah' Eun Peucawo' na' ri pe' nanggal'. Daecti pe' lawn tecla a maeé pe' sawn' meun ri kaw un' kuing' ri pun cit' tip a'yu tip cot'cu na' ko', ya kaw heul' ri peue un' meuh peue ceu Yu'da na' ce. ⁴⁷ Kopti Peucawo' tuil' Eun leukah' ri ya yeuhki' na',

'Punta kaw mi ti hk'a' htut lawtpon na' rot ti sut' ka bhen' keute' na',
 Ui' yeuh mi meuh ku' ceng' pun peue un' meuh peue ceu Yu'da na' ce.' ”*

⁴⁸ Yam peue un' meuh peue ceu Yu'da na' pun ce ri mhawng' leukah' aen' a na', ce ren'kawn yuk leukah' Eun Peucawo' na' lhung' keuting. Peue hkvet' ti uin' ri kaw pun cit' tip a'yu tip cot'cu na' ce ku yum'.

⁴⁹ Leukah' Eun Peucawo' na' a laws' heul' hk'awp' nang kuing' awn' na. ⁵⁰ Daecti peue Yu'da na' ce heul' cu'ci' beun' htan lhung' ku' hkopyawm' Peucawo' Eun na' mae' a'ta' me ro'kan nang veng awn' ce. Ce cu' peue awn' ce keunhap' Paw'lu eun mae' Banabas' ka, ra ka hk'uih hk'ai' kuing' awn' na. ⁵¹ Kop awn' na, punta kaw a meuh sa' hki' un' rap ka ri ti peue awn' ce na', ka raws' ri tec peuluung pit dak cung ri na'. Hawc' ko', ka heul' nang veng I'kaw'ni' na'. ⁵² Tapae' na' ce htonnuk ri ku' ren'kawn na' mae' Cit' seunga' chak' na'.

14

Nang veng I'kaw'ni'

¹ Nang veng I'kaw'ni' na', Paw'lu eun mae' Banabas' ka ing' lec nang sa'la vang hk'o' mun' ce peue Yu'da na' seun' ku' tawn yeuh ka na'. Kopti sangsawn' ka mawn' a lec hpum' ce nyawk' na', peue Yu'da na' ce mae' peue un' meuh peue ceu Yu'da na' ce ing' yum' heun' peue.

² Daecti punta peue un' meuh peue ceu Yu'da na' kaw ce kue' hpum' ces ri peue yum' na' ce na', peue Yu'da un' yum' na' ce heul' cu'ci' ce. ³ Paw'lu eun mae' Banabas' ka ku koe ut' mawn' ling'. Ka hpum' hat'han' sangsawn' ce pun Peucawo' Eun. Peucawo' Eun htawhkam lawng mun' sin' ri na' ri kah ka cang yeuh ku' hk'o'am' na' mae'

* 13:47 13:47 I'saya' 49:6

het' keuting na' ce. ⁴ Peue veng na' ce gvah ri meuh la' muk. Ngon' ce ut' hk'a' ce peue Yu'da na', ngon' ce ut' hk'a' ce peue caee Eun Yesu' na'. ⁵ Peue un' meuh peue ceu Yu'da na' ce mae' peue Yu'da na' ce bae ro'kan ce na' ce pawng' puri kaw klae' dhim' Paw'lu eun mae' Banabas' ka ri seumu. ⁶ Daecti kopti yawng ka kan' awn' na, ka hk'uih heul' nang kuing' Li'hkaoni' veng Lis'tra', veng Deube mae' kuing' kue' keunam caona' na' ce. ⁷ Ka suip ri sangsawn' leukah' mun' ren'kawn na' nang kuing' awn' na.

Dhim' Paw'lu eun ri seumu nang veng Lis'tra'

⁸ Nang veng Lis'tra' na' a kue' peue cung lu mok' ri ka ti peue. Eun cung lu tang' neum yam keut' ri na'. Eun un' duing long hk'a' saec' ti pok. ⁹ Eun mok' ri leuceng leukah' sangsawn' eun Paw'lu na'. Paw'lu eun seuluil' eun. Yam Paw'lu yawng eun kue' eun hk'a' yum' kaw cang yeuh eun cuin na', ¹⁰ eun klawng ri lah' laws' a, "Kuh' cawng reu." Eun ku yawt' ti kuh' cawng, eun tang' ri long hk'a' heul'.

¹¹ Yam peue cum heun' na' nyu ce ku' yeuh eun Paw'lu na', ce klawng ri lah' laws' leukah' Li'hkaoni' na', "Muk eun peucawo' na' lih yeuh ce ri seun' peue ri e' hawc'." ¹² Ce klawng Banabas' eun meuh peucawo' Sus'. Kopti Paw'lu leukah' eun hk'a' heun' na', ce klawng eun meuh peucawo' Heumes'. ¹³ Peue jhawp' rit eun peucawo' Sus' ut' nang nya mun' a un' seungai veng na' eun ti a' moe mae' hkawt' peutai ing' ri leuva' ka veng na', kopti heun ri mae' peue cum heun' na' sum' tan ce ku' tan ri Paw'lu eun mae' Banabas' ka.

¹⁴ Daecti yam peue caee Eun Yesu' Banabas' eun mae' Paw'lu pun ka ri mhawng' lawng awn' a na', ka res hk'eung ri na', ka hk'uih ing' lec nang ngon' ce peue cum heun' na'. Ka ta'ul' ri lah' a, ¹⁵ "Pe' ri, a ci' meuh kop keunhaw', pe' vae' yeuh ku' yeuhki'? Saec' meuh ya ri, ya ku meuh peue

sum'hpap seun' pé' ri yeut. Ya ti leukah' mun' ren'kawn na' ing' ri pé'. Punta kaw pé' tecla ku' un' kue' mun' aen' ce na', pé' na' ing' ri Peucawo' a'yu im' na' Eun. Hpan pleng' Eun mao', bhen' keute', mha'seumut' maeé' ku' kue' hk'a'naee awn' ce gawm'euc' ka. ¹⁶Leumah', Peucawo' Eun tae' peue ceu na' ce gawm'euc' sawng' yeuh alo ri na' heul'. ¹⁷Daecti Eun kah a kue' lawng ku' kaw hkam' sa'hki' ri ti. Eun yeuh ku' chak' ri na' pucti lih ri tuil' Eun lhe' lih neum pang mao' na' maeé' yeuh Eun a kue' meuyam kue' pli' kue' seukuk na'. Eun tuil' pé' is' ku' hk'a ku' som' htonnuk. Eun tuil' hpum' pé' na' ren'kawn kuit nyawk' kuit sam'ran htonnuk." ¹⁸Ka saec' lah' a yeuhko', daecti peue cum heun' na' kaw ce tan ri ka na' ka ham' ce a kawn' nyhap'.

¹⁹Hawc' awn' na, peue Yu'da ut' nang veng Anhti'ok na' maeé' veng I'kaw'ni' ngon' na' ce ing' cop' ri pun peue cum heun' na' ce ut' hk'a' ti. Ce dhim' Paw'lu eun ri seumu. Kopti hteum' ce eun yeum na', ce ol' ri heul' tec eun hk'a'nok ka veng na'. ²⁰Daecti yam tapae' na' ut' ce rop eun na', eun tang kuh', keutah ing' lec nang veng na'. Hawc' ka na' ti seunyi, heun ri maeé' Banabas' ka heul' nang veng Deube na'.

Keutah ing' nang veng Anhti'ok kuing' Su'ri'

²¹Ka sangsawn' leukah' mun' nang veng awn' na, peue heun' na' ce tang meuh tapae'. Hawc' ko', ka keutah ing' nang veng Lis'tra', veng I'kaw'ni' na' maeé' veng Anhti'ok na'. ²²Punta kaw ka teum'kawm tapae' na' ce reng keuting na', tuil' kaw'ring ce kue' hpum' keutawn' hk'a'naee hk'a' yum' na'. Ka sangsawn' ce. Ka lah', "Punta kaw e' pun ri lec nang kuing' Eun Peucawo' na', e' kaw kah ri hkam' ku' tukhka heun' ceu na'." ²³Paw'lu eun maeé' Banabas' ka leuk muk kon' Hkrit ku cum na' ce is' ro'kan nang kawt. Punta kaw ka ap ce nang tí' Eun Peucawo' yum' ce na', ka eut' ku' hk'a ri hk'o' mun'. ²⁴Hawc' ka rot hk'awp' kuing'

Pí'sí'dí' ná, ka ing' nang kuing' Pamhpi'lí'. ²⁵ Yam hawc' ka sangsawn' ri leukah' mun' nang veng Peukah ná, ka lih nang veng Atalí'.

²⁶ Neum veng Atalí' ná, ka tang pawk reu ing' nang veng Anhti'ok. A meuh vang ap peue ka hk'a'naee mun' sin' Eun Peucawó' punta kaw ka yeuh kan' ná. Maet'maen', ka yeuh kan' awn' na htonnuk hawc'. ²⁷ Yam ing' rot ka mawn' ná, ka klawng ri cu muk kon' Hkrit ná' ce hk'om puri. Ka ris ce mhawng' lawng ku' Peucawó' cu Eun ka yeuh ná' ce, maeé' lawng Peucawó' tah' Eun leuva' hk'a' yum' ri peue un' meuh peue ceu Yu'da ná' ce. ²⁸ Ka ut' maeé' tapae' ná' ce mawn' ling'.

15

Hk'om puri nang veng Yeru'salaem

¹ Peue ut' nang kuing' Yu'da ná' ce ngon' ce ing' nang veng Ahti'ok ná' ce sangsawn' lah' a ri ec'awng' ná' ce, "Pe' lawn un' ton' duing' hak' ri seun' Mo'se tang' eun ri uin' ritroe ná' ko', pe' kaw un' cang pun hk'a' htut lawtpon ná'." ² Kopti meuh a leukah' sangsawn' aen' a ná, Paw'lu eun maeé' Banabas' ka htu'hting' ce nyawk'. Kop awn' na, punta kaw ce huk' mhaing' lawng ku' kleuc' aen' a ri peue caee Eun Yesú' ná' ce maeé' ro'kan nang kawt ná' ce nang veng Yeru'salaem ná, ce leuk Paw'lu, Banabas' maeé' peue yum' ná' ce ngon' ce huk'. ³ Muk kon' Hkrit ná' ce cus' ce huk'. Yam hpa' ce kuing' Hpi'ní'sia ná' maeé' kuing' Samarí' ná' huk', ce lah' ris lawng peue un' meuh peue ceu Yu'da ná' leuploh' ce hpum' ri. Lawng aen' a yeuh ec'awng' ná' ce ren'kawn nyawk' gawm'euc' ri. ⁴ Yam rot ce nang veng Yeru'salaem ná, muk kon' Hkrit ná' ce, peue caee Eun Yesú' ná' ce maeé' ro'kan nang kawt ná' ce rap ri ti ce. Ka ris ce mhawng' lawng ku' Peucawó' cu Eun ka yeuh ná' gawm'euc' ka.

⁵ Hawc' ko', peue yum' ut' nang muk ce peue Hparisae' na' ce ngon' ce kuh' cawng ri lah', "Peue un' meuh peue ceu Yu'da na' ce kaw kah ri ton' duing' hak' ri, ce kaw kah ri hot' leukah' ritroe eun Mo'se na'."

⁶ Punta peue caee Eun Yesu' na' ce mae' ro'kan nang kawt na' kaw ce sa'lit lawng ku' kleuc' aen' a na', ce hk'om puri. ⁷ Hawc' sa'lit ce puri lawng aen' na heun'heun' na', Petru' eun kuh' cawng ri lah', "Ec'awng' na' pe', pe' ku yawng Peucawo' leuk Eun ri ti ui' hk'a'naee pe' tang' neum nanggal' aen' na. Eun kah ui' sangsawn' leukah' mun' ren'kawn ri peue un' meuh peue ceu Yu'da na' ce, punta kaw ce pun ri mhawng', pun ri yum' a. ⁸ Peucawo' cang yawng nang hpum' na' Eun, rap Eun ri ti ce na' yeuh Eun a pucti lih ri tuil' Eun Cit' seunga' chak' na' ri ce seun' tuil' Eun a ri e' na'. ⁹ E' ri mae' ce ri Peucawo' Eun un' sawn' e' chat puri, kopti yeuh Eun hpum' ce na' seunga' chak' ri hk'a' yum' na' hawc'. ¹⁰ Kop awn' na, maet'maen' a ci meuh kop keunhaw' pe' vae' long ri nawk Peucawo' Eun ri uin' ku' klawm' na' pang seuplang' ce tapa'e na'? A'ta' a'ya e' na' ce mae' e' ri e' ku un' pe ku' klawm' aen' na. ¹¹ Pawlaee yeuh a. Yum' e' kopti meuh a mun' Eun Cawo' Yesu' na', e' pun hk'a' htut lawtpon na' seun' ce ri."

¹² Peue ing' hk'om na' ce dit'ti leuceng Banabas' eun mae' Paw'lu ris ka lawng het' keuting na' mae' ku' hk'o'am' ku' Peucawo' cu Eun ka yeuh ri peue un' meuh peue ceu Yu'da na' ce. ¹³ Yam hawc' ka leukah' ri na', Yakop' eun lah', "Ec'awng' na' pe', leuceng leukah' ui' na' reu'. ¹⁴ Si'mon eun ris e' mhawng' a hawc' lawng nanggal' ka na' Peucawo' yeuh Eun hk'a' tuckyak ri na' pucti lih ri leuk Eun peue un' meuh peue ceu Yu'da na' ce ing' meuh peue ri ngon' na'. ¹⁵ Leukah' lah' eun na' cawp' a ku' lah' ce peue suip leukah' Eun Peucawo' tem' ri nang htawm Seunga' na' yeut. A tem' ri yeuhki',

- 16 ‘Peucawo’ Cawo’ pleng’ ceu nang aen’ ce na’ Eun lah’ a,
 “Tang’ neum maet’ maen’ na’,
 Ui’ kaw tang ing’ pleng’ tup’ cung’ kus eun Davit’ na’ hk’u’
 bae.
 Saec’ meuh ku’ lhu’jah na’, Ui’ kaw tang mhe’ a.
 Ui’ kaw tang pleng’ aen’ ce seun’ hk’im’.
- 17 Punta peue kaw’n’ vang na’ ce
 mae’ peue un’ meuh peue ceu Yu’da ku’ peus muis
 Ui’ na’ ce gawm’ euc’ na’
 kaw ce sok Peucawo’ Eun.”* ,

¹⁸ Lawng aen’ a yawng ri tang’ neum leumah’.

¹⁹ Kop awn’ na, kuit ui’ e’ na’ un’ htuk’ ri yeuh ku’ suksak
 ri peue un’ meuh peue ceu Yu’da ku’ hpawt’ ri ing’ ri
 Peucawo’ Eun na’ ce. ²⁰ Daecti e’ na’ kah ri tem’ ri tuil’
 lai kah ce vel ku’ hk’a kue’ vang ri kopti ruphtu na’, hk’a’
 hkuit’ nawng’ tang’, hk’a keune sat’ seurot’ ngok ri yeum
 mae’ hk’a nham’, ²¹ kopti tang’ neum leumah’ na’ leukah’
 ritroe eun Mo’sse na’ lip a ri nang sa’la vang hk’o’ mun’ na’
 ku Sin’ ku veng na’.”

*Peue hk’om na’ tuil’ ce lai ri peue yum’ un’ meuh peue ceu
 Yu’da*

²² Hawc’ ko’, peue caee Eun Yesu’, ro’kan nang kawt
 na’ mae’ muk kon’ Hkrit na’ ce ku peue ce leuk peue
 hk’a’naee ce lal’ peue punta kaw ka hot’ Paw’lu eun mae’
 Banabas’ ka heul’ nang veng Anhti’ok na’. Ce leuk ri pun
 Yu’das’ (klawng peue meuh Basabas’) mae’ Silas’ ka. Peue
 lal’ peue aen’ ka meuh ro’ hk’a’naee ec’awng’ na’ ce. ²³ Ce
 bu’ lai ri ce heul’. A tem’ ri yeuhki’,

“Lai aen’ meuh a lai heul’ neum peue caee Eun Yesu’ na’
 mae’ ro’kan nang kawt ku’ meuh ec’awng’ pe’.

* 15:17 15:17 Amo’ 9:11, 12

Ec'awng' peue yum' un' meuh peue ceu Yu'da ut' nang veng Anhti'ok kuing' Su'ri' na' mae' kuing' Si'li'si' na' pe'.

²⁴ Ye pun ri mhawng' peue hk'a'naee ye na' ce ngon' ye saec' un' kah ce heul' ri pe', daecti ce heul'. Ce heul' suksak pe' ri lah' ku' yeuh pe' hpum' un' sam'ran. ²⁵ Kop awn' na, ye ri gawm' euc' ye sahpaw' ri leuk peue la' peue cus' ka heul' ri pe' mae' a' mawo leumeus' e' Banabas' eun mae' Paw'lu ka. ²⁶ Ka meuh peue hat' ri tan a'yu ri pun muis Eun Cawo' e' Yesu' Hkrit na' Eun. ²⁷ Kop awn' na punta nang kaw ris pe' mhawng' lawng ku' tem' ye nang lai na', ye cus' Yu'das' eun mae' Silas' ka heul'. ²⁸ Cit' seunga' chak' na' mae' ye ri kaw ye un' po beus hk'a'pang pe' saec' ti ceu na', a htuk' hpum' ye. Daecti pe' kaw kah ri vel ceu nang aen' ce. ²⁹ Kaw pe' kah ri vel hk'a ku' hk'a tan ri ruphtu, hk'a nham', hk'a keune sat' seurot' ngok ri yeum na' mae' hk'a hkuit' nawng'tang' na'. Pe' lawn cang vel ceu nang aen' ce ko', chak' ka nyawk'. Kuit nyawk' kuit sam'ran reu'."

³⁰ Peue awn' ce pucti heul', ce heul' rot nang veng Anhti'ok na'. Ce klawng muk kon' Hkrit na' ce hk'om. Hawc' ko', ce tuil' lai awn' na ri ce. ³¹ Yam muk kon' Hkrit na' lip ce lai na', ce ren' mae' tuil' a kaw'ring ri. ³² Saec' Yu'das' eun mae' Silas' ka kopti meuh ka peue suip leukah' Eun Peucawo' na', punta kaw ka tuil' kaw'ring yeuh ec'awng' na' ce kaw'ring keuting na', ka sangsawn' ce heun' ceu. ³³ Hawc' ut' ka mawn' a koe ling' na', ec'awng' na' ce tangkah ka ing' ri peue cus' ka heul' na' ce mae' kuit nyawk' kuit sam'ran ri. † ³⁵ Paw'lu eun mae' Banabas' ka

† 15:33 15:33 Nang htawm Seunga' na' ngon', tang bae a nambat aet' 34 na', 34 "Daecti Silas' kaw eun tang suip ri ut' teh' na', eun kuit a deut."

kawn' ut' nang veng Anhti'ok na'. Ka ri mae' peue seubu heun' peue na' ce sangsawn' leukah' mun' Eun Peucawo' na' tiduih'.

Kamkuit eun Paw'lu eun mae' Banabas' un' hot' a puri

³⁶ Hawc' awn' na, Paw'lu eun lah' a ri Banabas' eun, "Ec'awng' ut' hk'a'naee veng vang tawn eo' sangsawn' a' leukah' mun' ren'kawn na', ce ci' na' yeuh sa'nhaw', a' tang heul' eo' ri nom'nawk ce pawh." ³⁷ Banabas' eun ku sum' va Yo'han klawng peue meuh Maku' na' eun heul' yeut. ³⁸ Daecti Paw'lu eun kuit a un' htuk' ri va eun heul'. Kopti pok nanggal' na' Yo'han tecla eun ka nang kuing' Pamhpi'li' na', eun un' laee suip ri yeuh kan' mae' ka na'. ³⁹ Ka htu'hting' puri nyawk', ka gah' hk'ai' puri. Banabas' eun va Maku' eun pawk reu na' heul' nang kaw' kuing' Sai'plas' na'. ⁴⁰ Daecti Paw'lu eun leuk ri ti Silas' eun ka heul'. Ec'awng' na' ce ap ka hk'a'naee mun' sin' Eun Peucawo' na'. ⁴¹ Paw'lu eun heul' lec nang kuing' Su'ri' na' mae' kuing' Si'li'si' na'. Eun yeuh muk kon' Hkrit na' ce kaw'reng keuting.

16

Ti'mo'se hot' eun Paw'lu eun mae' Silas' ka

¹ Paw'lu eun heul' rot nang veng Deube na'. Hawc' ko', eun heul' nang veng Lis'tra' na'. Teh' na', tapae' ti peue ku' muis Ti'mo'se na' eun ut' ri ka. Ma eun ka meuh peue Yu'da, ka meuh peue yum'. Kuing' eun na' eun meuh peue Helasa'. ² Ti'mo'se eun meuh peue muis chak' hk'a'naee ec'awng' ut' nang veng Lis'tra' na' mae' veng I'kaw'ni' na' ce. ³ Paw'lu eun sum' va Ti'mo'se eun hot' ri heul'. Kop awn' na, eun kah eun ton' duing' hak' ri kopti meuh a Peue Yu'da ut' mawn' na' ce. Kopti yawng ce kuing' eun meuh eun peue Helasa' na'. ⁴ Yam buih heul' ce nang veng ti veng hawc' ti veng na', ku' sa'lit ce peue caee Eun Yesu'

na' mae' ro'kan ut' nang veng Yeru'salaem na' punta kaw peue hot' ri yeuh a na', ce ku suip ri lah' a heul'. ⁵ Kop awn' na, hk'a' yum' ce muk kon' Hkrit na' a baet ri kaw' reng keuting. Muk ce muk kon' Hkrit na' ce baet ri heun' ku seunyi.

Paw'lu nyu eun limit peue Masido'ni'

⁶ Kopti Cit' seunga' chak' na' un' kah a ce sangsawn' leukah' mun' ren'kawn na' nang kuing' Asa' na', Paw'lu eun mae' cum eun na' ce tawl' heul' nang kuing' Fi'cia' na' mae' kuing' Galati' na' ku duih' ka. ⁷ Yam rot ce nang mhuil' kuing' Mi'si' na', ce saec' co'ca' ri kaw lec nang kuing' Beti'ni' na', daecti Cit' seunga' Eun Yesu' na' a un' tuil' ahkvang ka ri ce. ⁸ Kop awn' na, ce vel kuing' Mi'si' na' heul', ce lih nang veng Tro'as' na'. ⁹ Peunsum' na', Paw'lu eun nyu limit peue Masido'ni' ti peue cawng eun ri hk'o' a ri ti. Eun lah', "Hk'o' mi ing' teum'kawm ye nang kuing' Masido'ni' na'." ¹⁰ Hawc' Paw'lu pun eun ri nyu limit na', ye keulawn' rangraen ri kaw heul' nang kuing' Masido'ni' kopti pun ye ri yawng Peucawo' klawng Eun ri ti ye kaw sangsawn' leukah' mun' ren'kawn na' ri peue Masido'ni' na' ce.

Li'di' leuploh' ka hpum' ri

¹¹ Tang' neum veng Tro'as' na', ye pawk reu na' seumeu' heul' ri kaw' Samo'tras' na'. Hawc' ka na' ti seunyi, ye rot nang veng Neapolis' na'. ¹² Ye tang pucti heul' neum veng awn' na, ye rot nang veng Hpi'li'pi' na'. Veng awn' a meuh veng tang' ce peue Ro'ma na'. A meuh veng nambat keuhti ka hk'a'naee kuing' Masido'ni' na'. Ye ku ut' mawn' heun' seunyi yeut.

¹³ Yam rot a seunyi Sin' na', ye pucti heul' hk'a'nok ka leuva' veng na'. Ye kuit a na' kue' vang hk'o' mun', ye heul' keunam ba leuum' na'. Ye mok' ri leukah' u beun' heul' cu

ri mawn' na' ce. ¹⁴ Hk'a'naee beun' mok' ri leuceng leukah' na' ce, a kue' beun' muis Li'di' ti peue. Ka meuh peue veng Tiyatira. Ka paing' hpen' yawtmong. Ka meuh peue faee' Peucawo' Eun. Punta kaw ka leuceng leukah' eun Paw'lu na', Peucawo' Eun tuh' hpum' ka na'. ¹⁵ Yam beun' awn' ka mae' peue nya ka na' hawc' ce rap ri ti hk'a' cum' ri na', ka klawng ye ing' ti nya ce. Ka lah', "Pe' lawn kuit meuh ui' peue yum' Peucawo' Eun ko', ing' ut' ri nya ye reu'." Ka sae'caee' hk'o' ri yeuh ri pun ye ing' ut' ri nya ce.

Paw'lu eun mae' Silas' lec ka htawng'

¹⁶ Ti pok na', yam buih heul' ye nang vang hk'o' mun' na', beun' mhai' ku' seuca' yawng mhaw' na' lec a ka ti peue na' ka ing' hk'eup' ye. Kopti cang ka mhaw' seulak' na', cawo' ka na' eun pun leumuil heun'. ¹⁷ Paw'lu eun mae' ye ri beun' awn' ka hot' ye. Ka klawng ri lah', "Peue aen' meuh ce mhai' Eun Peucawo' Cawo' lhung' hk'ai' peue na'. Ce ing' lah' pe' mhawng' hk'a' ka hk'a' htut lawtpon na'." ¹⁸ Kopti yeuh ka keutit' heun' seunyi na', a suksak Paw'lu eun nyawk'. Vang tisu' ka na', eun hpawt' ri tuil' leukah' ri seuca' na', "Hk'a'naee muis Eun Yesu' Hkrit na', kaw ui' tuil' leukah' ri mi, 'Puc mi lih hk'ai' ka reu'." Seuca' na' a ku keulawn' pucti lih hk'ai' ka.

¹⁹ Yam cawo' ka beun' awn' pun eun ri nyu kaw ri un' laee kue' hk'a' kaw pun leumuil na', ce mheut' ri ti Paw'lu eun mae' Silas' ka. Ce teuk' ol' ka heul' hk'eup' peue yeuh kan' kuing' na' ce nang keulas na'. ²⁰ Ce teuk' ka heul' ri ro'kan nang veng na' ce. Ce lah', "Peue aen' meuh ka peue Yu'da. Ka buih yeuh ku' suksak nang veng e' na' heun'. ²¹ Ka ti ri ing' sangsawn' ritroe peue Yu'da ku' un' cawp' ritroe e' na'. A meuh ritroe peue Ro'ma rap un' pun yeuh un' pun e' na'."

²² Peue heun' na' ce ku cu ri ing' lhaw' ri ri Paw'lu eun mae' Silas' ka. Ro'kan nang veng na' ce tuil' leukah' kah

ce hpuic' hk'o ka na', kah ce ta'faet' ka ri hkawn. ²³ Hawc' ta'faet' ce ka heun'heun' na', ce seue' ka nang htawng'. Ce tuil' leukah' ri ro' htawng' na' eun, ce kah eun ko' kawn ka meulamlam ri. ²⁴ Yam ro' htawng' na' pun eun leukah' awn' a na', eun uin' ka ut' nang hkawng hk'a'naee ka htawng' na'. Eun cip cung ka na' hk'a'naee hku', yeuh a cin meulamlam ri.

²⁵ Hk'ao yam peunngon' sum' na', Paw'lu eun mae' Silas' ka buih hk'o' mun' cai suk'seun' Peucawo' Eun. Peue htawng' seubu na' ce ku buih leuceng ka yeut. ²⁶ Yam awn' na, a keulawn' in'san' reng nyawk'. Puin ka htawng' na' a keuyuih' keuyah'. Leuva' ka htawng' na' ce a keulawn' dah' gawm'euc'. Mu' lhec' mawt ce peue htawng' na' a bhuic' euc'. ²⁷ Ro' htawng' na' eun kuh'. Yam nyu eun leuva' htawng' na' dah' ka na', kopti hteum' eun peue htawng' na' ce hk'uih' euc' na', eun htut' vaic ri na', eun kaw toh ri yeum meun. ²⁸ Daecti Paw'lu eun klawng ri lah' laws' a, "Pawlaee yeuh tu' mi na' lu. Kawn' ut' ye gawm'euc' ri yeut."

²⁹ Ro' htawng' na' eun kah ce tok' ngawl. Hawc' ko', eun ing' nghup' ri keuyuing' ruing nanggal' ka Paw'lu eun mae' Silas' na'. ³⁰ Hawc' ko', eun va ka puc ri. Eun mhaing' ka, "Cawo', punta kaw ui' pun hk'a' htut lawtpon na', ui' ci na' htuk' ri yeuh sa'nhaw'?"

³¹ Ka top' a, "Yum' Cawo' Yesu' Eun reu', mi ri mae' peue nya peue hk'ul' mi na' kaw pe' pun hk'a' htut lawtpon na'." ³² Hawc' ko', ka sangsawn' leukah' Eun Peucawo' na' ri ro' htawng' na' eun mae' peue ut' nang nya eun na' ce gawm'euc'. ³³ Hk'a'naee nali bul awn' na, ro' htawng' na' eun va ri heul' saic' vang sui' ka na'. Hawc' ko', tu' eun ro' htawng' na' mae' peue nya peue hk'ul' eun na' ce keulawn' rap ri ti hk'a' cum' gawm'euc' ri. ³⁴ Ro' htawng' na' eun va ka heul' ri nya ri, eun tuil' ka hk'asom'. Ro'

htawng' na' eun ren'kawn nyawk', kopti tu' eun na' maeé' peue nya peue hk'ul' eun na' gawm'euc' yum' ce Peucawó' Eun hawc' na'.

³⁵ Yam ceng' ka na', ro'kan nang veng na' ce cus' peue yeuh kan' na' ce heul' ri ro' htawng' na' eun. Ce lah', "Ploe' peue lal' peue awn' ka reu'." ³⁶ Ro' htawng' na' eun lah' a ri Paw'lu eun, "Ro'kan nang veng na' tuil' ce leukah' ploé' mi maeé' Silas' eun. Maet'maen' pa' na' pucti heul' hk'a'nae kuit nyawk' kuit sam'ran ri reu'."

³⁷ Daecti Paw'lu eun lah' a ri peue yeuh kan' na' ce, "Ya saec' meuh peue Ro'ma, daecti ce un' mhaing' mhil' ya ce ta'faet' ya nanggal' peue kuing'. Hawc' ko', ce seue' ya nang htawng'.* Maet'maen' ce' kaw yeng ri ra ri tec yen' ya aw? A hkuin' kaw cang. Kah tu' ce na' ing' va ya pucti reu'."

³⁸ Peue yeuh kan' na' ce heul' lah' ris lawng aen' a ri ro'kan nang veng na' ce. Yam pun ce ri mhawng' Paw'lu eun maeé' Silas' meuh ka peue Ro'ma na', ce ku tok'seupa.

³⁹ Ce ing' hk'o' ka a'nyat a. Hawc' ce hue' ka lih hk'ai' htawng' na', ce hk'o' ka pucti heul' hk'ai' veng awn' na.

⁴⁰ Hawc' Paw'lu eun maeé' Silas' puc ka ri lih hk'ai' htawng' na', ka heul' ri nya ka Li'di' na'. Ka hk'eup' ec'awng' na' ce, ka tuil' kaw'ring ce. Hawc' ko', ka pucti heul' hk'ai' veng awn' na.

17

Nang veng Hte'salo'ni'

¹ Yam hawc' ce hpa' veng Afí'po'lis' na' maeé' veng Apaw'lonia na' heul' na', ce rot nang veng Hte'salo'ni' na'. Mawn' na' a kue' sa'la vang hk'o' mun' ce peue Yu'da na'.

² Paw'lu eun lec nang sa'la vang hk'o' mun' seun' ku' tawn

* **16:37** 16:37 Lawn ta'faet' peue Ro'ma na' ce yam un' nang taws' a a'mu ri deut ko', a kleuc' ri ritroe ka.

yeuh eun na'. Eun cu htawm Seungá na' eun sa'lit a maeé ce pun loe' Sin'. ³ Hawc' Hkrit hkam' Eun ku' tukhka Eun tang kuh' im' na', Paw'lu eun tuil' ce nyu a glih'gleueng'. Eun lah', "Yesu' ku' ris uí pe' mhawng' ti peue aen' Eun ko', meuh Eun Hkrit." ⁴ Peue Yu'da na' ce ngon', ce yum'. Ce pawng' Paw'lu eun maeé Silas' ka. Saec' meuh peue Helasa' ku' lhat'til ri Peucawo' Eun na' ce ku yum' heun'. Beun' kue' muis na' ce ku hkuin' caee ri yum' leng.

⁵ Daecti peue Yu'da na' ce kue' hpum' hcoe'mang' ka, ce klawng peue rai ut' eo' nang keulas na' ce ing' yeuh ku' suksak nang veng na'. Punta kaw ce teuk' Paw'lu eun maeé Silas' ka heul' nanggal' ce peue heun' na', ce nui ri ing' lec ri sok ka nang nya eun Cesan' na'. ⁶ Daecti yam sok un' nyu ce ka na', ce teuk' ol' Cesan' eun maeé ec'awng' eun na' ce ngon' heul' ri peue yeuh kan' nang veng na' ce. Ce klawng ri lah', "Peue aen' meuh ce peue yeuh ku' suksak nang lok na' ku duih' ka, maet'maen' ing' rot ce maen' hawc'. ⁷ Cesan' rap eun ri ti ce nang nya ri na'. Peue aen' ce hkat'hkan ritroe eun hkun'haw'hkam' Kae'sa na'. Ce lah' a kawn' kue' hkun'haw'hkam' seubu ti peue, Eun meuh Yesu'." ⁸ Yam peue veng na' maeé peue yeuh kan' nang veng na' pun ce ri mhawng' yeuh a keutit' na', ce hpum' ha' ron nyawk'. ⁹ Ce kah Cesan' eun maeé ec'awng' seubu na' ce tang' ri uin' leumuil. Hawc' ko', ce ploé ce.

Nang veng Beri'

¹⁰ Yam fec' ka na', ec'awng' na' ce keulawn' cus' Paw'lu eun maeé Silas' ka heul' nang veng Beri' na'. Yam rot ka teh' na', ka lec nang sa'la vang hk'o' mun' ce peue Yu'da na'. ¹¹ Peue veng Beri' na' ce kue' hpum' cang rap ri ti hk'ai' peue Hté'salo'ni' na' ce kopti rap ce ri ti leukah' aen' na hk'a'naee hpum' huk' ri na'. Punta kaw ce yawng lawng aen' cawp' un' cawp' ka na', ce ras ri nawk htawm Seungá

na' keuyuit. ¹² Peue Yu'da na' ce yum' heun' peue. Saec' meuh beun' ce peue Helasa' ku' kue' muis na' ce ngon' mae' a'ta' me heun' peue na' ce ku yum' yeut.

¹³ Yam peue Yu'da ut' nang veng Hte'salo'ni' na' pun ce ri mhawng' lawng Paw'lu buih sangsawn' eun leukah' Eun Peucawo' nang veng Beri' na', ce ku ing' mawn'. Ce ing' cu' peue cum heun' na' ce yeuh ku' suksak na'. ¹⁴ Ec'awng' na' ce keulawn' cus' Paw'lu eun heul' keunam ka ba mha'seumut' na'. Daecti Silas' eun mae' Ti'mo'se ka kawn' kuit' nang veng Beri' na'. ¹⁵ Peue heul' tuil' Paw'lu eun na' ce heul' tuil' eun rot nang veng Ehten. Hawc' ko', Paw'lu eun tawm' ce ing' kah Silas' eun mae' Ti'mo'se ka rip ri heul' ri ti seun' kaw ka cang heul' na'.

Nang veng Ehten

¹⁶ Yam Paw'lu kawn' ko' eun Silas' eun mae' Ti'mo'se ka nang veng Ehten na', kopti pun eun ri nyu nang veng Ehten awn' kue' ka ruphtu nuknhen' a na', eun kleh' nang hpum' ri nyawk'. ¹⁷ Kop awn' na, eun sa'lit peue Yu'da na' ce mae' peue Helasa' ku' lhat'til ri Peucawo' Eun na' ce nang sa'la vang hk'o' mun' na'. Eun ku sa'lit peue hk'eup' nyu ri nang keulas keuyuit na' ce yeut. ¹⁸ A kue' peue kue' cu'yi ti rit E'pi'ku'li' mae' rit Sato'e na' ce ing' htu'hting' eun. Ngon' ce lah', "Peue awn' eun ci' meunui' meunui' sum' lah' keunhaw'?" Ngon' ce lah', "Seun' a meuh eun nang eo' sangsawn' lawng eun peucawo' kuing' seubu ko'." Ce saec' lah' a yeuhko' na' kopti Paw'lu sangsawn' eun ce ri leukah' mun' ren'kawn lawng Eun Yesu' mae' lawng tang kuh' im' na'. ¹⁹ Kop awn' na, ce ti Paw'lu eun heul' nang vang hk'om muis Areopakas' na'. Ce lah', "Lawng ku' sangsawn' hk'u' buih sangsawn' mi aen' na, lak' kaw mi cang sangsawn' a ri ye yeut aw? ²⁰ Kopti ti mi kamkuit ku' un' duing mhawng' un' duing yawng ye na' ing' na', ye ku sum' yawng vangdoh' ka na' yeut." ²¹ (Peue veng Ehten

maeé peue hk'a' nok kuing' ut' teh' na' ce gawm'euc' lheu' si' sa' lit ce kamkuit hk'u' na' maeé leuceng ce a na', ce un' laee yeuh ku' seubu saec' ti ceu keuyuit.)

²² Paw'lu eun cawng ri leukah' nanggal' vang hk'om Areopakas' na', "Peue Ehten na' pe', pun ui' ri nyu meuh pe' nang satsana reng hk'a'naee ku ceu na'. ²³ Kopti yam eo' nawk ui' ku' faee' pe' na' meulamlam ri ti duih' hawc' ti duih' na', ui' pun ri nyu vang dum ri tan ku' tan ti duih' a tem' ri yeuhki', 'Meuh a pun Eun Peucawo' Cawo' un' yawng na'. Maet' maen', kaw ui' lah' ris pe' mhawng' lawng Eun Peucawo' Cawo' faee' pe', pe' un' yawng na' Eun.

²⁴ Eun meuh Peucawo' hpanpleng' bhen' keute' maeé ku' kue' hk'a' pang ka na' ce gawm'euc'. Eun meuh Cawo' ka pang ma' na' maeé bhen' keute' na'. Eun hkuin' ut' nang nya hk'o' mun' pleng' peue na'. ²⁵ Kaw peue yeuh mhai' Eun ri ti' ri na', Eun un' lo' a. Kopti meuh Eun Cawo' tuil' a'yu, tuil' guil' ghuih' hpum' na' maeé ku' seubu na' ce gawm'euc' ri peue. ²⁶ Tang' a ri peue ti peue rot ri peue ceu ku ceu ut' pang bhen' keute' na' ku duih' ka na', Eun hpanpleng' peue. Eun gvah ri uin' meuyam na', gvah ri uin' mhuil' kuing' vang kaw ce htuk' ri ut' na'. ²⁷ Peucawo' yeuh Eun a yeuhki' na', kopti punta kaw peue hot' ri sok ri nyu Eun. Daecti Eun un' ut' seungai ri e' saec' ti peue. ²⁸ Kopti hk'a'naee Eun na' e' kue' a'yu im' cang cheun' ri. Seun' ku' peue cai pe' ngon' lah' ce a nang leukah' cai na', 'E' meuh ceucat Eun.'

²⁹ Kop awn' na, e' lawn meuh ceucat Eun ko', e' na' htuk' ri un' hteum' Peucawo' Eun seun' hk'il', leumuil, seumu ku' kuit peue ri pleng' ri ti' ri meuh ruprang na' ce. ³⁰ Nanggal' aen' na kopti peue na' un' nang yawng ce a na', Peucawo' Eun un' tang' a' mu ri ce. Daecti maet' maen', Peucawo' Eun tuil' leukah' ri peue ut' ku duih' na' ce gawm'euc', kah ce taws' hpum' fuin map' ri hawc'. ³¹ Kopti hpawt' Eun seunyi

kaw ri taws' a'mu hk'a'naee hk'a'leupaws seumeu' ri na' ri peue bhen' keute' hawc' na'. Eun leuk peue ti peue kah Eun taws' a'mu tang' ri. Punta lawng aen' kaw a meuh sa'hki' ka ri peue gawm'euc' na', Peucawo' Eun yeuh peue aen' Eun tang kuh' im'."

³² Yam mhawng' ce lawng tang kuh' im' na', ngon' ce hkamram eun. Ngon' ce lah', "Tang sum' leuceng ye lawng ku' lah' mi na' bae." ³³ Hawc' ko', Paw'lu eun pucti heul' hk'ai' vang hk'om ce na'. ³⁴ Ngon' ce hot' Paw'lu eun heul'. Hawc' ko', ce yum'. Peue awn' ce a meuh Dionesias', eun meuh muk hk'om Areopakas', meuh beun' muis Damaris' bae peue seubu na' ce ngon'.

18

Nang veng Kaw'rinhtu'

¹ Hawc' awn' na, Paw'lu eun pucti heul' neum veng Ehten na', eun heul' nang veng Kaw'rinhtu' na'. ² Teh' na' eun hk'eup' peue ceu Yu'da ti peue, eun muis Ahkio'la'. Eun meuh peue kuing' Pawntas'. Kopti hkun'haw'hkam' Hkaodi'as' tuil' eun leukah' kah peue Yu'da na' ce pucti heul' hk'ai' veng Ro'ma na' gawm'euc' ri na', Aku'la' eun kawn' la ri pucti neum kuing' It'tali mae' beun' ri muis Pli'si'la' na' ka. Paw'lu eun heul' mae' ka. ³ Kopti Paw'lu meuh eun nang cing hpen' tup' seun' ka ri na', eun ku ut' mae' ka, yeuh kan' mae' ka. ⁴ Punta kaw eun sangsawn' pun peue Yu'da mae' peue Helasa' na' ce na', eun sa'lit ce nang sa'la vang hk'o' mun' na' ku Sin'.

⁵ Yam Silas' eun mae' Ti'mo'se puc ka ri neum kuing' Masido'ni' hawc' na', Paw'lu eun ku lo' yam ri na' htonnuk sangsawn' leukah' mun' ren'kawn na' mae' hkam' sa'hki' lawng Yesu' meuh Eun Hkrit na' ri peue Yu'da na' ce. ⁶ Daecti yam peue Yu'da na' ham' ce Paw'lu eun na', ce lah' ku' un' nawpsang ri heun. Eun raws' hk'o ri na' ri

ce. Eun lah', "Peucawo' Eun lawn na' ciyang pe' ko', lak' meuh a kopti pe' ri meun, a un' meuh kopti ui' ri. Tang' neum seunyaen' na' kaw ui' heul' ri peue un' meuh peue ceu Yu'da na' ce."

⁷ Hawc' ko', Paw'lu eun pucti heul' hk'ai' sa'la vang hk'o' mun' awn' na. Eun heul' ri nya eun Titias' Yutas' na'. Eun ku meuh peue faee' Peucawo' Eun. ⁸ Ro' ka sa'la vang hk'o' mun' muis Hkris'pas' na' eun mae' peue nya peue hk'ul' eun na' ce gawm'euc', ce yum' Peucawo' Eun. Saec' meuh peue Kaw'rinhtu' pun ri mhawng' ku' sangsawn' eun Paw'lu na', ce ku yum' rap ri ti hk'a' cum' na'.

⁹ Ti bul na', Peucawo' Eun lah' a ri Paw'lu eun hk'a'naee ku' limit eun na', "Pawlaee lhat', suip ri sangsawn' a heul'. Pawlaee dit' ti, ¹⁰ kopti ut' Ui' mae' mi. A'nhaw' hkuin' kaw cang keunhap', yeuh mi sui' saec' ti peue, kopti peue Ui' na' ut' ce nang veng aen' na heun' na'." ¹¹ Kop awn' na, Paw'lu eun ku ut' ri sangsawn' leukah' Eun Peucawo' na' mawn' ti neum pai' les chi'.

¹² Yam Galio' meuh eun cawo' keuting nang kuing' Ahkaiya' na', peue Yu'da na' ce pawng' puri kaw yeuh Paw'lu eun lu. Ce va eun heul' ri nang vang taws' a'mu na'. ¹³ Ce tang' a'mu lah', "Peue aen' cop' eun ri kah peue faee' Peucawo' Eun, a kleuc' ritroe kuing' ruik'."

¹⁴ Yam Paw'lu kaw eun leukah' na', Galio' eun lah' a ri peue Yu'da na' ce, "Peue Yu'da na' pe', pe' lawn kaw tang' a'mu keuting un' lah', aet' un' lah' ko', ui' kaw htuk' ri leuceng leukah' pe' na' yeut. ¹⁵ Daecti kopti meuh a lawng ku' kleuc' ri leukah', ri muis mae' ritroe pe' na', pe' na' heul' lah' a ri puri meun reu'. Ui' hkuin' kaw taws' a'mu ka lawng aen' na'." ¹⁶ Hawc' awn' na, eun kah ce hk'uih' hk'ai' vang taws' a'mu na'. ¹⁷ Hawc' ko', ce mheut' ri heul' ta'faet' ro' ka sa'la vang hk'o' mun' muis Sos'htenes' na'

eun nanggal' vang taws' a' mu na'. Daecti Galio' eun un' ti a' ye' ka saec' peunae'.

Paw'lu eun tang ing' nang veng Anhti'ok

¹⁸ Paw'lu ut' eun nang veng Kaw'rinhtu' na' ling'. Hawc' ko', eun am'la ec'awng' na' ce, eun pawk reu na' heul' nang kuing' Su'ri. Pli'si'la' eun mae' Ahkio'la' ka ku hot' eun heul' yeut. Nanggal' yam un' nang pawk eun reu na', eun kon' cing' ri na' nang veng Kechel na', kopti yeuh eun kati sat'ca' ri Peucawo' Eun na'. ¹⁹ Yam rot ce veng E'fe'su' na', Paw'lu eun uin' Pli'si'la' eun mae' A'ku'la' ka ut' mawn'. Heun ri ko', eun heul' lec ri sa'lit mae' peue Yu'da na' ce nang sa'la vang hk'o' mun' na'. ²⁰ Yam peue awn' hk'o' ce Paw'lu eun ut' mae' ti ling' na', daecti eun un' yeuh a. ²¹ Daecti yam kaw eun am'la ce na', eun tuil' kati ri ce lah', "A lawn cawp' alo Eun Peucawo' ko', ui' kaw tang ing' ri pe' bae." Hawc' ko', eun pawk reu na' pucti heul' hk'ai' veng E'fe'su' na'. ²² Yam heul' rot eun nang veng Kae'sari' na', eun huk' hk'eup' muk kon' Hkrit na' ce nang veng Yeru'salaem. Hawc' ko', eun tang heul' nang veng Anhti'ok na'.

²³ Hawc' ut' eun mawn' ti cu hka'o' na', eun tang pucti heul' nang kuing' Galati' mae' kuing' Fi'cia' na' hk'awp'. Eun heul' tuil' kaw'reng yeuh tapae' na' ce kaw'reng keuting.

Apaw'lu sangsawn' eun leukah' mun' nang veng E'fe'su'

²⁴ Yam awn' na, peue Yu'da muis Apaw'lu meuh peue veng Alek'sandrian na' eun ing' nang veng E'fe'su' na'. Eun meuh peue chanan leukah', yawng htawm Seunga' na' nyawk'. ²⁵ Eun tawn rin hk'a'naee hk'a' Eun Peucawo' na'. Eun leukah' mae' hpum' huk' ri. Eun saec' yawng yawo pal hk'a' cum' sangsawn' eun Yo'han na' ti ceu koe, daecti eun sangsawn' lawng Eun Yesu' na' cawp'maen. ²⁶ Eun

tang' hpum' ri hat'han' leukah' nang sa'la vang hk'o' mun' na'. Yam Pli'si'la' eun maeé Ahkio'la' mhawng' ka ku' sangsawn' eun na', ka klawng eun ing' ti nya ri. Punta Apaw'lu kaw eun gawm ceng' ri lawng hk'a' Eun Peucawo' na', ka lah' ris sangsawn' eun.

²⁷ Yam Apaw'lu sum' heul' eun nang kuing' Ahkaiya' na', ec'awng' na' ce tuil' kaw' reng eun. Punta tapae' ut' teh' na' kaw ce rap ri ti eun na', ce tem' ri tuil' lai ri ce. Yam rot eun teh' na', kopti meuh a mun' Eun Peucawo' na', peue ing' yum' na' ce eun teum'kawm ce. ²⁸ Kopti htu'hting' reng eun peue Yu'da na' ce nanggal' ce peue heun' na'. Yesu' meuh Eun Hkrit na', eun tuil' ce nyu a nang htawm Seunga' na' meulamlam ri.

19

Paw'lu ut' eun nang veng E'fe'su'

¹ Yam Apaw'lu kawn' ut' eun nang veng Kaw'rinhtu' na', Paw'lu eun heul' hpa' nang ngon' ka kuing' na', eun rot nang veng E'fe'su'. Eun pun ri hk'eup' tapae' na' ce teh' ngon'. ² Eun mhaing' ce, "Yam yum' pe' na', pun pe' Cit' seunga' chak' na' aw?"

Ce top' a, "Uih', ye hkuin' duing mhawng' kue' a Cit' seunga' chak'."

³ Kop awn' na, Paw'lu eun tang mhaing' ce, "Yeuh keutit' ko', pe' ci' rap ri ti hk'a' cum' nangnhaw' na'?" Ce top' a, "Rap ye ri ti hk'a' cum' eun Yo'han na'." ⁴ Paw'lu eun lah', "Cum' leuum' eun Yo'han na' meuh a hk'a' cum' taws' hpum' fuin map' ri. Yo'han eun lah' a ri peue heun' na' ce. Eun kah ce yum' Cawo' ku' kaw ing' hk'a'ku' ri na' Eun. Cawo' awn' a meuh Yesu' Eun." ⁵ Yam pun ce ri mhawng' leukah' awn' a na', ce rap ri ti hk'a' cum' na' hk'a'naee muis Eun Cawo' Yesu' na'. ⁶ Yam Paw'lu tang' eun ti' ri hk'a' pang ce na', Cit' seunga' chak' na' a lih hk'a'pang ce. Ce lah'

leukah' peue ceu heun' ceu na' mae' leukah' tamnai na'.
⁷ Ce ri gawm'euc' ce meuh me, ce kue' hk'ao ri kul'leual' peue na'.

⁸ Paw'lu eun lec nang sa'la vang hk'o' mun' na', eun tang' hpum' ri hat'han' sangsawn' ce pun loe' chi'. Eun sa'lit ce sangsawn' lawng kuing' Eun Peucawo' na' ri ce.
⁹ Daecti ngon' ce hpum' cen', ce hkuin' va ri yum'. Ce saesawm' "hk'a' ka ritroe aen' na" nanggal' ce peue heun' na'. Kop awn' na, Paw'lu eun gvah tapae' ri na' ce pucti heul'. Ce heul' sa'lit puri nang hkawng vang hk'om eun Tirannas' na' keuyuit. ¹⁰ Eun yeuh keutit' pun lal' neum rot ri peue Yu'da mae' peue Helasa' ut' nang kuing' Asa' na' ce gawm'euc' ce pun ri mhawng' leukah' Eun Yesu' na'.

¹¹ Peucawo' Eun cu Paw'lu eun yeuh ku' hk'o'am' na' lheu' pok nanggal' na'. ¹² Yam po peue hpa'cet mae' hpen' hal' tu' Paw'lu tawn paic' eun na' ri hk'a'pang peue peuyhat na' ce na', ce ku cuin. Seuca' rai na' a ku pucti heul' hk'ai' ce.

¹³ Peue Yu'da na' ce ngon' ce cheu ri cu muis Eun Yesu' na', ce eo' ra ri tec seuca' rai na' pucti heul' hk'ai' peue seuca' lec na' ce ku duih'. Ce tuil' leukah' lah, "Hk'a'naee muis Eun Yesu' ku' Paw'lu sangsawn' eun na', uí tuil' leukah' kah mi pucti heul'." ¹⁴ Saec' meuh kon' a' res peue eun Sakeva' ku' meuh ro' peue jhawp' rit ce peue Yu'da na' ce ku yeuh keutit' yeut. ¹⁵ Ti seunyi na', seuca' rai na' a top' a ri ce, "Yawng uí Yesu' Eun yeut. Saec' meuh lawng eun Paw'lu na', uí ku tawn mhawng' a yeut. Daecti pé' cí meuh a'nhaw'?" ¹⁶ Hawc' ko', peue seuca' rai lec ka na' eun ku yawt' ri lhaw' ri ri ce. Eun pe ce gawm'euc'. Ce beus nham' ri ut' gung'gang' pun ri pucti hk'uih heul' hk'ai' nya na'.

¹⁷ Yam peue Yu'da mae' peue Helasa' ut' nang veng E'fé'su' na' ce gawm'euc' pun ce ri yawng lawng aen' a na',

ce lhat' nyawk'. Ce yuk muis Eun Cawo' Yesu' na' keuting lhung'. ¹⁸ Maet' maen' peue yum' hawc' na' ce heun' peue, ce ing' ris ku' kleuc' yeuh ri na' glih' gleueng'. ¹⁹ Peue cang kahta' na' ce heun' peue ce ti ri ing' dum bawl' htawm kahta' ri na' nanggal' ce peue heun' na'. Ngos ka htawm awn' na ko', a ngos hpawn' mhuin' draec' ma* ²⁰ Kop awn' na, leukah' Eun Peucawo' na' a puin' ri kuin vah heul', a gawm ti'ca keuting heun'.

²¹ Hawc' ka lawng aen' yeuh a keutit' na', Paw'lu kaw eun hpa' kuing' Masido'ni' mae' kuing' Ahkaiya' na' heul' nang veng Yeru'salaem na' eun kuit a deut. Eun lah', "Hawc' rot ui' teh' na', ui' ku kaw htuk' ri heul' glue nang veng Ro'ma na' yeut." ²² Paw'lu eun cus' nang teum'kawm ri lal' peue ka heul' nang kuing' Masido'ni' na'. A meuh Ti'mose eun mae' E'ratas' ka. Daecti heun ri, eun kaw' ut' nang kuing' Asa' na' ti cu hkao'.

Suksak nang veng E'fe'su'

²³ Yam awn' na, kop meuh a "hk'a' ka ritroe aen' na", ku' suksak na' a keut' kue'. ²⁴ A kue' peue tawng' leumuil muis Demetri'as' ti peue. Eun tawng' leumuil na' meuh tup' aet' ka peucawo' ma muis Atemis' na'. Peue tawng' leumuil na' ce ku koe pun leumuil heun' nyawk'. ²⁵ Eun klawng peue tawng' leumuil na' ce mae' peue yeuh kan' to' ri ri kan' awn' ce hk'om. Eun lah', "A'mawo na' pe', meuh a kopti kan' aen' a na', e' meuneum na' yawng pe' a yeut. ²⁶ Paw'lu aen' hpawe eun ce na' punta peue nang veng E'fe'su' aen' na mae' nang kuing' Asa' na' kaw a daee meuh ce gawm'euc' kaw ce kleuc' hk'a' ri na', pe' ku pun ri nyu yawng a. Eun lah' ruphtu pleng' peue ri ti' ri na' a un' meuh peucawo'. ²⁷ Ceu nang aen' kaw a yeuh dang ka e' na'

* **19:19** 19:19 Draec' ma' na' a meuh htaep' na' ti htaep', a ngos seunyi reng peue ti seunyi.

lu. A ku kaw yeuh hk'a' yum' ce peue yum' nya hk'o' mun' ka peucawo' ma Atemis' keuting na' kloee. Munhpung' ka peucawo' ma Atemis' ku' peue kuing' Asa' mae' peue pang bhen' keute' faee' ce na', a ku kaw lu yeut."

²⁸ Yam mhawng' ce leukah' awn' a na', ce seungeueng' nyawk'. Ce tang' ri ta'ul' ri lah', "Peucawo' Atemis' ce peue E'fe'su' na' a keuting lhung'." ²⁹ Hawc' ka na' un' ling', a seutuin seutan nang veng awn' na gawm'euc'. Ku' meuh peue long hk'a' mae' Paw'lu eun neum veng Masido'ni' muis Gaias' mae' Aritahkas' na' ka ce yat ka lec vang peue veng na' hk'om ce puri na'. ³⁰ Paw'lu eun saec' sum' lec hk'a'naee ce peue cum heun' na', daecti tapae' na' ce ham' eun. ³¹ Saec' meuh a'mawo eun Paw'lu ku' meuh ro'kan nang kuing' awn' a na' ce ngon', ce tawm' leukah' ri hk'o' eun un' kah eun ing' lec a yeut.

³² Hk'a'naee vang hk'om na' a seutuin seutan nyawk'. Ngon' ce klawng ri lah' a yeuhko', ngon' ce klawng ri lah' a yeuhki'. Peue hk'a' heun' na' ce un' yawng yeuh ri keunhaw' mawn'. ³³ Peue Yu'da na' ce cut' Alek'sando' eun ing' nanggal' ce na'. Eun ci' kaw htuk' ri lah' keunhaw' na', hk'a'naee peue cum heun' na' ce ngon' ce ta'ul' klawng ri tuil' kamkuit eun. Punta kaw eun lah' leukah' kah' tu' ri nanggal' ce peue cum heun' na', eun kvae' ti' ri kah ce dit' ti. ³⁴ Daecti yam yawng ce meuh eun peue Yu'da na', ce klawng ri lah' leukah' ti moeng gawm'euc' ri hk'ao lal' nali na'. Ce lah', "Peucawo' Atemis' ce peue E'fe'su' na' a keuting lhung'."

³⁵ Peue yeuh kan' nang veng na' eun kah peue cum heun' na' ce dit' ti. Hawc' ko', eun lah' a ri ce, "Peue E'fe'su' na' pe', veng E'fe'su' e' na' meuh ka nang rok'sa' nya hk'o' mun' ka peucawo' ma Atemis' keuting na' mae' ruphtu ka Atamis' lih neum pang mao' na', yawng peue a ku peue ri, un' meuh ka aw? ³⁶ Kopti lawng ku' meuh neum aen'

un' laee cang htú'hting' pun a ri hawc' na', pé' na' htuk' ri dit'ti. Pawlaee yeng ri yeuh. ³⁷Peue aen' ce hkuin' rabawk' nya hk'ó' mun' na', ce hkuin' un' nawpsang ri peucawo' é' na', daecti pé' teuk' ce ing' maen'. ³⁸Daecti Demetri'as' eun maeé' a'mawo eun ku' meuh peue tawng' leumuil na' ce lawn sum' yeuh leukah' leupong ri peue ti ri peue ko', sa'nam' na' a ku tuh' ri, a ku kue' nang taws' a'mu. Uin' ce lak' to'tam' puri meun reu'. ³⁹Pé' lawn kue' a'mu ko', pé' kaw htuk' ri heul' sa'lit a vang hk'om taws' a'mu na' tam' ritroe ka na'. ⁴⁰Kopti meuh a ku' keut' kue' seunyaen' aen' a na', peue kaw cang tang' a'mu hk'a' pang e', meuh e' nang yeuh ku' suksak veng. Kopti lawng ku' suksak aen' a cí' keut' kue' kop keunhaw' na', e' kaw un' kue' ku' kaw top' a ri peue." ⁴¹Hawc' lah' eun a yeuh keutit' na', eun kah hk'om na' hawc'.

20

Paw'lu heul' eun nang kuing' Masido'ni' maeé' kuing' Helasa'

¹Yam ku' seutuín seutan na' yen' ka hawc' na', Paw'lu eun klawng ri tuil' kaw'l'reng ce tapae' ri na. Hawc' ko', eun am'la ce heul' nang kuing' Masido'ni' na'. ²Eun heul' ti duih' hawc' ti duih' nang kuing' Masido'ni' na', eun lah' leukah' heun'heun' tuil' kaw'l'reng peue. Vang tisut' ka na', eun heul' rot nang kuing' Helasa'. ³Eun ut' teh' pun loe' chí'. Kopti yawng eun peue Yu'da na' sa'lit ce puri kaw toh eun yeum na', eun pawk reu heul' nang kuing' Su'ri' na'. Eun kuit ri kaw tang ing' kuing' Masido'ni' na' eun kuit a deut. ⁴Peue heul' maeé' Paw'lu eun na' ce a meuh Saw'pataru' kon' me eun Plí'ras' peue veng Beri', Aritahkas' eun maeé' Sekundas' peue veng Hté'saló'ni', Gaias' peue veng Deube, Ti'mó'se, Tai'hki'kas' eun maeé' Trofimas' peue kuing' Asa' na' ka. ⁵Peue aen' ce bai

heul' ko' ye nang veng Tro'as' na'. ⁶ Yam pawe un' seue' hkawomun' is' paeng na' hawc' ka na', ye pawk reu na' pucti heul' hk'ai' veng Hpi'li'pi' na'. A pun hpawn' seunyi, ye ing' hk'eup' nyu ce nang veng Tro'as' na'. Ye ut' teh' a' res seunyi.

Yutikas' tang kuh' im' eun nang veng Tro'as'

⁷ Seunyi keuhti ka vung na',* ye hk'om puri kaw ves hkawomun' na'. Paw'lu eun leukah' ri peue heun' na' ce. Kopti kuit eun kaw ri pucti heul' peunsa' ka na', eun leukah' mae' ce rot ri nuik' ka. ⁸ Nang htan hk'a'tuh hong' vang hk'om ye na' a kue' kaw' ngawl heun'. ⁹ Nang nhum' muis Yutikas' na' eun mok' nang hpa'pong' na'. Paw'lu na' eun gawm leukah' ling'. Yutikas' eun ku gawm it' jing' nyawk'. Yam pun eun ri it' na', eun hk'ui'c' hk'ai' nya loe' htan na' lih rot pang keute'. Na' ce ing' cem eun, ce pun ri nyu yeum eun hawc'. ¹⁰ Paw'lu eun lih nghup' ri hk'a' pang eun. Hawc' ko', eun cem eun. Eun lah', "Pawlaee pao, kaw'n' kue' eun hpum'." ¹¹ Hawc' awn' na, Paw'lu eun tang huk' htan hk'a'tuh na'. Eun ves ri hk'a' hkawomun' na' ce u puri rot ri ceng' ka. Hawc' ko', eun tawm' ce, eun pucti heul' hk'ai' ce. ¹² Ce va nang nhum' kaw'n' a'yu im' awn' eun ing' ti nya eun na', ce ren'kaw'n' nyawk'.

Kuh' neum veng Tro'as' heul' nang veng Meletas'

¹³ Punta kaw ye rap ri ti Paw'lu eun seun' hpawt' ye a ri puri na', ye pawk reu na' heul' nang veng Asos' na'. Kopti Paw'lu kaw eun long hk'a' ing' hk'eup' ye teh' na'. ¹⁴ Yam hk'eup' ye eun nang veng Asos' na', ye ku rap ri ti eun lec reu na' heul' nang veng Meti'lene' na'. ¹⁵ Ye pucti heul' neum mawn' na'. Peunsa' ka na', ye rot keunam ka kaw' Hki'os' na'. Leuku' ka na', ye rot nang kaw' Samos'

* **20:7** 20:7 Seunyi nanggal' ka vung ce peue Yu'da na' a meuh seunyi Sin' na'.

na'. Leucec' ka na', ye rot nang veng Meletas' na'. ¹⁶ Punta Paw'lu kaw eun un' laee sum yam ri nang kuing' Asa' na', eun kuit ri kaw pawk reu na' hpa' keulawn' veng E'fe'su' na' heul'. Kopti a lawn kaw cang meuh ko', eun sum' heul' hk'eup' seunyi Peteko'te na' nang veng Yeru'salaem na' vaeveae.

Paw'lu leukah' eun ri ro'kan nang kawt E'fe'su' na' ce

¹⁷ Paw'lu eun ku cus' peue heul' klawng ro'kan nang kawt muk kon' Hkrit nang veng E'fe'su' na' ce ing' ri ti nang veng Meletas' na'. ¹⁸ Yam ing' rot ce na', Paw'lu eun lah' a ri ce, "Tang' neum seunyi yamla ui' ri rot nang kuing' Asa' na', ui' ci' ut' mae' pe' yeuh sa'nhaw' na', pe' tup yawng a laleung. ¹⁹ Ui' saec' na' pun ri hkam' hk'a' cop'long kopti peue Yu'da na' sa'lit ce puri kaw toh ui' na', daecti ui' yeuh mhai' Eun Peucawo' na' hk'a'naee vang tang' ui' hpum' ri onawn' mae' leuum' ngai' ri. ²⁰ Pe' ku yawng sangsawn' ui' leukah' mun' kue' mun' pun pe' na', ui' un' laee vel a saec' ti ceu. Daecti ui' sangsawn' a ri pe' nanggal' peue cum heun' na' mae' nang nyahk'ul' pe' na' ce yeut. ²¹ Hkam' ui' sa' hki' ri peue Yu'da mae' peue Helasa' na' ce. Ce kaw kah ri taws' hpum' fuin map' ri, hpawt' ri ing' ri Peucawo' Eun mae' yum' hk'a'naee Yesu' Eun.

²² Maet'maen' Cit' seunga' na' kah ka ui' heul' nang veng Yeru'salaem. A na' kaw meuh keunhaw' ri ui' teh', ui' hkuin' yawng a. ²³ Ui' yawng yawo Cit' seunga' chak' na' tuil' a sati ui' ri nang veng ku veng na', a lah' ui' kaw hk'eup' htawng' mae' ku' keunhap' nokneh na' ko' ka ui'. ²⁴ Daecti a'yu ui' na' ui' un' sawn' a ngos heun' ri ti. Ui' lawn long yawo hk'a' kaw ui' pun ri long na' rot ri sut' ka mae' yeuh yawo kan' meuh sa' hki' ka lawng leukah' mun' ren'kawn mun' Eun Peucawo' ku' Yesu' tuil' Eun ri ui' na' hawc' ko', na' a hk'o'.

²⁵ Maet'maen' yawng uí ku' pun pé ri mhawng' lawng ku' eó sangsawn' uí lawng ka kuing' Eun Peucawó' hawc' na' kaw pé nyu buh uí bae na', a un' laee kue' saec' ti peue. ²⁶ Kop awn' na, pao' uí a ri pé seunyaen', Peucawó' Eun lawn na' ciyang pé ko', a un' meuh kopti uí ri. ²⁷ Kopti kaw uí sangsawn' alo Eun Peucawó' na' ri pé gawm'euc' ka, uí un' duing vel a. ²⁸ Nom'nawk tu' pé na' maeé muk kon'yung' ku' Cit' seunga' chak' na' uin' a pé meuh nang nom'nawk rok'sa' na' ce meulamlam ri reu'. Meuh nang ko' kon'yung' muk kon' Hkrit Eun Peucawó' ku' Peucawó' leuvaee Eun hk'ai' nham' ri na' reu'. ²⁹ Yawng uí, hawc' puc uí ri heul' na', ruk sa'haó' na' kaw a ing' lec nang muk pé na'. A kaw un' laee uin' muk kon'yung' na' vang saec' ti tu'. ³⁰ Saec' meuh hk'a'naee pé ri, punta kaw pé rim' ri ti tapae' na' ce hot' ri na', ngon' pé kaw kuh' plo'h'pleh' leukah' seumeu' na'. ³¹ Kop awn' na, rangraen ri ko' reu'. Kuit rot ri un' laee keului' uí ri uí tuil' sati pé ku peue ri maeé leuum' ngai' ri gawm' sum' gawm' seunyi pun loe' neum na' reu'.

³² Maet'maen' ap uí pé ri Peucawó' Eun maeé leukah' mun' Eun ku' cang yeuh pé huk'hawn', cang kah pé is' sin' tiduih' maeé peue pun ri saic' ri seunga' na' ce gawm'euc'. ³³ Uí hkuin' sé'dai' hk'il', leumuil maeé hk'ohk'eung a'nhaw'. ³⁴ Cu uí tí ri na' uí sok ku' lo' uí na' maeé ku' lo' ce peue ut' maeé uí na' ce, pé ku yawng a. ³⁵ Ku' pun uí ri yeuh pé nawk heul' hawc' na' ce ku ceu ka hk'a'naee vang sae'caee' yeuh kan' seun' aen' a na', e' na' kah ri teum'kawm peue kaw'l'reng kloee na' ce. Kuit rot ri ku' Yesu' lah' Eun na' reu'. Eun lah', 'Tuil' na' ko', mun' keuting a hk'ai' pun na'.' "

³⁶ Yam Paw'lu hawc' lah' eun a na', eun seukluin ri hk'o' mun' maeé ce gawm'euc'. ³⁷ Yam buih cem ce ri huit' Paw'lu eun na', ce yam gawm'euc' ri. ³⁸ Ku' yeuh ce

mhong'mhil' nyawk' na' kopti Paw'lu lah' eun ce kaw un' laee pun ri nyu buh ri bae na'. Hawc' ko', ce heul' tuil' hk'a' eun rot ri reu na'.

21

Paw'lu heul' eun nang veng Yeru'salaem

¹ Hawc' gah' ye hk'ai' ce na', ye pawk reu na' seumeu' heul' ri kaw Kos' na'. Hawc' ka na' ti seunyi, ye heul' ri kaw' Rodes' na'. Neum teh' na', ye rot nang veng Patara' na'.

² Ye nyu reu kaw heul' ri kuing' Hpi'ni'sia na', ye ku pawk reu awn' a heul'. ³ Hawc' nyu ye kaw' kuing' Sai'plas' na', ye heul' hk'a' col ka na' ye rot kuing' Su'ri' na'. Reu na' a tah' ri hue' hk'eung ri na' nang veng Tai'ra' na'. ⁴ Ye hk'eup' tapae' na' ce teh'. Ye keului' ri mae' ce a' res seunyi. Cit' seung' na' a cu tapae' na' ce hk'o' hk'ang un' laee kah Paw'lu eun heul' nang veng Yeru'salaem na'. ⁵ Daecti yam rot a yam ka na', ye ku gah' hk'ai' ce. Ye suip hk'a' ri heul'. Tapae' na' ce mae' beun' kon' ce na' ce tuil' ye rot hk'a' nok ka veng na'. Ye seukluin ri hk'o' mun' keunam ka ba mha'seumut' na'. ⁶ Hawc' am'la ye puri na', ye lec reu na'. Ce ku ing' ti nya ri.

⁷ Neum veng Tai'ra' na', ye suip ri heul' rot nang veng Polemas' na'. Ye heul' hk'eup' ec'awng' na' ce teh'. Ye keului' ri mae' ce ti seunyi. ⁸ Hawc' ka na' ti seunyi, ye pucti heul' neum teh' na', ye rot nang veng Kae'sari' na'. Ye keului' ri nang nya eun Hpi'lip' ku' meuh nang sangsawn' leukah' mun' ren'kawn. Eun meuh peue ut' hk'a' naee muk ce peue a' res peue* na' ti peue. ⁹ Eun kue' kon' beun' kawn' meuh kon' hk'ih' pun' peue. Ce meuh beun' suip leukah' Eun Peucawo'.

¹⁰ Hawc' ut' ye teh' heun' seunyi na', a kue' peue suip leukah' Eun Peucawo' ing' neum kuing' Yu'da muis

* 21:8 21:8 Peue caee 6:5

Agabas' ti peue. ¹¹ Eun ing' ri ye. Eun ti sae'caet' eun Paw'lu na' eun mawt ti' cung ri na' ri ka. Hawc' ko', eun lah', "Cit' seunga' chak' na' lah' ka a yeuh keutit', 'Peue Yu'da ut' nang veng Yeru'salaem na' kaw ce mawt cawo' ka sae'caet' aen' eun yeuhki'. Ce kaw ap eun ri peue un' meuh peue ceu Yu'da na' ce.' "

¹² Yam pun ye ri mhawng' leukah' awn' a na', ye ri mae'e' peue ut' mawn' na' ce ye hk'o'hk'ang Paw'lu eun un' laee heul' nang veng Yeru'salaem na'. ¹³ Paw'lu eun top' a, "A ci' meuh kop keunhaw' pe' vae'e' yam, yeuh hpum' ui' kaw gvah'. Un' mak' nang lah' chae'e' kaw peue mawt ui'. Ui' saec' na' pun ri yeum nang veng Yeru'salaem na' ko', kopti meuh a muis Eun Yesu' na', rangraen ui' ri hawc'." ¹⁴ Yam un' laee leuceng eun leukah' ye na', ye un' laee hk'o'hk'ang a ri heun bae. Ye lah', "Kah a meuh hot' alo Eun Peucawo' reu'."

¹⁵ Hawc' ko', ye rangraen ri huk' nang veng Yeru'salaem na'. ¹⁶ Tapae' ut' nang veng Kae'sari' na' ce ku heul' meu ye ngon'. Ce va ye heul' keului' ri nang nya eun Manasan na'. Eun meuh peue ing' neum kaw' kuing' Sai'plas' na'. Eun meuh tapae' muk nanggal' na' ce.

Paw'lu rot eun nang veng Yeru'salaem

¹⁷ Yam rot ye nang veng Yeru'salaem na', ec'awng' na' ce ren'kawn rap ri ti ye. ¹⁸ Hawc' ka na' ti seunyi, Paw'lu eun mae'e' ye ri ye heul' hk'eup' Yakop' eun. Ro'kan nang kawt na' ce ku cu ri mawn' gawm'euc' ri. ¹⁹ Hawc' Paw'lu lah' eun leukah' hk'eup' puri mae'e' ce na', eun ris ce mhawng' lawng ku' Peucawo' yeuh Eun ri muk ce peue un' meuh peue ceu Yu'da na' hk'a'naee kan' yeuh ri na' meulamlam ri.

²⁰ Yam pun ce ri mhawng' a na', ce suk'seun' Peucawo' Eun. Ce lah' a ri Paw'lu eun, "Nawepi, peue Yu'da pun ri yum', ce ti leukah' ritroe na' seucen gawm'euc' ri na', ce

ci' kue' a'neng heng' peue mi ku nyu a yeut. ²¹ Ce pun ri mhawng' sangsawn' mi peue Yu'da ut' mae' peue un' meuh peue ceu Yu'da na' ce, mi kah ce hpawt' ri hk'uih ri Mo'se eun, un' kah ce ton' duing' hak' ce kon' ri na' mae' un' kah ce hot' ritroe e' na'. ²² E' ci' kaw htuk' ri yeuh sa'nhaw'? Ing' rot mi na' kaw ce yawng a neum yeut. ²³ Kop awn' na, mi na' hot' ri yeuh seun' ku' lah' ye na' reu'. Kue' e' peue yeuh kati sat'ca' pun' peue. ²⁴ Va ce heul' yeuh ritroe yeuh ri seunga' na' tiduih' mae' ce reu'. Punta kaw ce kon' cing' ri na', tuil' ngos ka pun ce reu'. Yeuh keutit' ko', peue kaw pun ri yawng lawng ku' pun ce ri mhawng' lawng mi na' un' meuh ka ku' neumneum. Daecti ce kaw pun ri yawng a'yu im' mi hot' ritroe na' heul' meulamlam ri yeut. ²⁵ Pun ce peue un' meuh peue ceu Yu'da yum' na' ce ko', ye tem' ri tuil' lai ku' hk'o' ye, ye taws' a deut ri ce na' kah ce vel hk'a ku' hk'a tan ri ruphtu, hk'a nham', hk'a keune sat' seurot' ngok ri yeum na' mae' hk'a' hkuit'nawng'tang' na'."

²⁶ Hawc' ka na' ti seunyi, Paw'lu eun va peue pun' peue awn' ce heul' yeuh ritroe yeuh ri seunga' na' tiduih'. Hawc' ko', punta kaw eun pao' peue mhawng' seunyi yam yeuh ce ritroe seunga' na' htonnuk ka na', mae' punta kaw eun tan ku' tan pun ce peue nhaw' peue awn' ri na', eun ing' lec nang nya hk'o' mun' keuting na'.

Mheut' Paw'lu eun

²⁷ Yam kaw a hk'aws' htonnuk a' res seunyi na', peue Yu'da ing' neum kuing' Asa' na' ce pun ri nyu Paw'lu eun nang nya hk'o' mun' keuting na'. Ce heul' cu'ci' peue cum heun' na' ce. Hawc' ko', ce mheut' Paw'lu eun. ²⁸ Ce klawng ri lah', "Peue I'sarela' na' pe', teum'kawm ye vae. Peue aen' meuh eun peue sangsawn' peue ut' ku' duih' na' ce hkat'hkan peue ceu e', ritroe e' mae' nya hk'o' mun' keuting e' aen' na. Lheu' awn' na eun va peue Helasa' na'

ce ing' lec nang nya hk'o' mun' keuting na'. A yeuh vang seungá' chak' na' hk'aw'jeuk." ²⁹ (Nanggal' aen' na pun ce ri nyu Trofimas' peue E'fé'su' na' ut' eun maeé' Paw'lu eun nang veng na'. Kop awn' na, ce hteum' Paw'lu eun va eun ing' lec nang nya hk'o' mun' keuting na'.)

³⁰ Peue veng na' ce seutuín seutan gawm'euc'. Peue cuca ri ing' neum ku hon', ce ing' mheut' Paw'lu eun. Ce ol' eun pucti lih hk'a'nok ka nya hk'o' mun' keuting na', ce keulawn' sawng' leuva' ka na'. ³¹ Yam buih có'ca' ce ri kaw toh Paw'lu eun na', hkao' lawng ku' suksak nang veng Yeru'salaem na' a rot ri po' suik' keuting ce peue suik' Ro'ma na' eun. ³² Eun keulawn' va po' suik' maeé' peue suik' ri na' ce lih vang ut' ce peue cum heun' na'. Yam peue yeuh ku' suksak na', pun ce ri nyu po' suik' keuting eun maeé' peue suik' eun na' ce, ce yut' klaeé' ri Paw'lu eun na'.

³³ Po' suik' keuting na' eun ing' mheut' Paw'lu eun. Eun kah ce mawt eun ri mu' lhec' lah' nyeng. Hawc' ko', eun mhaing' lah', "Eun cí' meuh a'nhaw'? Eun cí' yeuh keunhaw'?" ³⁴ Peue cum heun' na' ce ngon' ce klawng ri lah' a yeuhko', ngon' ce klawng lah' a yeuhki', a suksak nyawk'. A yeuh po' suik' na' eun un' cang ti ku' lah' ce na' a cí' meuh keunhaw' neum. Kop awn' na, eun kah ce va Paw'lu eun huk' nang tawp ce peue suik' na'. ³⁵ Yam rot ce ri bong' na', peue suik' na' ce pun ri jong' eun heul' kopti peue cum heun' na' seungeueng' nyawk' ce. ³⁶ Ce hot' ri klawng ri lah' yawo, "Toh eun reu'."

Paw'lu leukah' eun ri peue heun'

³⁷ Yam peue suik' na' kaw ce va Paw'lu eun huk' lec nang tawp ri na', Paw'lu eun mhaing' po' suik' keuting na' eun, "Kaw ui' cang hk'o' ri leukah' ri mi aw'?"

Pó suik' keuting ná eun mhaing' eun, "Lak' yawng mi leukah' Helasa' yeut aw? ³⁸ Un' meuh mi peue E'ji'tu' ku' fuin kuing' maeé va peue rai hpawn'heng' peue ce heul' nang vang hk'oh'hk'oeng' nanggal' aen' a ná eun aw?"

³⁹ Paw'lu eun top' a, "Meuh uí peue Yu'da ing' neum veng Tarsas' kuing' Si'li'si' ná. Uí meuh peue ka veng muis laws' ná. Hk'o' mi tuil' ahkvang kaw uí leukah' ri peue heun' ná ce."

⁴⁰ Yam pó suik' keuting ná tuil' eun ahkvang ka ná, Paw'lu eun cawng ri bong' ná eun yuk tí ri ri peue heun' ná ce. Yam yen' ce ná, eun lah' leukah' Arame'. Eun lah',

22

¹ "Ec'awng' maeé a'kuiing' ná pe', hk'o' pé leuceng leukah' kaw uí lah' ná."

² Yam mhawng' ce lah' eun leukah' Arame' ná ce dit'ti yen'. Hawc' ko', Paw'lu eun lah' a, ³ "Meuh uí peue Yu'da keut' nang veng Tarsas' kuing' Si'li'si' ná, daecti uí keuting nang veng Yeru'salaem aen' na. Uí meuh luksic' eun Gamalela'. Uí pun ri rin leukah' ritroe ce a'ta' a'ya é ná meulamlam ri. Uí ku hpum' huk' hk'a'nae Peucawó Eun seun' buih hpum' huk' pé seunyaen' ná yeut. ⁴ Uí tawn keunhap' peue hot' 'hk'a' ka ritroe aen'" ce rot ri toh uí ce. Uí mheut' ri seue' beun' me ná ce nang htawng'.

⁵ Saec' meuh peue jhawp' rit keuting maeé muk peue taws' kan' ná kaw ce cang meuh sa'hki' uí ná. Uí yeuh a rot ri heul' hk'o' uí lai ri ce punta kaw uí heul' tuil' a ri ec'awng' ce ku' ut' nang veng Damas'kas' ná ce. Hawc' ko', punta kaw uí mheut' peue awn' ce meuh peue htawng' ing' ciyang ce nang veng Yeru'salaem ná, uí heul' nang veng Damas'kas' ná.

Paw'lu ris eun lawng taws' ri hpum' ri

⁶ Yam peunnyi keuting yam kaw uí hk'aws' rot nang veng Damas'kas' na', a keulawn' kue' ku' ceng' reng nyawk' lih neum pang maó' na'. A htawng' uí rop. ⁷ Uí' cung'kus pang keute' na', uí' pun ri mhawng' seng' na' lah' ka ri uí', 'Saw'lu, Saw'lu, a cí' meuh kop keunhaw' mi vae' keunhap' Uí'?

⁸ Uí' mhaing', 'Cawó', Mi cí' meuh a'nhaw'?

Eun top' a, 'Meuh Uí' Yesu' peue veng Nasaraet' ku' keunhap' mi na' Eun.' ⁹ Peue hot' uí' na' ce saec' nyu ku' ceng' awn' a na', daecti ce hkuin' mhawng' leukah' lah' ri ri uí' na'.

¹⁰ Uí' mhaing' Eun, 'Cawó', uí' cí' kaw htuk' ri yeuh sa'nhaw'?

Cawó' Eun lah', 'Kuh' heul' nang veng Damas'kas' na' reu'. Teh' na' kaw a kue' nang kaw lah' mi mhawng' yawng ku' kaw mi htuk' ri yeuh na'. ¹¹ Kopti ku' ceng' awn' yeuh ka ngái' uí' fec' na', peue hot' uí' na' ce teuk' tí' uí' na' ing' nang veng Damas'kas' na'.

¹² A kue' peue muis Anani' ti peue eun ing' ri uí'. Eun meuh peue reng hk'a'naee leukah' ritroe na'. Peue Yu'da ut' teh' na' ce gawm'euc' ce yumyam' eun nyawk'. ¹³ Eun cawng keunam uí' na', eun lah', 'Awng' uí' Saw'lu, tang cang nyu hk'a' ri reu'. Yam awn' na, uí' ku cang nyu eun.

¹⁴ Hawc' ko', eun lah', 'Peucawó' Eun a'ta' a'ya e' na' leuk Eun ri ti mi. Eun kah mi yawng alo ri na', kah mi pun ri nyu hk'a' leupaws seumeu' na' mae' kah mi pun ri mhawng' leukah' lih neum moeng ri na'. ¹⁵ Mi kaw pun ri meuh nang hkam' sa'hki' pun Heun nanggal' peue gawm'euc' ri ku' pun mi ri nyu mhawng' na' ce. ¹⁶ Maet' maen' mi cí' kaw' na' keunhaw'? Kuh' rap ri ti hk'a' cum' saic' ri tec map' mi na' gawm'euc' ri klawng muis Eun na' reu'.

Yesu' klawng Eun Paw'lu eun heul' ri peue un' meuh peue ceu Yu'da na' ce

¹⁷ Yam keutah uí ing' rot nang veng Yerúsalaem uí buih hk'o' mun' nang nya hk'o' mun' keuting na', uí pun ri nyu limit. ¹⁸ Uí nyu Peucawo' lah' Eun, 'Vaeveaee, keulawn' puc mi heul' hk'ai' veng Yerúsalaem na' reu'. Kopti ku' hkam' mi sa'hki' lawng Uí na', peue aen' kaw ce un' rap ri ti a.'

¹⁹ Uí top' a, 'Cawo', peue aen' yawng ce lawng heul' uí ri sa'la vang hk'o' mun' na' ti duih' hawc' ti duih', punta kaw uí seue' peue yum' Mi na' ce nang htawng' maeé' ta'faet' ce na'. ²⁰ Yam yeuh ce nham' eun Satehpan ku' meuh nang hkam' sa'hki' Mi na' peuc' na', uí ku' cawng keunam ce. Ku' yeuh ce na' a ku' htuk' hpum' uí. Uí ko' hk'eung ce peue toh eun na' ce.'

²¹ Hawc' ko', Peucawo' Eun lah' a ri uí, 'Heul' reu', kaw uí cus' mi heul' vang seungai ri peue un' meuh peue ceu Yu'da na' ce.' "

Paw'lu meuh eun peue Ro'ma

²² Yam leuceng ce leukah' eun Paw'lu na' rot ri leukah' aen' a na', ce klawng ri lah' laws' a, "Ti ri tec eun hk'ai' pang bhen' keute' na' reu', peue yeuhko' na' un' kuing' eun ri a'yu im'."

²³ Yam buih ta'ul' ce na', ce hpuic' hk'o' ri kup' ri puin' keute' na' huk' ang'kat' na', ²⁴ po' suik' keuting na' eun kah ce va Paw'lu eun huk' lec nang tawp na'. Eun kah ce ta'faet' eun ri mu', mhaing' eun a ci' meuh kop keunhaw', peue vaeé' klawng ri lah' ku' yeuhko' ri heun. ²⁵ Yam mawt ce ri kaw ta'faet' eun na', Paw'lu eun mhaing' po' suik' cawng keunam ri na' eun, "Peue Ro'ma na' eun ci' kleuc' un' kleuc' un' nang taws' a' mu ka ta'faet' eun na', cawp' a ritroe ka aw?"

²⁶ Yam po' suik' na' mhawng' eun leukah' awn' a na', eun heul' ris a ri po' suik' keuting na' eun. Mhaing' eun, "Mi

ci' kuit ri kaw yeuh sa'nhaw'? Peue aen' meuh eun peue Ro'ma."

²⁷ Po' suik' keuting na' eun ing' mhaing' Paw'lu eun, "Meuh mi peue Ro'ma aw? Lah' ui' mhawng' a reu'."

Paw'lu eun top' a, "Euh, meuh ui' yeut."

²⁸ Po' suik' keuting na' eun lah', "Punta kaw ui' pun ri meuh peue Ro'ma na', pun ui' ri seue' leumuil heun'."

Paw'lu eun top' a, "Daecti meuh ui' peue Ro'ma tang' neum yam keut' ui' na'."

²⁹ Peue kaw caet mhaing' eun na' ce keulawn' pucti heul'. Saec' meuh po' suik' keuting na' kopti pun eun ri kah ce mawt Paw'lu ku' meuh peue Ro'ma na' eun ri mu' lhec' na', eun ku tok'seupa.

Paw'lu ut' eun nanggal' ce muk peue hk'om kan'

³⁰ Hawc' ka na' ti seunyi, po' suik' keuting na' eun plo'e Paw'lu eun. Kopti sum' yawng eun a ci' meuh kop keunhaw', peue Yu'da na' ce vae' tang' a'mu hk'a'pang Paw'lu eun na', eun klawng peue jhawp' rit keuting na' ce mae' muk peue hk'om kan' na' ce hk'om puri. Hawc' ko', eun kah ce uin' Paw'lu eun cawng nanggal' ce peue hk'om kan' na'.

23

¹ Paw'lu eun keue'tam' ri muk peue hk'om kan' na' ce. Eun lah', "Ec'awng' na' pe', kan' kaw ui' htuk' ri yeuh ri Peucawo' Eun na' buih yeuh ui' a ri hpum' cang yawng ri na' rot seunyaen'." ² Yam awn' na, peue jhawp' rit keuting muis Anani' na' eun kah peue cawng keunam Paw'lu eun na' ce dah moeng eun Paw'lu na'. ³ Hawc' ko', Paw'lu eun lah' a ri heun, "Peucawo' kaw Eun dah mi, peue meuh dal un' ngam pok ri ri pun' aen' mi. Punta kaw mi taws' a'mu ri ui' hot' leukah' ritroe na', mi mok' mawn'. Daecti mi un' hot' leukah' ritroe na' ri kah mi ce dah ui' na'."

⁴ Peue cawng keunam Paw'lu eun na' ce lah', "Lah' mi ku' un' nawpsang ri peue jhawp' rit keuting Eun Peucawo' na' eun aw?"

⁵ Paw'lu eun top' a, "Ec'awng' na' pe', un' yawng ui' meuh eun peue jhawp' rit keuting, kopti kue' a ku' tem' ri lah', 'Pawlaee lah' leukah' rai ri peue u'peung peue ceu mi na' ce.* "

⁶ Yam Paw'lu pun eun ri yawng peue hk'om na' meuh ce peue Sadu'kae', ngon' ce meuh peue Hparisae' ngon' na', eun lah' a ri muk peue hk'om kan' na' ce, "Ec'awng' na' pe', meuh ui' peue Hparisae', kon' Hparisae'. Ui' pun ri hkam' hk'a' taws' a'mu na' kopti meuh a keutui' hpum' ui' ri hk'a' tang kuh' im' na'." ⁷ Yam lah' eun a yeuh keutit' na', peue Hparisae' mae' peue Sadu'kae' na' ce htu'hting' puri. Peue hk'om na' ce gvah ri meuh la' cum. ⁸ (Peue Sadu'kae' na' lah' ce a un' kue' hk'a' tang kuh' im', un' kue' in'hpom, un' kue' Cit'. Daecti peue Hparisae' na' ce lah' aen' ce gawm'euc' kue' ka.)

⁹ Kop awn' na, ce seutuin seutan. Peue guil leukah' ritroe ku' meuh peue Hparisae' na' ce ngon', ce yuk ri kuh' htu'hting' blih' ri. Ce lah', "Un' nyu ye ku' kleuc' hk'a'naee peue aen' eun saec' ti ceu. Cit' un' lah', in'hpom na' ce un' lah', ce lawn na' leukah' mae' heun ko', pe' ci' kaw lah' a yeuh sa'nhaw'?" ¹⁰ Yam htu'hting' nyawk' ce puri a hk'o' po' suik' keuting na' eun kuit gla ri peue awn' na' ce kaw cang ol' Paw'lu eun deut meuh nyhic' ri law na', eun kah peue suik' na' ce ing' rim' ri ti Paw'lu eun nang ti' ce na'. Hawc' ko', eun kah ce va eun huk' nang tawp na'.

¹¹ Bul awn' na, Peucawo' Eun cawng keunam eun Paw'lu na'. Eun lah', "Hat'han' reu'. Seun' pun mi ri hkam' sa' hki' lawng Ui' na' nang veng Yeru'salaem na', mi kaw pun ri hkam' a nang veng Ro'ma na' yeut."

* 23:5 23:5 Pucti heul' 22:28

Raen ri kaw toh Paw'lu eun

¹² Peunngup peunsa' ka na', peue Yu'da na' ce hk'om puri hkam' kati sat'ca' meun ri tu' ri tiduih'. Ce lawn un' pun ri toh Paw'lu eun ko', ce kaw un' nyui un' hk'a keunhaw'. ¹³ Peue hkam' a yeuh keutit' na' ce kue' pun'kul' peue pai'. ¹⁴ Ce heul' hk'eup' peue jhawp' rit keuting mae' ro'kan nang kawt na' ce. Ce lah', "Hkam' ye kati sat'ca' meun ri tu' ri tiduih' hawc'. Ye lawn un' pun ri toh Paw'lu eun ko', ye kaw un' hk'a keunhaw'. ¹⁵ Kop awn' na maet'maen', pe' na' guil ri seun' tang sum' mhaing' ri Paw'lu eun meulamlam ri ko', pe' ri mae' muk peue hk'om kan' na' pe', pe' na' heul' hk'o' ri kah po' suik' keuting eun tuil' Paw'lu eun ri ti. Raen ye ri kaw ko' toh eun yam un' nang ing' rot eun maen' na'."

¹⁶ Daecti kon' me ka awng' beun' eun Paw'lu na' pun eun ri yawng lawng awn' a na'. Eun huk' lah' Paw'lu eun mhawng' a nang tawp.

¹⁷ Hawc' ko', Paw'lu eun klawng po' suik' ti peue na' eun ing'. Eun lah', "Hk'o' mi va nang nhum' aen' eun heul' ri po' suik' keuting na' eun. Kue' eun ku' kaw lah' ri heun."
¹⁸ Kop awn' na, po' suik' na' eun va nang nhum' na' eun heul' hk'eup' po' suik' keuting na' eun.

Po' suik' na' eun lah', "Ku' meuh Paw'lu peue htawng' na' klawng eun ri hk'o' hk'ang ui' va nang nhum' aen' eun heul' hk'eup' mi, kopti kue' eun ku' kaw lah' ri mi na'."

¹⁹ Po' suik' keuting na' eun teuk' ti' eun nang nhum' na', va eun heul' vang geup' na'. Eun mhaing' eun, "Mi ci' sum' lah' keunhaw' ri ui'?" ²⁰ Eun top' a, "Peue Yu'da na' guil ce ri seun' tang sum' mhaing' ri Paw'lu eun meulamlam ri ko', ce sa'lit puri kaw hk'o' ri kah mi tuil' Paw'lu eun ri muk peue hk'om kan' na' ce peunsa'. ²¹ Hk'o' mi pawlae tuil' eun, kopti peue pun'kul' peue pai' na' rangraen ce ri kaw ko' toh eun. Ce hkam' kati sat'ca' meun ri tu' ri tiduih',

ce lawn un' pun ri toh Paw'lu eun ko', ce kaw un' nyui un' hk'a keunhaw'. Maet'maen' rangraen ce ri hawc', ko' ce ri kaw leuceng yawo kaw mi tuil' ahkvang ka seun' ku' hk'o' ce na'."

²² Po' suik' keuting na' eun kah nang nhum' na' eun ing'. Eun deun' eun, "Pawlaee lah' a'nhaw' mhawng' lah' mi lawng aen' a ri ui' awh."

Cus' Paw'lu eun heul' nang veng Kae'sari'

²³ Hawc' awn' na, po' suik' keuting na' eun klawng po' suik' lal' peue na' ka ing'. Eun tuil' leukah' lah', "Rangraen peue suik' leual'pak' peue, peue suik' pawk rawng a' reskul' peue mae' peue suik' klawm' bles leual'pak' peue ce na' heul' nang veng Kae'sari' na' bul seunyaen' seudim' nali reu'. ²⁴ Punta kaw pe' va ri heul' tuil' Paw'lu eun ri cawo' keuting Felis' eun sa'pa sam'ran na', rangraen rawng kaw eun pawk na' reu'."

²⁵ Po' suik' keuting na' eun tem' lai yeuhki',

²⁶ "Lai aen' meuh a lai tem' ui' Hkaodi'as' Li'si'as'.

Hk'a'naee vang yumyam' na',

ui' bu' lai aen' a ri mi cawo' veng Felis'.

²⁷ Peue Yu'da na' mheut' ce ri daee toh peue aen' eun, daecti ui' va peue suik' ri na' ce heul' teum'kawm ri pun eun, kopti yawng ui' meuh eun peue Ro'ma na'. ²⁸ Kopti sum' yawng ui' a ci' meuh kop keunhaw', ce vae' tang' a'mu hk'a'pang eun, ui' ku va eun heul' nang muk peue hk'om kan' ce peue Yu'da na' yeut. ²⁹ Ui' pun ri yawng tang' ce map' ri heun kopti meuh a leukah' ritroe ce na' koe. Daecti ui' un' nyu tut kuing' eun ri kaw yeum mae' tut kuing' eun ri kaw ut' nang htawng'. ³⁰ Yam pun ui' ri mhawng' rangraen peue ri kaw toh peue aen' eun na',

ui' keulawn' cus' eun heul' ri mi. Ui' ku tuil' leukah' ri peue tang' a'mu hk'a'pang eun na' ce heul' lah' lawng eun na' nanggal' mi."

³¹ Bul awn' na, peue suik' na' ce va Paw'lu eun lih rot nang veng Anhti'paris' na' seun' ku' po' suik' keuting na' tuil' eun leukah' ri na'. ³² Peunngup peunsa' ka na', ce kah peue suik' pawk rawng na' ce suip ri va Paw'lu eun heul', peue suik' seubu na' ce tang huk' nang tawp ri na'. ³³ Yam peue suik' pawk rawng na' rot ce nang veng Kae'sari' na', ce tuil' lai na' ri cawo' veng na' eun. Ce ku ap Paw'lu eun ri heun. ³⁴ Hawc' cawo' veng na' lip eun lai na', eun mhaing' Paw'lu eun, "Mi ci' ing' neum kuing' tawngnhaw'?" Yam yawng eun ing' eun neum kuing' Si'li'si' na', ³⁵ eun lah', "Kaw ui' leuceng lawng a'mu mi na' yam peue tang' a'mu ri mi na' ing' rot ce maen' na' yeut." Hawc' ko', eun kah ce ko' kawn Paw'lu eun nang haw' eun Herot' na'.

24

Taws' a'mu ri Paw'lu eun nanggal' cawo' Felis'

¹ Yam rot a hpawn' seunyi na', Anani' peue jhawp' rit keuting na' eun muk ro'kan nang kawt mae' peue chanan yeuh a'mu muis Teutulas' na' eun ce lih rot nang veng Kae'sari' na'. Ce tang' a'mu ri Paw'lu eun ri cawo' veng na' eun. ² Yam cawo' veng na' klawng eun Paw'lu eun ing' mawn' na', Teutulas' eun tang' a'mu ri Paw'lu eun. Eun lah' a ri cawo' veng na' eun, "Cawo' Felis', pun ye ri ut' mae' hk'a' kuit nyawk' kuit sam'ran cumyen' ri hk'a'ruim vang u'peung mi na' ling' hawc'. Kopti kuit lang' mi na', peue ceu aen' ye leuploh' plin' ri huk'hawn' vah keuting. ³ Rap ye ri ti a ku duih' ku ceu hk'a'naee vang suk'seun' ye mun' mi na'. ⁴ Daecti punta kaw ye un' suksak mi ling', ui' kaw leukah' peunaeng', hk'o' mi yeunyang' ri leuceng a.

⁵ Ye pun ri yawng peue aen' meuh eun nang yeuh ku' suksak. Eun cu' peue Yu'da ut' pang bhen' keute' na' ce yeuh ku' suksak gawm'euc'. Eun ku meuh ro' ce peue muk Nasaraet' na' ti peue yeut. ⁶ Lheu' awn' na, eun co'ca' ri miccing ka nya hk'o' mun' keuting na'. Kop awn' na, ye mheut' ri ti eun. ⁷* ⁸ Cheu mi hki' mhaing' ri nawk meun eun, mi ku kaw yawng map' tang' ye hk'a'pang eun na' gawm'euc' ka yeut."

⁹ Saec' meuh peue Yu'da ku' teum'kawm puri tang' a'mu hk'a'pang eun na' ce na', ce ku htawhkam aen' ce meuh a neum gawm'euc' yeut.

¹⁰ Yam cawo' veng na' yuk eun ti' ri kah Paw'lu eun leukah' na', Paw'lu eun lah', "Yawng ui' taws' mi a'mu ri peue ceu aen' ce heun' neum hawc', ui' ku ren'kawn mae' kaw ri to'tam' a'mu tang' ce na'. ¹¹ Cawo', lawng heul' hk'o' ui' mun' nang veng Yeru'salaem na' kopti un' nang tang a hk'ai' kul'leual' seunyi na', kawn' kaw mi cang hki' mhaing' ri yawng sam'ran a yeut. ¹² Peue tang' a'mu hk'a'pang ui' na' ce hkuin' duing nyu htu'hting' ui' a'nhaw' nang nya hk'o' mun' keuting na'. Saec' meuh nang sa'la vang hk'o' mun' na' mae' nang veng na' ce ku duih', ce ku un' duing nyu cu' ui' peue yeuh ku' suksak. ¹³ Ce sok un' cang pun ku' kaw htawhkam ka map' buih tang' ce hk'a'pang ui' na'. ¹⁴ Saec' yeuh sa'nhaw', rap ui' ri ti ui' faee' Peucawo' ce a'ta' a'ya e' na' mae' hot' ui' 'hk'a' ka ritroe aen' na' ku' lah' peue meuh ritroe seubu ti muk na'. Yum' ui' ku' to' ri ri leukah' ritroe na' mae' ku' tem' ri nang htawm ce peue suip leukah' Eun Peucawo' na' gawm'euc' ka. ¹⁵ Seun' peue aen' keutui' hpum' ce a

* **24:7** 24:7 Nang htawm Seunga' na' ngon' tem' a ri yeuhki' 24:6-8 "Punta kaw ye taws' a'mu eun hot' ritroe ye na', ye mheut' ri ti eun. ⁷ Daecti po' suik' Li'sis' eun cu kaw'l reng ri eun rim' ri ti eun hk'ai' dak ti' ye, hawc' ko', eun kah ye ing' yeuh a'mu eun na' nanggal' mi."

hk'a'naee Peucawo' Eun peue leupaws seumeu' na' maeé' peue rai na' kaw ce tang kuh' im' baeé na', uí ku keutuí' hpum' a yeut. ¹⁶ Kop awn' na punta kaw a un' kue' map' tang' ri hk'a'pang ka hpum' cang yawng uí' na' nanggal' Eun Peucawo' na' maeé' nanggal' ce peue na', uí' co'ca' ri yeuh a yeut.

¹⁷ Hawc' ka pun' hpawn' neum na', punta kaw uí' teum'kawm peue hk'o'tukyak ceucat uí' na' ce maeé' kaw uí' tan ku' tan na', uí' huk' nang veng Yeru'salaem na'. ¹⁸ Yam nyu ce buih yeuh uí' keutit' nang nya hk'o' mun' keuting na', uí' yeuh ritroe yeuh ri seunga' na' hawc'. Peue cum heun' na' ce hkuin' ut' maeé' uí', ku' suksak na' uí' ku hkuin' yeuh a. ¹⁹ Daecti peue Yu'da ut' kuing' Asa' na' ce ku ut' mawn'. Ce lawn kue' a'mu kaw tang' ri hk'a'pang uí' ko', ce htuk' ri ut' nanggal' mi maen'. ²⁰ Lheu' awn' na, peue ut' maen' na' ce htuk' ri lah' ku' kleuc' kue' hk'a'naee uí' na' yam cawng uí' nanggal' ce muk peue hk'om kan' na'. ²¹ A lawn un' meuh yawo leukah' klawng uí' ri lah' yam cawng uí' nanggal' pé' uí' lah', 'Seunyaen', pun uí' ri hkam' hk'a' taws' a'mu nanggal' pé' na' kopti meuh a yum' uí' hk'a' tang kuh' im' na' ko', pé' hkuin' kaw kue' ku' kaw tang' a'mu ri uí' saec' ti ceu."

²² Kopti cawo' Felis' yawng eun lawng "hk'a' ka ritroe aen' na" meulamlam ri na', eun kah ce sat yam ka taws' a'mu na'. Eun lah', "Yam po' suik' keuting Li'si'as' na' eun ing' rot na', uí' na' koe taws' a'mu aen' na deut." ²³ Cawo' Felis' eun kah po' suik' na' eun ko' kawn Paw'lu eun. Daecti ku' sum' yeuh eun ti ri ceu na' ce kah eun yeuh a. Ce ku kah a'mawo eun na' ce cang teum'kawm eun ri ku' lo' eun na' yeut.

²⁴ Hawc' ka lal' loe' seunyi na', cawo' Felis' eun maeé' beun' eun muis Dusilas' na' ka va puri ing'. Beun' eun na' ka meuh peue Yu'da. Cawo' Felis' eun klawng Paw'lu eun

ing' hk'eup' ka. Ka leuceng Paw'lu ris eun lawng hk'a' yum' hk'a' naee Yesu' Hk'rit Eun na'. ²⁵ Yam Paw'lu ris eun lawng hk'a' leupaws seumeu', lawng pe tu' ri na' mae' lawng yam taws' a'mu kaw ing' na', cawo' Felis' eun lhat'. Eun lah', "Cu a peunaw' reu', kaw mi cang ing' hawc'. Yam na' a kue' yam ka, ui' na' koe tang klawng mi heul' maen' bae." ²⁶ Yam awn' na kopti keutui' hpum' eun Paw'lu na' eun kaw cang mhun' ri ri leumuil na', eun klawng ri u Paw'lu eun tam'teuk.

²⁷ Hawc' pon a heul' lal' neum na', Pawsias' Fetas' eun ing' meuh cawo', eun ten cawo' Felis' eun. Daecti cawo' Felis' eun sum' kah peue Yu'da na' ce nyu ri htuk' hpum' ri, eun tae' Paw'lu eun ut' nang htawng' na'.

25

Yeuh a'mu nanggal' cawo' Fetas'

¹ Hawc' cawo' Fetas' rot eun nang kuing' awn' na pun loe' seunyi na', eun kuh' neum veng Kae'sari' na' eun huk' nang veng Yeru'salaem. ² Peue jhawp' rit keuting mae' ro'kan ce peue Yu'da na' ce ing' tang' a'mu eun Paw'lu na' ri cawo' Fetas' eun. ³ Ce hk'o' hk'ang cawo' Fetas' eun tuil' Paw'lu eun huk' nang veng Yeru'salaem na', kopti raen ce ri kaw ko' toh Paw'lu eun lang' hk'a' na'. ⁴ Cawo' Fetas' eun top' a, "Paw'lu kawn' hk'awng' eun ri nang veng Kae'sari'. Un' ling' ko', kaw ui' tang lih teh' yeut. ⁵ Eun lawn kue' ku' kleuc' keunhaw' ko', pe' na' kah ro'kan pe' na' ce lih mae' ui' ngon', ce na' heul' tang' a'mu hk'a' pang eun teh'."

⁶ Hawc' ut' eun mae' ce hk'ao kul' seunyi na', eun tang lih nang veng Kae'sari' na'. Hawc' ka na' ti seunyi, eun mok' pang ten taws' a'mu na'. Eun kah ce heul' va Paw'lu eun ing' ri ti. ⁷ Yam Paw'lu rot eun na', peue Yu'da lih neum veng Yeru'salaem na' ce cawng rop eun. Ce

tang' ámu reng ná hk'a'pang eun ri ku' un' kue' sa'hki' keunhaw' heun' ceu ná.

⁸ Paw'lu eun kah' ku' lah' ce ná. Eun lah', "Ui' hkuin' yeuh ku' kleuc' ri leukah' ritroe ce peue Yu'da ná, ri nya hk'o' mun' keuting ná maeé ri hkun'haw'hkam' Kae'sa eun saec' ti ceu."

⁹ Kopti cawo' Fetas' sum' yeuh eun ku' htuk' hpum' ce peue Yu'da ná, eun lah' a ri Paw'lu eun, "Na' mi huk' to'tam' ámu ri aen' a nanggal' ui' nang veng Yeru'salaem ná, lak' ná a htuk' hpum' mi aw?"

¹⁰ Paw'lu eun top' a, "Maet'maen', buih cawng ui' nanggal' ten taws' ámu eun hkun'haw'hkam' Kae'sa vang kaw ui' htuk' ri hkam' hk'a' taws' ámu ná hawc'. Ui' hkuin' yeuh ku' kleuc' ri peue Yu'da ná ce saec' ti ceu, mi ku yawng a meulamlam ri yeut. ¹¹ A saec' yeuh sa'nhaw', ui' lawn yeuh tut kuing' ri kaw toh ri ti ri ceu ko', ui' hkuin' kaw laee plohp'leh' ri. Ui' ná hkam' ri yeum. Daecti ámu ku' peue Yu'da tang' ce ri ui' ná a lawn un' kue' un' meuh neum ko', a'nhaw' hkuin' kaw cang ap ui' nang dak ti' ce. Hk'o' ámu ui' aen' a heul' rot ri hkun'haw'hkam' Kae'sa eun."

¹² Hawc' cawo' Fetas' sa'lit eun maeé muk peue tuil' kamkuit ri ná ce ná, eun lah', "Kopti hk'o' mi ámu ri ná heul' rot ri hkun'haw'hkam' Kae'sa eun ná, mi kaw kah ri heul' ri hkun'haw'hkam' Kae'sa eun."

Fetas' hk'o' eun kamkuit ri hkun'haw'hkam' Akli'pa' eun

¹³ Hawc' awn' na lal' loe' seunyi ná, hkun'haw'hkam' Akli'pa' eun maeé awng' beun' eun muis Beunis' ná ka ing' glue ri cawo' Fetas' eun nang veng Kae'sari' ná.

¹⁴ Kopti ut' ka mawn' heun' seunyi ná, cawo' Fetas' eun lah' ris hkun'haw'hkam' eun mhawng' lawng eun Paw'lu ná. Eun lah', "Maen' ná kue' a peue htawng' ku' cawo' Felis' hk'awng' eun ri uin' ti peue. ¹⁵ Yam ut' ui' nang veng Yeru'salaem ná, peue jhawp' rit keuting maeé ro'kan

nang kawt peue Yu'da na' ce tang' a'mu eun na' ri ui'. Ce hk'o' ui' taws' a'mu ri heun.

¹⁶ Daecti ui' lah' a ri ce, 'A lawn meuh hot' ritroe ce peue Ro'ma na' ko', ku' tang' a'mu na' eun mae'e ku' hkam' tang' peue a'mu na' eun ka lawn un' nang cu ri to'tam' puri tiduih' ko', e' hkuin' kaw cang ap ku' hkam' tang' peue a'mu na' eun.' ¹⁷ Yam ing' rot ce ri ui' maen' na', ui' hkuin' hkawe ri. Daecti hawc' ka ti seunyi na', ui' tuh' sa'nam' vang taws' a'mu na'. Ui' kah ce heul' va peue awn' eun ing'. ¹⁸ Yam yuk ce ri kuh' leukah' na', ce hkuin' tang' a'mu ku' kleuc' seun' ku' kuit ui' na' saec' ti ceu. ¹⁹ Daecti ce htu'hting' eun ri lawng ritroe faee' ce na' mae'e lawng Eun peue yeum hawc' ti peue Eun muis Yesu' ku' Paw'lu lah' eun Eun kawn' im' na'. ²⁰ Un' laee yawng ui' kaw ri taws' a'mu ka lawng aen' na yeuh sa'nhaw'. Kop awn' na, ui' mhaing' eun ri sum' huk' htu'hting' eun a'mu tang' ce ri heun na' nang veng Yeru'salaem aw? ²¹ Yam Paw'lu hk'o' eun hkun'haw'hkam' keuting na' eun taws' a'mu na' ri ti na', ui' kah ce puing hk'awng' eun rot yam na' eun heul' ri hkun'haw'hkam' Kae'sa eun."

²² Hawc' ko', hkun'haw'hkam' Akli'pa' eun lah' a ri cawo' Fetas' eun, "Ui' ku sum' mhawng' leukah' eun na' yeut." Cawo' Fetas' eun top' a, "Peunsa' na' mi pun ri mhawng' a."

²³ Hawc' ka na' ti seunyi, hkun'haw'hkam' Akli'pa' eun mae'e Beunis' na' ka yong' ri ti munhpung' ri lec nang hong' vang hk'om na' tiduih' mae'e po' suik' keuting mae'e ro'kan keuting nang veng na' ce. Cawo' Fetas' eun kah ce va Paw'lu eun ing' lec nang vang hk'om na'. ²⁴ Yam awn' na, cawo' Fetas' eun lah', "Hkun'haw'hkam' Akli'pa' mae'e peue hk'om maen' na' pe', pun pe' ri nyu peue aen' eun hawc'. Peue Yu'da na' ce gawm'euc' ce ing' hk'o' lawng eun peue aen' a ri ui' nang veng Yeru'salaem na' mae'e nang veng Kae'sari' aen' na. Ce klawng ri lah' peue aen' un'

laee kuing' eun ri im'. ²⁵ Uí' hkuin' nyu tut kuing' ri yeum yeuh eun saec' ti ceu. Kopti hk'o' eun a'mu ri na' heul' ri hkun'haw'hkam' keuting na' eun na', uí' kaw cus' eun heul' nang veng Ro'ma na', uí' kuit a deut hawc'. ²⁶ Daecti uí' un' nang kue' ku' kaw tem' ri tuil' lawng eun na' meulamlam ri hkun'haw'hkam' keuting eun saec' ti ceu. Kop awn' na hk'a'naee vang hki' mhaing' é eun na' punta kaw uí' cang pun ku' kaw tem' lawng eun na' ti ri ceu na', uí' va eun ing' nanggal' pe' peue heun' na', lheu' awn' na nanggal' mi hkun'haw'hkam' Akli'pa' na'. ²⁷ Kopti é lawn cus' peue htawng' heul', é na' un' tem' lai tang' a'mu hk'a'pang eun meulamlam ri ko', kuit uí' a na' un' cawp'."

26

Paw'lu leukah' eun nanggal' hkun'haw'hkam' Akli'pa'

¹ Hawc' ko', hkun'haw'hkam' Akli'pa' eun lah' a ri Paw'lu eun, "Pun mi ahkvang kaw htu'hting' a'mu ri na' hawc'."

Kop awn' na, Paw'lu eun yuk tí' ri. Hawc' ko', eun tang' ri htu'hting' lah' a'mu ri na', ² "Hkun'haw'hkam' Akli'pa', kopti pun uí' ri kaw htu'hting' lah' lawng a'mu peue Yu'da na' tang' ce hk'a'pang uí' na' gawm'euc' nanggal' mi seunyaen' na', uí' sawn' a meuh yam htuk'lai ri ti. ³ Kopti yawng mi ritroe ce peue Yu'da na' maeé' lawng ku' htu'hting' ce puri na' meulamlam ri na' yeut. Kop awn' na, hk'o' mi yeun'hkam' ri leuceng leukah' uí' na'.

⁴ Peue Yu'da na' ce gawm'euc' yawng ce hk'a' a'yu im' uí' na' tang' neum yam meuh uí' nang aet' na' maeé' tang' neum yam keut' uí' nang veng uí' na' maeé' nang veng Yeru'salaem na' yeut. ⁵ Yawng ce uí' na' ling' ka hawc'. Ce lawn sahpaw' a ko', ce ku' kaw cang hkam' sa'hki' lawng meuh uí' peue a'yu im' hk'a'naee ritroe faee' reng ye na'. Uí' meuh peue Hparisae'. ⁶ Daecti maet'maen' pun uí' ri hkam' hk'a' taws' a'mu seunyaen' na', meuh a kopti keutuí'

hpum' uí kati ku' Peucawo' tuil' Eun ri á'tá' á'ya é' ná' ce.
⁷ A meuh kati ku' peue ceu é' kul'leual' ceu ná' keutuí' hpum' é' a kaw meuh neumneum ná'. E' có'ca' ri yeuh mhai' Eun Peucawo' gawm' sum' gawm' seunyi laleung. Hkun'haw'hkam', kopti meuh a ku' keutuí' hpum' awn' a ná', peue Yu'da ná' ce tang' á'mu hk'a'pang uí'. ⁸ Peucawo' cang yeuh Eun peue yeum ná' ce tang kuh' im' ná', a cí' meuh kop keunhaw', pé' vaeé' kuit a kaw un' cang meuh?

⁹ Saec' uí' ri, uí' ku tawn kuit kaw ri hkat'hkan muis Eun Yesu' peue veng Nasaraet' ná' seun' ku' kaw uí' cang yeuh pun ná' yeut. ¹⁰ Meuh a ku' tawn yeuh uí' nang veng Yeru'salaem ná' yeut. Uí' cu tí'ca ce peue jhawp' rit keuting ná', uí' mheut' ri seue' peue Eun Peucawo' ná' ce nang htawng'. Yam kaw peue toh ce ná', a ku htuk' hpum' uí' yeut. ¹¹ Punta kaw uí' keunhap' nokneh peue aen' ce ná', uí' heul' nang sa'la vang hk'o' mun' ná' ti duih' hawc' ti duih' heun' pok. Uí' tec'teng ce lah' ku' un' nawpsang ri Peucawo' ri ná' Eun. Uí' seungeueng' nyu ce pereng ri nyawk' rot ri hot' uí' ri keunhap' nokneh ce rot nang veng kuing' tawk seubu ná'.

¹² A kue' ti pok, uí' pun tí'ca maeé' kan' ap ce peue jhawp' rit keuting ná', uí' buih lih nang veng Damas'kas' ná'. ¹³ Hkun'haw'hkam', yam meuh ka peunnyi keuting yam buih long ye hk'a' heul' ná', uí' pun ri nyu ku' ceng' lih neum pang maó' ná'. Ku' ceng' awn' a reng hk'ai' ceng' ka seunyi ná'. A htawng' rop uí' maeé' pu hot' uí' ná' ce. ¹⁴ Ye cungkus pang keute' ná' gawm'euc' ri. Uí' pun ri mhawng' seng' leukah' ná' lah' a ri ri uí'. A meuh leukah' Arame'*. A lah', 'Saw'lu, Saw'lu, a cí' meuh kop keunhaw' mi vaeé' keunhap' Uí'? Ham'tap alo Uí' ná' ko', nyhap' ka.'

¹⁵ Hawc' ko', uí' mhaing' Eun, 'Cawo', Mi cí' meuh a'nhaw'?

* 26:14 26:14 a'ko' Hebrae'

Cawo' Eun top' a, 'Meuh Ui' Yesu' ku' buih keunhap' mi na' Eun. ¹⁶ Maet' maen' kuh' cawng reu'. Tuil' Ui' mi nyu ri na' meuh a kopti punta kaw Ui' tang' mi meuh mhai' ri mae' kaw mi hkam' sa' hki' ri lawng Ui' ku' pun mi ri nyu hawc' na' mae' lawng ku' kaw' kaw Ui' yeuh mi nawk na'. ¹⁷ Ui' kaw tuil' mi pon nang dak ti' ce peue ceu mi na' mae' peue un' meuh peue ceu Yu' da na' ce. Ui' kaw cus' mi heul' ri ce. ¹⁸ Aen' a meuh punta kaw mi heul' blas' ngai' ce na', hpawt' ce hk'ai' vang duim' lawng na' ce na' tang ing' ri ku' ceng' na', hpawt' ce hk'ai' ti' ca ka Satan na' ce na' tang ing' ri Peucawo' Eun na', punta kaw ce pun hk'a' plo' map' na', hawc' ko', ce na' pun ri ut' mae' muk ce peue pun ri saic' map' ri seung' chak' ri kopti yum' ce Ui' na'.

¹⁹ Tang' neum yam awn' na, hkun' haw' hkam' Akli' pa', ui' un' plo' pleh' ri ri limit lih neum kuing' pang ma' awn' na. ²⁰ Ui' la ri sangsawn' leukah' mun' ren' kaw' na' ri peue veng Damas' kas' na' ce. Hawc' ka na', ui' sangsawn' a ri peue veng Yeru' salaem na', ri peue kuing' Yu' da mae' peue un' meuh peue ceu Yu' da na' ce yeut. Kaw ce kah ri taws' hpum' fuin map' ri, tang hpawt' ri ing' ri Peucawo' Eun mae' yeuh peue nyu taws' ce hpum' ri hawc' na' ri kan' ku' yeuh ce na', ui' sangsawn' ce. ²¹ Kopti meuh a ceu nang aen' ce na', peue Yu' da na' ce mheut' ui' nang nya hk'o' mun' keuting na'. Ce co' ca' ri kaw toh ui'. ²² Daecti kopti Peucawo' teum' kawm Eun ui' rot seunyaen' na', ui' pun ri cawng ri hkam' sa' hki' ri peue aet' peue keuting na' pe' maen'. Ui' hkuin' lah' ku' seubu, ui' lah' yawo pal ku' peue suip leukah' Eun Peucawo' na' mae' ku' Mo' se lah' eun na'. ²³ Ce lah', 'Hkrit'† kaw Eun pun ri tukhka, Eun kaw yeuh peue Yu' da mae' peue un' meuh peue ceu Yu' da na' ce nyu ku' ceng'. Eun meuh peue tang kuh' im' nanggal' ri peue.' ”

† 26:23 26:23 a'ko' Mesi'ya

²⁴ Yam Paw'lu lah' eun leukah' na' rot mawn' na', cawo' Fetas' eun klawng ri lah' laws' a, "Paw'lu, ma'rat mi hawc'. Kopti rin mi cu'yi heun' na', a yeuh mi ma'rat." ²⁵ Paw'lu eun top' a, "Cawo' Fetas' munhpung' keuting, hpaw ui' ca' ma'rat. Ku' lah' ui' na' meuh a ku' neumneum, kue' a ri is' tita. ²⁶ Hkun'haw'hkam' Akli'pa' eun yawng lawng aen' na meulamlam ri, ui' cang lah' a ceng'sae'. Yum' neum ui' a, un' kue' a ku' kaw mo' ri ri ngai' eun hkun'haw'hkam' na', kopti ceu nang aen' ce un' meuh a ku' mo'mep ri yeuh. ²⁷ Hkun'haw'hkam' Akli'pa', yum' mi leukah' ce peue suip leukah' Eun Peucawo' na' aw? Yawng ui' yum' mi a yeut."

²⁸ Hawc' ko', hkun'haw'hkam' Akli'pa' eun lah' a ri Paw'lu eun, "Hk'a'naee ti yam yawo aen' na, kuit mi ri kaw cang sa'lit pun ui' meuh kon' Hkrit aw?"

²⁹ Paw'lu eun top' a, "Yam na' a saec' na' ling' un' ling', hk'o' ui' mun' ri Peucawo' Eun. Hpaw a ca' meuh pun mi koe, a ku meuh pun ce peue pun ri mhawng' leukah' lah' ui' seunyaen' na' ce gawm'euc'. Kaw pe' pun ri meuh seun' ui' ri yeut, daecti a hkuin' meuh hkam' mawt ti ri mu' lhec' yeuhki' na'."

³⁰ Yam awn' na, hkun'haw'hkam' eun yuk ri kuh', cawo' ka veng na' eun, Beunis' ka mae' peue mok' mawn' na' ce ku yuk ri kuh' tiduih'. ³¹ Hawc' puc ce ri heul' hk'ai' vang hk'om na', ce lah' ris a ri puri, "Peue aen' eun hkuin' yeuh tut kuing' ri yeum na' mae' kuing' ri hk'awng' ri nang htawng' na' saec' ti ceu."

³² Hkun'haw'hkam' Akli'pa' eun lah' a ri cawo' Fetas' eun, "Peue aen' eun lawn na' un' hk'o' ri heul' ri hkun'haw'hkam' Kae'sa eun ko', e' na' cang plo'e' eun yeut."

27

Paw'lu pawk eun reu heul' nang veng Ro'ma

¹ Yam kaw ce cus' ye pawk reu na' heul' nang kuing' It'tali ce kuit a deut na', ce ku ap Paw'lu eun mae' peue htaung' seubu na' ce nang ti' eun po' suik' Muis Yu'lis' na'. Eun ut' nang tawp muis "Muk Suik' Hkun'haw'hkam' Keuting" na'. ²Ye lec reu na' ing' neum veng Adrami'ti'um' ku' kaw buih heul' ri ta ka veng ut' keunam ka ba mha'se-umut' nang kuing' Asa' na' ce. Hawc' ko', reu na' a yuk ri heul'. Peue Masido'ni' ku' ing' neum veng Hte'salo'ni' muis Aritahkas' na' eun ku ut' mae' ye yeut.

³ Hawc' ka na' ti seunyi, ye tah' ri nang veng Si'don na'. Kopti Yu'lis' tuckyak eun ri Paw'lu eun na', eun tuil' ahkvang Paw'lu kaw eun heul' glue ri a'mawo ri na' ce. Aen' a meuh punta kaw ce sok ri tuil' ku' Paw'lu kaw eun lo' na'. ⁴Tang' neum mawn' na', ye tang yuk ri heul' nang mha'seumut' na' bae. Kopti guil' na' htuip a reu na', ye heul' hk'a' un' guil' hk'a'tuh ka kaw' kuing' Sai'plas' na'. ⁵Hawc' hpa' ye keunam ka ba mha'seumut' kuing' Si'li'si' na' mae' kuing' Pamhpi'li' na', ye heul' keului' ri nang veng Mi'ra' kuing' Li'si' na'. ⁶Po' suik' na' eun nyu reu ing' neum veng Alek'sandrian kaw buih heul' kuing' It'tali na' mawn'. Eun kah ye lec a yeut. ⁷Ye koekoe heul' heun' seunyi. Ye heul' rot nang veng Kani'das' na' mae' tuk mae' yak ri. Kopti un' cawp' a sai' guil' na', ye heul' hk'a' un' guil' hk'a'col ka kaw' Kret' nang veng Samone na'. ⁸Ye heul' mae' tuk mae' yak ri hot' keunam ka ba mha'seumut' na'. Ye rot vang muis Vang Tah' Reu Ngam de veng Lasa' na'.

⁹ Kopti yam na' euc' ka heun' na', a ku meuh yam hk'o'lhat' ri pawk reu kopti meuh a hawc' ka yam eut' ku' hk'a' na'. Kop awn' na, Paw'lu eun tuil' sati ce. Eun lah' a, ¹⁰"A'mawo na' pe, kuit ui' a, e' lawn pawk reu na' heul' maet'maen' ko', reu na' mae' hk'eung e' na' kaw a pun ri lu nyawk'. Lheu' awn' na' a'yu e' na' a ku kaw pun ri

sum.” ¹¹ Daecti po’ suik’ na’ eun un’ leuceng leukah’ eun Paw’lu na’, eun leuceng leukah’ ka cawo’ hpawt’ reu na’ mae’ cawo’ reu na’, lheu’ leukah’ eun Paw’lu na’. ¹² Kopti Vang Tah’ Reu Ngam na’ un’ htuk’ a lai ri kaw tah’ reu yam kawt’ na’. Punta kaw ye suip hk’a’ ri heul’ na’, peue heun’ na’ ce kuit a deut. Ce keutui’ hpum’ kaw ri heul’ rot nang veng Hpi’nis’ na’, ce na’ tah’ ri keului’ reu ri na’ mawn’ yam kawt’ na’. Veng Hpi’nis’ na’ a meuh veng vang tah’ reu ka kaw’ Kret’ na’. A tang’ nha’ ri na’ ri hon’ hk’a’tuh hk’a’col ka hk’a’lec seunyi na’ gawm’ lal’ plak’ ri.

Guil’ lomleng

¹³ Yam guil’ hon’ hk’a’col na’ jom a ri puing’ huk’ na’, ce kuit a meuh seun’ ku’ sum’ kah ce meuh na’ hawc’. Ce ol’ lhawk’ lhec’ vok’ ka reu na’ huk’. Hawc’ ko’, ce heul’ hot’ keunam ka ba mha’seumut’ ka kaw’ Kret’ na’. ¹⁴ Hawc’ ka na’ un’ ling’, guil’ lomleng ku’ lah’ peue meuh guil’ ka hon’ hk’a’tuh ka hk’a’lih seunyi na’ a puing’ reng ri ing’ neum hk’a’ bhen’ keute’ na’. ¹⁵ Kopti guil’ na’ htuipe a reu na’ a un’ laee pe reng ka guil’ na’, ye ku ploé’ reu na’ hot’ guil’ na’ heul’. ¹⁶ Yam buih heul’ ye hk’a’col ka kaw’ aet’ muis Kaoda’ na’, ye mhe’ ri mawt reu aet’ na’ mae’ tuk mae’ yak ri. ¹⁷ Yam hawc’ ce ol’ ri po reu aet’ na’ pang reu keuting na’, ce suit’ mu’ na’ hk’a’ruim keuteul ka reu keuting na’. Ce mawt lhang’ ka na’ keutawn’. Kopti lhat’ ce reu na’ cang heul’ hkam’ a nang kaw’ sai keuting hk’a’nae mha’seumut’ ka veng Sai’tis’ na’, ce lhut’ hpen’ keuting na’ lih. Ce tae’ reu na’ hot’ guil’ na’ heul’. ¹⁸ Guil’ lomleng na’ a htuipe reu na’ reng nyawk’. Rot bae ti seunyi na’, ye tang’ ri hue’ ri tec hk’eung na’ ce nang mha’seumut’ na’. ¹⁹ Yam rot a loe’ seunyi na’, ce ku hue’ ri tec meun hk’eung ka reu na’. ²⁰ Kopti un’ laee nyu ye ceng’ seunyi mae’ ceng’ seumeueng’ na’ pun heun’ seunyi, mae’ guil’ lomleng na’

a un' laee yut' ri na', vang tisut' ka na' ye un' laee kue' vang keutui' hpum' kaw ri a'yu im' na' saec' peunae'.

²¹ Hawc' un' laee nyu ce ri som' ling' na', Paw'lu eun kuh' cawng ri leukah' nang ngon' ce na', "A'mawo na' pe', htuk' pe' ri leuceng ku' lah' ui' e' na' un' htuk' ri pucti heul' hk'ai' kaw Kret' na'. Pe' lawn leuceng a ko', e' ku na' un' hk'eup' ku' lulaic aen' na. ²² Daecti maet'maen' hk'o' pe' tang' hpum' ri nhim'nhim', kopti kaw pe' un' yeum saec' ti peue. Reu na' yawo kaw a lu. ²³ Bul peunku', in'hpom Eun Peucawo' ui' ku' yeuh ui' mhai' Eun na' ing' cawng eun keunam ui' na'. ²⁴ Eun lah', 'Paw'lu, pawlaee lhat'. Kaw mi pun ri cawng ri leukah' nanggal' eun hkun'haw'hkam' keuting Kaes'a na'. Peucawo' Eun kaw tuckyak ri mi. Eun kaw yeuh a'yu ce peue pawk reu mae' mi na' ce pon gawm'euc'. ²⁵ Kop awn' na, hk'o' pe' tang' hpum' ri nhim'nhim', kopti yum' ui' Peucawo' Eun. Ku' lah' Eun ri ui' na' a kaw meuh neum. ²⁶ Saec' yeuh sa'nhaw', kaw e' pun ri hkam' nang kaw na' ti ri duih'."

²⁷ Na' rot sum' ka kul' pun' seunyi na', reu ye na' a kawn' ut' hk'a'naee mha'seumut' Adria na'. Yam rot a hk'ao peunnuik' na', peue yeuh kan' nang reu na' ce yawng rot ye de bhen' keute' na' hawc'. ²⁸ Yam keutec ce ri nawk leuum' na', ce pun ri yawng leuum' na' rui' ka leual'kul' tawp'. Hawc' ka na' ti hk'ao, ce tang keutec a bae ti pok. Ce pun ri yawng leuum' na' rui' ka kul'hpawn' tawp'. ²⁹ Kopti lhat' ce reu na' cang heul' hkuit ka seumu hk'a'naee mha'seumut' na', ce ploé lhawk' lhec' vok' hk'a' seuta' ka reu na' pun' lhem'. Hawc' ko', punta kaw a ceng' vaeveae na', ce hk'o' mun'. ³⁰ Peue yeuh kan' hk'a'naee reu na' ce kuit ri kaw hk'uih ri tec reu keuting na'. Ce guil ri ploé lhawk' lhec' vok' hk'a' cing' ka reu na'. Daecti ce ra ri ploé reu aet' na' nang mha'seumut' na'. ³¹ Paw'lu eun lah' a ri po' suik' na' eun mae' peue suik' na' ce, "Peue

aen' ce lawn un' ut' nang reu na' ko', pe' ku na' un' lawtpon yeut." ³² Kop awn' na, peue suik' na' ce bhat' mu' mawt ka reu aet' na', ce tae' a hk' uic' nang mha' seumut' na'.

³³ Yam kaw a hk'aws' ceng' na', punta kaw ce hk'asom', Paw'lu eun tuil' reng ce gawm'euc'. Eun lah', "Kopti ko' pe' ri kuit nyhap' kuit yak palkoe na', pe' un' laee hk'asom' saec' peunae' pun kul'pun' seunyi hawc'. ³⁴ Maet'maen', punta kaw pe' a'yu im' na', hk'o' pe' hk'a ku' ti ri ceu reu'. Hk'a'naee pe' a hkuin' kaw kue' nang kaw pun ri sum huik' ri ti nyeng yawo saec' ti peue." ³⁵ Yam hawc' eun lah' ri a na', eun ti hkawomun' na' eun mun' keuting ri Peucawo' Eun nanggal' ce na'. Hawc' ko', eun ves ri hk'a a. ³⁶ Ce pun hpum' ri gawm'euc'. Ce tang' ri hk'a ku' hk'a na'. ³⁷ Peue nang reu awn' ye gawm'euc', ye kue' leual'pak' a'reskul' les peue. ³⁸ Hawc' hk'a ce ri sak' na', punta reu na' kaw a seyung' na', ce ploeg' gu' hkawocung' ri na' nang mha' seumut' na'.

Reu na' lhu' ka

³⁹ Yam ceng' ka na', ce un' pawn bhen' keute' awn' na. Daecti ce pun ri nyu tak sai keunam ka ba mha' seumut' na'. A lawn kaw cang ko', ce kuit ri kaw va reu na' heul' tah' ri nang tak sai awn' na. ⁴⁰ Ce bhat' ri tec lhawk' lhec' vok' ka reu na' nang mha' seumut' na'. Hk'a'naee yam awn' na, ce ku kah' mu' mawt seubal' hk'a' seuta' ka reu na'. Hawc' ko', ce yuk hpen' hk'a' cing' ka reu na' huk', tuil' guil' na' puing' reu na' heul' ri keunam ka ba mha' seumut' na'. ⁴¹ Daecti reu na' a duih' buim' keute' nang puin ka mha' seumut' na', a hkam'. Hk'a' cing' ka reu na' a hkam' nhen' cen' nyawk'. A un' laee cang cheun' ri. Kopti ba mha' seumut' na' dhim' ka hk'a' seuta' ka reu na', reu na' a lhu'jah meuh glawk' meuh hklip' ri.

⁴² Punta peue htawng' na' kaw ce un' cang lue' hk'uih' na', peue suik' na' ce kuit ri kaw toh ce. ⁴³ Daecti kopti

po' suik' keuting na' sum' teum'kawm eun a'yu eun Paw'lu na', eun un' kah ce yeuh seun' ku' kuit ce na'. Eun kah ku' cang lue' na' ce na' yawt' ri lue' pucti heul' keunam ka ba mha'seumut' na'. ⁴⁴ Peue seubu na' ce ngon' ce kop pen' na', ngon' ce kop hk'eung ka reu na' heul'. Kopti yeuh ce keutit' na', ce sa'pa sam'ran heul' rot keunam ka ba mha'seumut' na' gawm'euc' ri.

28

Nang kaw' Mawlta'

¹ Hawc' pun ye ri rot keunam ka ba mha'seumut' na' mae' sa'pa sam'ran ri na', ye pun ri yawng kaw' awn' muis a Mawlta'. ² Peue ut' hk'a'naee kaw' awn' ce tuckyak ri ye nyawk'. Kopti lhe' ka a kawt', ce puing' ngawl rap ri ti ye ku peue ri. ³ Paw'lu eun seut' ri cem chi' a' hk'am' ti jem. Yam buih seue' eun a nang ngawl na', kopti ngawl na' kuc' ka na', seueueng' kue' pit reng na' a pucti blaws ri ing' pawm ti' eun na' keutawn'. ⁴ Yam peue ut' mawn' na' nyu ce seueueng' na' pawm a ri tuik' ri ri ti' eun Paw'lu na', ce lah' a ri puri, "Hkawn' meuh eun taeng peue toh peue neum. Kopti eun saec' pun ri pon neum mha'seumut' na', cawo' leupaws seumeu' na' eun un' kah eun a'yu im'." ⁵ Paw'lu eun raws' seueueng' na' nang ngawl na', eun hkuin' yeuh keunhaw'. ⁶ Ce kuit Paw'lu eun kaw baet ri bui', a'ko' eun na' keulawn' cung'kus yeum. Daecti ce saec' ko' ri nawk eun hawc' ti hk'ao, ce nyu un' yeuh eun keunhaw' na', ce tang plin' kamkuit ri na'. Ce lah' eun meuh peucawo'.

⁷ Keunam mawn' na', a kue' bhen' keute' ti bhen'. A meuh bhen' keute' eun Publi'as'. Eun meuh ro' ka kaw' awn' na. Eun rap ri ti ye meulamlam ri, tuil' ye hk'asom' pun loe' seunyi. ⁸ Kuiing' eun Publi'as' na' eun peuyhat kawt'. Eun ku sui'sawt'cet. Eun klae' ri kluit'kloe it'. Paw'lu eun heul' glue ri heun. Hawc' hk'o' eun mun' na',

eun tang' tí ri hk'a'pang eun. Eun baí' eun cuin. ⁹ Yam yeuh a keutit' na', peue peuyhat seubu ut' nang kaw' awn' a na' ce ku ing', ce pun ri cuin. ¹⁰ Ce yummyam' ti ye seucen. Yam rangraen ye ri pe'men kaw pawk reu na', ce ku ti ri ing' tuil' ku' lo' ye na' ce ri ye.

Rot nang veng Ro'ma

¹¹ Hawc' pun a loe' chí' na', ye pawk reu ku' ing' keului' ri yam kawt' nang kaw' awn' na. Reu awn' a ing' neum veng Alek'sandrian na'. A kue' ruprang kon' seuklap' meuh peucawo' muis Kas'teu' maeé' Hpaw'las' ri cing' ka reu na'. ¹² Ye tah' ri keului' ri nang veng Sai'ra'kus' na' loe' seunyi. ¹³ Neum teh' na', ye heul' rot nang veng Reyium' na'. Hawc' ka na' ti seunyi, guil' hon' hk'a'col na' a puing' ri huk'. Bae ti seunyi na', ye rot nang veng Poteoli'. ¹⁴ Ye hk'eup' nyu ec'awng' na' ce teh' ngon'. Ce hk'o' ye ut' maeé' ti ti vung. Hawc' ko', ye heul' nang veng Ro'ma na'. ¹⁵ Yam ec'awng' ut' nang veng Ro'ma na' pun ce ri mhawng' ing' rot ye na', ce heul' rap ri ti ye rot nang keulas muis Ahpias' na', rot ri nang nya it' chec' muis Nya Loe' Lhang' na'. Yam Paw'lu pun eun ri nyu ce na', eun mun' keuting ri Peucawo' Eun. Eun gawm pun kaw' reng nang hpum' ri. ¹⁶ Yam rot ye nang veng Ro'ma na', Paw'lu eun pun ahkvang ut' koe meun maeé' peue suik' ko' kawn eun ti peue na' eun.

Paw'lu sangsawn' eun leukah' mun' nang veng Ro'ma

¹⁷ Hawc' pun a loe' seunyi na', Paw'lu eun klawng ro'kan ce peue Yu'da ut' teh' na' ce ing' hk'om puri. Yam ing' rot ce euc' na', Paw'lu eun lah' a ri ce, "Ec'awng' na' pe', uí' saec' un' yeuh ku' kleuc' keunhaw' ri peue ceu e' na' ce maeé' ritroe ce a'ta' a'ya e' na', daecti peue Yu'da na' ce mheut' uí' nang veng Yerú'salaem na', ce ap uí' ri peue Ro'ma na' ce. ¹⁸ Yam hawc' ce hki' mhaing' ri uí' na', kopti

un' pun uí ri yeuh ku' kleuc' kaw kuing' ri yeum na', ce sum' ploé uí. ¹⁹ Daecti yam peue Yu'da na' ham' ce a na', uí pun ri hk'o' a'mu uí na' heul' rot ri hkun'haw'hkam' Kae'sa eun. Uí hkuin' caee ri sum' tang' a'mu hk'a'pang peue ceu ec'awng' ri na' ce. ²⁰ Kopti lawng awn' na, uí klawng ri u pé'. Kopti meuh a ku' keutuí' hpum' ce peue Ísarelá' na', uí pun ri hkam' mawt ti ri mu' lhec' na'."

²¹ Ce top' a, "Ye hkuin' duing pun lai ris lawng mi neum kuing' Yu'da na'. Ec'awng' ing' neum teh' na' ce ku un' duing lah' ris lawng mi ku' un' chak' na' saec' ti peue yeut.

²² Daecti ye ku sum' mhawng' kamkuit mi na', kopti yawng ye peue ut' ku duih' na' tang' ce map' ri muk ritroe aen' na'."

²³ Ce hpawt' seunyi kaw ri hk'eup' Paw'lu eun na'. Peue heun' na' ce ing' cu ri vang ut' eun Paw'lu na'. Tang' neum peunngup rot ri hk'a'pul na', Paw'lu eun lah' ce mhawng' a meulamlam ri maeé' hkam' sa'hki' lawng kuing' Eun Peucawo' na' ri ce. Eun co'ca' ri yeuh ce yum' Yesu' Eun ri cu eun htawm leukah' ritroe eun Mo'se na' maeé' htawm ce peue suip leukah' Eun Peucawo' na'. ²⁴ Leukah' lah' eun na' ngon' ce yum' a, daecti ngon' ce un' yum' a.

²⁵ Hk'a'naee muk ce na', ce un' maen puri. Ce baet ri pucti heul' ti peue hawc' ti peue yam Paw'lu lah' eun leukah' yeuh keutit' na', "Meuh ka neum seun' ku' Cit' seunga' chak' na' cu ka Ísaya' ku' meuh peue suip leukah' Eun Peucawo' lah' a ri a'ta' a'ya pé' na' ce yeuh keutit' na',

²⁶ 'Heul' lah' a ri peue ceu aen' ce yeuh keutit',

"Pé' saec' na' pun ri mhawng' gawm mhawng' a, daecti pé' hkuin' kaw duing ceng' ri ka.

Pé' saec' na' pun ri nyu gawm nyu a, daecti pé' hkuin' kaw duing yawng a."

²⁷ Kopti hpum' ce peue ceu aen' cen' ka.

Yhuk' ce na' a un' leuceng.

Ngái' ce na' a ku yep ri.

A lawn un' yeuh keutit' ko',
 ce kaw pun ri nyu ri ngai' ri na',
 mhawng' ri yhuk' ri na',
 yawng ri hpum' ri na',
 hpawt' ce ri ing' na'.

Hawc' ko', Ui' kaw bai' ce cuin.*

²⁸ Kop awn' na, ui' sum' kah pe' yawng hk'a' htut
 lawtpon Eun Peucawo' na' puin' a ri heul' ri peue un' meuh
 peue ceu Yu'da na' ce hawc'. Ce ku kaw leuceng a yeut."
²⁹ †

³⁰ Paw'lu eun ut' nang nya hkat ri na' lal' neum nuk.
 Eun rap ri ti peue ing' ri ti na' ce gawm'euc'. ³¹ Eun hpum'
 hat'han' sangsawn' lawng kuing' Eun Peucawo' na' mae'
 lawng Eun Cawo' Yesu' Hkrit na'. A hkuin' kue' nang ham'
 eun saec' ti peue.

* **28:27** 28:26, 27 Ýsaya' 6:9, 10 † **28:29** 28:29 Hawc' Paw'lu lah' eun
 a yeuh keutit' na', peue Yu'da na' ce pucti heul' htu'hting' meun puri reng
 nyawk'.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 10 Sep 2021 from source files dated 10 Sep 2021

0468b0b5-acb2-59c4-92d3-4fa09a4d091c